

萬 有 文 庫

第二集七百種

王 雲 五 主 編

宋 文 鑑

(二)

呂 祖 謙 論 次

商 務 印 書 館 發 行

宋 文 鑑

(二)

呂祖謙詮次

國學基本叢書

宋文鑑卷第二

賦

皇畿賦

楊侃

大酺賦

劉筠

中園賦

晏殊

明堂賦

范仲淹

皇畿賦

楊侃

有賦家者流。欲馳名於當世。思著詠於神州。忽念前古。深懷景慕。誦二京於張衡。覽兩都於班固。於是輟卷意慙。閣筆心伏。讓而謂臣。請書簡。臣辭不獲已。而謂之曰。子讀二子之賦。而知兩漢都邑之制。宮殿之麗。而未知大宋畿甸之美。政化之始也。予幸得職探風謠。官參儒雅。千里之郊。圻是巡。八使之軺。車斯假。若夫大邑名城。神臯沃野。畫地可記。濡毫可寫。至於宮禁之深嚴。予未聞也。都城之浩穰。衆所覩也。是故彼述其內。予言其外。蓋萬分之舉。一難盡述。而備載。昔者唐綱不振。國鼎將遷。俄梁室之革命。啓浚都而應天。旣觀法於左嶠。右隴。亦取則於西澗。東瀛。大矣。雄圖昭然。聖謨所陳。留天下之衝要。謂大梁海內之膏腴。漢祖得之。則齊楚之敵。敗亡相繼。咸就擒而卽誅。梁王守之。則七國之師。不敢西向。盡爲馘而爲俘。實王氣之長在。宜萬世而作都也。莫不廣封溝。設險固。襄平割宋之美田。戴邑裂曹之沃土。滑分屬邑之

二城陳滅太康之萬戶。潁川之鄆陵扶溝。滎陽之中牟。陽武。咸命落編民於州籍。升地圖於天府。故得雄臨九州。陋視三輔。經營歷於五代。法則垂于萬古。皇宋之受命也。太祖以神武獨斷。太宗以聖文誕敷。平江表破蜀都。下南越。來東吳。北定并汾。南取荆湖。是故七國之雄軍。諸侯之陪臣。隨其王公。與其士民。小者十郡之衆。大者百州之人。莫不去其鄉黨。率彼宗親。盡徙家於上國。何懷土之不聞。甲第星羅。比屋鱗次。坊無廣巷。市不通騎。於是。有出居王畿。掛戶縣籍。興產樹業。出賦供役者矣。豈比夫秦遷戶口於咸陽。漢徙豪傑於陵邑。魏將實於河南。驅冀民而是入也。今聖上之在東宮也。尊以皇儲。尹茲京邑。視政之初。民訟雲集。莫不察之以情僞。辯之以曲直。發伏禁姦。親剗繁劇。旣而梓鼓不鳴。豪右斂迹。吏不敢欺。民用懷德。若乃龍樓曉出。奉法謹身。教民以事父也。親拜師傅。降禮國儲。教民以事師也。公退則侍講在前。出入則四賓是翼。尙老尊學。與民爲則是。時王畿之內。易俗移風。以至正南面。居域中。由內及外。化行令從。是君上德惠素立。而政教早崇也。若乃銳旅百營。高城千雉。孫武教陣。吳起撫士。其齊如林。其猛如虎。手擊利劍。足張彊弩。躍馬奪槊。投石拔距。入則訓練。出無征戰。身閑賞厚。家有餘羨。是故擁彊兵。衛近甸。如大郡雄藩。爲屏爲翰者。且有九縣。尉氏。咸平。陳留。雍丘。襄邑。太康。考城。東明。陽武也。天設二渠。曰蔡曰汴。通江會海。縈畿帶甸。千倉是興。萬庾是建。杜預主計。劉晏司漕。何貢何輸。吳粳楚稻。月致百萬。猶責其少。漢之太倉。積粟紅腐。使彼粒而計之。未及我斗量之數。成王之庾。萬箱以供。未若我千艘往來。連江淮而無窮。是故備九年之儲。充六軍之給。當津處要。山積雲入者。復有五邑。陳留。雍丘。襄邑。尉氏。咸平也。若乃惣戎者。貴領專城。宰邑者。上應列星。簿旣資高。尉亦秩清。率兵守戍者。五鎮。建雄義。聲園。城馬欄。萬勝。鎮皆置甲士防守。有使臣掌領之。統騎分巡者。兩路。府界東西兩路。各置都同巡檢。

二城皇之外遊徼四布。京城四面巡檢各一人。桓桓八臣是警是護。謂東西兩路洎京城四郊原廕。春草萋萋邊

烽不警。牧馬爭嘶。廡空萬櫛。野散千蹄。陂閑牧南。汴河已南縣邑長陂沙平走西沙平尤宜牧馬。一飲空

川。一甃空原。去如霧散。來若雲連。地廣馬多。古未有焉。若乃任士出於民心。獻芹比於古俗。園茄早實。時

菓先熟。瓜重南門。筭宜脩竹。鬻於市兮。利既兼倍。進於君兮。恩必霑沐。時或戴勝降桑。螻螻未鳴。野人登

麥。以先至。蠶婦貢絲而已。成別有襄陵之桃。陽夏之柿。朱櫻宜於谷林。丹杏出於尉民。其或陽鄉千樹之

梨。扶樂千樹之栗。比封千戶之侯。亦何讓於昔日。鹹壤宜北鄉之羊。野蓑美東邑之豕。魚鼈鳧鴈之盛。西

有陂兮。萬頃菱芡蓮藕之美。東沿堤兮。百里其或仲冬之月。禮尙進鮮。介麋素出於逢澤。狡兔復多於梁

園。乃命萊田於虞人。選徒於司馬。四校畢陳。六飛夙駕。何千乘萬騎之馳騁。滿四通五達之郊野。西或過

於圃田之藪。東或出於平臺之下。乃有孟賁之徒。烏獲之類。檀楊而來。叱咤而至。搏虎兕。擊熊豕。玄豹逆

曳。白狐生致。復有負羽從獵之人。控弦伏獸之士。落孤鴈於馬首。貫雙鷗於雲裏。然猶示之以三驅之仁。

寬之。以一面之網。不使獸殫於下。禽盡於上。何長楊之獵。自謂於禽多。雲夢之畋。敢誇其地廣哉。圖書載

詳。境土斯見。開封則漢志之名邑。今二赤之首冠。祥符則天書之降年。易新名於舊縣。稔結之入。斯爲近

甸。若乃百萬衆之分營。十二市之環城。囂然朝夕。異彼郊坰。其東則有汴水之陽。宜春之苑。向日而亭臺

最麗。迎郊而氣候先暖。鸞囀何早。花開不晚。瞻太一之清宮。壯先朝之命工。構宇煙霞之外。出俗囂塵之

中。效仙人之樓居。慕老氏之玄風。青青道邊。千畝何田。端拱之初。藉于此焉。黛耜一執。青史千年。登蓼隄

以東望。見高臺之百尺。居道之南。在岡之北。下有廣場。可馳可逐。我皇帝初卽寶位。大閱軍旅。親乘戎輅。

習戰于此。士馬秋勁。甲冑晨整。上憑軾以將觀。衆無譁而是聽。列八陣之形。申三令之語。肅將帥。嚴部伍。頗牧授之以方略。韓彭進之以旗鼓。失軍容者戮以徇衆。有勇敢者賞而裂土。彼上林之馳射。驪山之講武。豈可同日而語哉。其南則有崇崇清壇。肅肅齋宮。卜是吉土。龜從筮從。永奉禋祀。郊見昊穹。燔柴展禮。萬世無窮。別有景象仙島。園名玉津。珍果獻夏。奇花進春。百亭千榭。林間水濱。珍禽貢兮何方。怪獸來兮何鄉。郊藪旣樂。山林是忘。則有麒麟含仁。騶虞知義。神羊一角之祥。靈犀三蹄之瑞。狡狴來於天竺。馴象貢於交趾。孔雀翡翠。白鷗素雉。懷籠暮歸。呼侶曉去。何毛羽之多奇。罄竹素而莫紀也。忽斷苑牆。又連池籩。介族千狀。沙禽萬類。盡游泳而往來。或浮沈而出處。柳籠陰於四岸。蓮飄香於十里。屈曲溝畎。高低稻畦。越卒執耒。吳牛行泥。霜早刈速。春寒種遲。舂紅粳而花綻。簸素粒而雪飛。何江南之野景。來輦下以如移。雪擁冬苗。雨滋夏穗。當新麥以時薦。故清蹕而親至。輦從千官。郊陳萬騎。旣觀穫以云罷。亦宴犒而後已。其西則有池鑿金明。波寒水殿。鷁首萬艘。而壓浪虹橋。一道而通輦。太液無濫觴之深。靈沼有潢汙之淺。時或薰風微扇。晴瀾始暖。命樓舫之將軍。習昆明之水戰。天子乃駐翠華。開廣宴。凭欄檻於中流。瞰渺茫於四面。俄而旗影霞亂。陣形星羅。萬棹如風。而倏去。千鼓似雷。而忽過。則有官名飲飛。將號伏波。驤江中之龍。避船下之戈。黃頭之郎。旣衆。文身之卒。且多。類虬龍而似蛟蜃。駭鯨鯢而走鼉鼉。勢震動於山嶽。聲沸騰於江河。別有浮泛傀儡之戲。雕刻魚龍之質。應樂鼓舞。隨波出沒。鑾輿臨賞。以盡日。士庶縱觀。而踰月。彼池之南。有苑何大。旣瓊林而是名。亦玉輦而是待。其或桂折天庭。花開鳳城。則必有聞喜之新宴。掩杏園之舊名。於是連鑣上苑。列席廣庭。蓋我朝之盛事。爲士流之殊榮。一派如飛。通槽架虛。越廣汴湍。

流之上。轉皇城西北之隅。貫都注御溝之口。轉漕通廣濟之渠。京索導源而干彼。金水名河而在茲。其北則瑞聖新名。含芳舊苑。四方異花。於是乎見。百疇好鳥。於是乎聞。十洲得景。三島分春。延旆之設。是名天駟。伐大宛以新求。涉渥洼而遠致。羣驅八駿。隊數十驥。雖輓粟之千車。乃嘗秣之一費。彼沙臺之崔嵬。聳佛剎之千尺。岡阜連延於西南。原田平坦於東北。何沙海之飛揚。忽到此而止息。莫不地多賢士。代出異人。何千旄之子。向浚郊而雲臻。雖梁多於長者。非安國而不聞。過信陵之祠宇。想英風而若存。何侯嬴之白首。尚抱關於夷門。遇公子之好賢。忽柱駕而咨詢。既同載而過市。謁隱屠而駐輪。果嘉謀之斯得。救邯鄲而義伸。奪晉鄙之十萬。終自將而卻秦。設守冢而奉祀。值漢皇之東巡。若乃過陳留之故邑。訪地名之所因。蓋二留之分別。彼彭城而此陳。昔赤帝之起義。會子房而于此。始錫賢於上天。終受封於茲地。既萬戶以建侯。亦千年而崇祀。千屯北縣之郛郭。三月南河之鄼市。何飛梁之新遷。患橫舟之觸柱。今之雍丘。古曰杞國。民厚風俗。士繁貨殖。縣之西郊。山曰谷林。其或花迎野望。煙禁春深。景當妍麗。俗重登臨。移市景日。傾城賞心。幄幕蔽野。軒蓋成陰。暮而忘歸。樂不絕音。既同歡於萬室。罔惜費於千金。厥篚織文。出於襄邑。池濯錦以爲名。蜀有江而焉及。復有咸平大縣。我家新建。因紀年以命號。詔將作而營繕。公宇之制。甲子畿甸。中有大川。通闔帶關。貫都邑而北來。走江湖而南會。何客棹之常喧。聚茶商而斯在。千舸朝空。萬車夕載。西出玉關。北越紫塞。徵尉氏之名。本大夫之邑。蓋鄭國之上田。俾獄官而世襲。何彼樂郊。今爲畿地。爰有仁木。應乎嘉瑞。二棠合生。雙榆連理。槐獨秀而通枝。木異類而同氣。良宰畫圖而來聞。大尹飛章而奏異。莫不召虎殿之宿儒。集麟閣之名士。驗彼祥經。考乎信史。表六合之一家。而帝德之光被也。

加以地多藪澤。利有蒲魚。晴瀾望晶。陂之色。山水觀惠民之渠。乃有楫師炭商。交易往復。素衣化緇。漆身同色。行舟則夏瞻雲雨。售貨則冬禱雪霜。經宋樓而關征既薄。歷朱曲而市稅有常。潺潺泊溝。渙渙洧水。入鄢陵而碧截原田。過扶亭而清映閭里。珍貨奔馬。欄之道。豪俠聚建雄之市。彼東昏之舊城。易美號於新室。似興廢之有時。而圖讖之預出。何以明而代昏。符作畿於聖日。考城之人。舊俗剛毅。鄉出勇夫。里多壯士。椎埋爲姦。任俠尙氣。睚眦必報。盃間刃起。今爲畿民。禮束化被。暴虎之徒。聞義則畏。南徂太康。淮陽甚邇。地宜瑯玕。家有蒼翠。城過兩扶。溝踰二備。地既成於上田。人不趨於末利。桑成陰而春繁。棗結實而秋美。問中牟之耆民。歎魯恭之仁宰。何三異之善政。有千年之遺愛。遇我后之盛明。西朝拜於園陵。瞻路隅之靈廟。想前史之嘉名。祭以上公之禮。爵以太師之榮。若夫八澤。圖經有八澤。清口澤。管澤。鴈澤。九溝。九溝。謂醋溝。鷓鳥溝。青陽溝。泥溝。蓼溝。蓮藕。三固。潘固。朱固。鄭固也。按圖。淳澤。卑澤。龍澤。滑澤也。以遙觀。見斗門之雙注。吸驚浪以橫來。絕長隄而可懼。其始也。患彼決溢。利其填闕。漑萬頃之陂澤。變終古之寫鹵。盡若膏腴。咸通耒耜。有若決漳灌鄴。旁之田。鑿涇沃關內之土。然後疏導入白溝之流。會同爲漕渠之助。彼梁固之在東。亦派分於波勢。梁固斗門在萬勝鎮東。沿流有一舍之遙。則水無寸差之異。何一啓而一閉。常若合於符契。始注陂而雷聲。終入渠而駟逝。散濁浪以澄沙。廣良田而濟世。指陽武以北。邁涉博浪之長沙。岡斷續以千疊。塵飛揚而四遮。人迷途而莫辨。鳥投樹以何賒。策不進兮我馬。輪欲理兮何博。過戶牖之名鄉。乃曲逆之舊里。何分社之稱平。已宰國而有志。經計相之里中。思張蒼之善算。屈柱史以事秦。榮列侯而佐漢。宜二賢之靈祠。歷千古而輝煥。西望河流襟帶二邑。高岸山立。回灣箭急。蟻

壤憂漏。衝決莫救。基根相扶。萬柳千榆。輿梢舂土。常設備禦。建營置卒。轉粟實庾。堅彼金隄。鑿手前古。秋防夏扞。守以朝暮。冬計春修。役均編戶。岸艤連航。兵屯兩渡。阻浩浩之波。扼憧憧之路。北掉謳晨。南帆落暮。唯姦是防。非利是務。右倚太行。橫絕雲霧。夫雍阻二嶠之險。洛憑九河之固。方之於是。彼若平路。過濮水之長渠。經封國之舊域。寥落兮桐牢之亭。湮沒兮黃池之迹。何昔也。明誓重重。諸侯於此。以會同。今也。京邑翼翼。四方於此。以取則。涉長垣之塗。歷古衛之境。城有婦姑之名。人慕孝慈之行。嘉孔子之入蒲。先宰予以觀政。美大家之東征。復農田而發運。若乃南瞻潘里。北指蘭岡。樹新文於二碑。易美號於兩鄉。因東封之行。幸感瑞應之非常。忽有鳴唳。降于穹蒼。丹頂未辨於煙際。玉羽已穿於仗旁。九其數。象君道之體陽。再而降。符帝運之重光。何德動於上天。而道盛於前王也。如是哉。客既聞臣之說。而知漢以宮室壯麗。威四夷。宋以畿甸風化。正萬國。彼尙侈而務奢。此譎道而詠德。乃曰。使孟堅可作。平子再生。讀子之賦。不敢復談于漢京也。

大酺賦

劉 筠

臣謹按前志。酺之言布也。王德布於天下。而合聚飲食焉。肇自炎漢初興。日不暇給。罰其合醴之會。著于三尺之法。逮乎孝文崇修禮義。賜酺之惠。繇是流行。況我朝盛德形容。汪洋圖謨。固不可以寸毫尺素。孟浪而稱也。臣今所賦者。但述海內豐盛。兆庶歡康。爲負暄獻芹之比爾。其辭曰。聖宋紹休兮。三葉重光。祥符薦祉兮。萬壽無疆。昭景貺於紀元之號。還淳風於建德之鄉。慶無逸而不被。俗無細而不康。乃下明詔。申舊章。賜大酺之五日。洽歡心於庶邦。爾乃京邑翼翼。四方是則。通衢十二兮。砥平。廣路三條兮。繩直。固

不以列肆千里。集民萬億。羣有司而先置。戒掌次而具飭。幕九章兮。燦若舒霞。廊千步兮。軒如布翼。外饗之百品有敍。酒正之六物不忒。分命司市。遷閭闔於東西。鳩集梓人。校輪輿於南北。將以極瑰奇詭異之歡。示深慈至惠之澤也。於是二月初。言春日載陽。皇帝乃乘步輦。出披香。排飛闥。歷未央。御南端之曉闕。臨迴望之廣場。百戲備。萬樂張。仙車九九而並驚。樓船兩兩而相當。昭其瑞也。則銀瓮丹甑。象其武也。則青翰舩。聲砰礚兮。非雷而震。勢憑凌兮。弗葦而航。且觀夫魚龍曼衍。鹿馬騰驤。長蛇白象。麒麟鳳凰。吞刀璀璨。吐火熒煌。或歔氣而爲霧。或叱石而成羊。文豹左擎兮。右攬玄珠。倏耀兮。忽藏畫地而川流。汧汧移山而列岫。蔣神木垂實。靈草擢芒。獰巨獸。綽約天倡。曳綃紈而綵繡。振環珮兮。鏗鏘赤刀。受黃公之祝。大面體蘭陵之王。木女發機於曲逆。鳥言流俗於冶長。千變萬化。紛紜頡頏。前者拗怒而欲息。後者技癢而激昂。舞以七盤之妍袖。間以九部之清商。彈箏擗籥。吹竽鼓簧。南音變楚。隴篴鳴羌。琵琶出於胡部。摻鼓發於禰狂。方響遺銅磬之韻。羯鼓鬪山花之芳。笙篴之妙引。初畢。笳管之新聲。更揚。洞簫參差兮。上處。燕筑慷慨兮。在旁。琴瑟合奏而奚辨。塤箎相須而靡遑。信滿阬而滿谷。豈止乎盈耳洋洋而已哉。又若樞末之技。趨捷之徒。籍其名於樂府。世其業於都盧。竿險百尺。力雄十夫。望仙盤於雲際。視高緇於坦塗。俊軼鷹隼。巧過猿狙。銜多能於懸絕。校微命於錙銖。左迴右轉。既亟且且。嘈噴沸瀆。鼓譟歔歔。突倒投而將墜。旋歛態而自如。亦有僂僂赤子。提攜叫呼。脫去襁褓。負集危軀。效山夔之躑躅。恃一足而有餘。歔對舞於素山。跳丸劍而爭趨。偃仰拜起。如禮之拘。雜以拔距投石。衝狹戲車。虵矛交擊。猿騎分驅。韓嫣之金丸。疊中孟光之石臼。凌虛習五案者。於斯盡矣。透三峽者。何以加諸。復有俳優。旃孟滑稽。淳于談諧。方

湖調笑酒胡縱橫。謔浪突梯。嘖嘖混妍醜。於戚施。變舒慘於籬條。乃至角抵蹴鞠。分朋列族。其勝也。氣若雄虹。其敗也。形如槁木。誰謂乎狼子野心。而熊羆可擾。誰謂乎以彊凌弱。而貓鼠同育。斯固藝之下者。亦可以娛情而悅目。是時也。都人士女。農商工賈。鱗萃乎九達之達。星拱乎兩觀之下。舉袂兮連帷。揮汗兮霈雨。鈿車金勒。雜遝而晶熒。袞服靚裝。藻緝而容與。網利者罷登龍斷。力田者競辭畎畝。屠羊說或慕功名。斲輪扁亦忘規矩。寂寂兮巷無居人。憧憧兮觀者如堵。以遨以遊。爰笑爰語。始乃抃舞於康莊。終乃含歌於罇俎。旁有相如滌器。濁氏賣用以兼贏。咸霽良雜苦。勺藥之味。蚺蜥盡取。既賈用以兼贏。咸滿志而自許。又乃百工居肆。衆貨叢聚。錦繡之設。餒朗薨靡。競相高以奢麗。羞難得而覩縷。于以見國家蕃富。上下充足。女有餘絲。男有餘粟。顧金土兮同價。興禮讓兮郁郁。若夫七相茂族。四姓良家。蟬聯鼎盛。照耀繁華。皆結駟而連騎。雖兩漢其寧加。則又有菟裘老臣。逍遙高尚。乘下澤之車。曳靈壽之杖。爰稽首於堯雲。挹衡罇而無量。鄉里俊造。草澤英才。覽德輝而狎至。觀國光而聿來。顧鼎食之可取。豈直野萃之謂哉。羽林戴鷓之夫。期門飲飛之子。罷羽獵於長楊。投賓壺於棘矢。襲楚楚之衣。交臂於廛里。大矣哉。惟堯舜之作主兮。盛德日新。矧臯夔之爲佐兮。嘉猷矢陳。奏君臣相悅之樂。會比屋可封之民。淇露未晞。在藻之懼。允洽。太牢如享。登臺之衆咸臻。老吾老以幼吾之幼。不獨子其子而親其親。繇寡孤惇兮。各有所養。蠻夷戎狄兮。孰非我臣。粟帛之賜已厚。牛酒之給仍均。春醴惟醇。炮炙薌芬。皤髮者駕肩而洩洩。支離者攘臂而欣欣。莫不舍和而吐氣。蹈德而詠仁。一之二之日。樂且有儀。三之四之日。不醉無歸。五日兮。饜飫斯極。但見乎含哺而嬉。介爾眉壽。和爾天倪。非夫上聖之乾乾致治。其孰能逸豫而融怡者哉。敢爲系曰。於鑠

我宋巍乎帝先。創業垂統。靜直動專。威烈既茂。文德是宣。謙而不宰。讓之于天。上帝允答。靈貺昭然。厥慶惟大。庶民賴焉。爰錫酺飲。流惠周旋。有殽如阜。有酒如川。既醉既飽。無黨無偏。體安舒兮。被堯日氣。和樂兮。暢薰絃。祝聖祚兮。揚純懿。永延長兮。彌億年。

中園賦

晏殊

在昔公儀。身居鼎軸。念家食之憑厚。斥芳蔬之薦藪。粵有仲子。堅辭廩祿。率齊體於中野。灌百畦而是足。惟二哲之高矩。藹千齡之信牘。雖顯晦之非偶。諒謨猷而可復。豈不以崇高宅乎富貴。聲教移乎風俗。四民謹舊德之業。百乘鄙盜臣之畜。義利愧於交戰。矛盾蚩兮並鬻。代工而治兮。戒在貪競。付物以能兮。使其茂育。斯有位之良訓。乃羣倫之所屬。天地閉兮。賢隱。置網張兮。獸伏。怖炎火之焚石。惡東龜之毀櫝。甘田畝以昏作。晦膏蘭而擇福。我負子戴兮。終年靡勞。夏葛冬裘兮。匪躬是辱。斯遯世之攸處。詎紛華之可瀆。眷予生兮。曷爲幸親逢乎盛時。進寬大治之責。退有上農之費。求中道於先民。樂鴻鈞於聖期。寓垣屋於窮僻。敞林巒於蔽虧。朝青閣以夙退。飭兩驂兮獨歸。竊藹郊園。扶疎町畦。鮮巾組以遨遊。飾壺觴而宴嬉。幼子蓬鬢。孺人布衣。嘯傲蘅畹。留連渚湄。或捕雀以承蜩。或摘芳而翫蕤。食周粟以勿踐。詠堯年而不知。琴風颯以解慍。田雨滂兮及私。爾乃壇杏蒙金。蹊桃銜碧。李雜紅縹。柰分丹白。梨誇大谷之種。梅騁含章之飾。烏勃旁挺。來禽外植。櫻胡品糕。而形別。棠棣名同。而實析。大禱朱柿兮。駢發。棗棗安榴兮。間拆。榎植以馨烈。蒙采枳椇以甘芳。見識。援嬰奠於林際。架茱萸於沼側。況夫霜薤含潤。露葵薦澤。芹自南楚。蒜來西域。蘇荏抽穎。蓼苒凝液。堇薺更茂。菲葑代殖。首荷麗篋。蕤荷霏歷。鍾山之菘韭。早晚。吳郡之莧茄。紫

白織女耀而瓜薦。大昴中而芋食。匏瓠在格以增衍。藜藿緣陰而可摘。若其愈疾栽菊。忘憂樹萱。香珍綠蕙。媚服崇蘭。玉蘂金盞。相思杜鵑。辛夷襲紫。芍藥含丹。游龍出隄。芳苴生原。籬槿彫暮。宮槐合昏。四衢綺錯。五出星聯。蓑蓑蘇切。落落。纂纂初妍。護臺香而蝶亂。聚崖蜜以蜂喧。與夫豬苓馬勃。澤瀉溪蓀。荔芸禦凍。椒桂含溫。莢房入佩。菰首登殮。薜荔成帷。昔邪在垣。獨榭除渴。酸漿治煩。菖蒲感於百陰。亭歷萌於大寒。卷施心拔而不死。虎鬣蔓生而自懸。斲首牛脣之夥。雞腸烏喙之繁。紅鬢細膚。丹房碧延。或山經之號著。或藥錄之名傳。至夫松檜被徑。梧楸蔭軒。江蕉凝牛餒切。綠海柏渾圓。石南蒼蔚。扶老縈纏。蠹蠹筠之東美。垂溪柳之三眠。或後彫而秀出。或總翠以相先。叢灌駢滋。翾飛所據。驗九扈以農正。察五鳩而民聚。戴鷩興蠶織之候。布穀起耕耘之務。當陸成而鷓鴣云止。麩麥秀而倉庚始翥。伯勞驚於早寒。盍旦戒乎將曙。晨風不擊而逐雀。斲木無聲而食蠹。鷓介立以擅澤。烏羣嗽而反哺。鷓匪陋於荆棘。鷓無營於鐘鼓。順時律以弄吭。樂天和而命侶。鸞盜盜以交賀。鵠儵儵而告語。既置廚之不設。在槽巢而可俯。談王道於樵子。接歡歌於壤父。鑿坎井之凝冽。決清渠而灌注。愚抱甕以殫力。智設棹而盡慮。咸不病於夏畦。各無憂於稔茹。懿夫觀品彙之零茂。識元精之所存。覩百嘉之穰儉。明四序之無愆。動植飛潛。兮得宜乃悅。雨暘寒燠。兮叶度而蕃。且復諭名花於君子。興瑤草於王孫。采家臣之秋實。歌上瑞之豐年。資旨蓄而御冬。擷衆芳而鍊顏。至若嚴客幸臨。良辰是邁。戴掃危榭。爰張宴豆。蒙山騎火之茗。豫北釀花之酎。或秋弈以當局。或唐弓而在殼。哨壺枉矢之設。博筭擄蒲之侑。誠一笑兮相樂。亦千金而爲壽。灑毫牘以摛思。極朋情而卜晝。送歸鴻兮海壖。揆鳴瑟兮賓右。舞長袖兮相屬。命歡謠兮遞奏。無取次公之狂。不遺椒舉之舊。春

晚晚兮氣佳。臨高臺兮淑華。夏恢台兮日永。陰茂林兮脩迥。涼月皎兮鐘漏寂。朔霰飛兮天宇負。廓丹府以懲忿。悅靈龜而繕性。茲所謂祛魯相之介節。略於陵之獨行。卻園夫之利兮。取彼閑適。荷王國之寵兮。遂夫游泳。禽託藪以思驚。獸安林而獲騁。倡伴乎大小之隱。放曠乎遭隨之命。庶樂育於嘉運。契哲人之養正。

明堂賦

范仲淹

臣聞明堂者。天子布政之宮也。在國之陽。于己之方。廣大乎天地之象。高明乎日月之章。崇百王之大觀。揭三宮之中央。昭壯麗于神州。宣英茂於皇猷。頒金玉之宏度。集人神之丕休。故可祀先王以配上帝。坐天子而朝諸侯者也。粵自蒼牙開極。黃靈耀德。巢穴以革。棟宇以植。徹太古之弊。明大壯之則。風雨攸止。宮室斯美。將崇高乎富貴之位。統和平乎天人之理。乃聖大造。明堂肇起。明以清其居。堂以高而視。壁廓焉而四達。殿歸焉而中峙。禮以潔而儉。必表之以茅。教以清而流。故環之以水。暨二帝之述焉。合五府而祭矣。逮夫夏禮秩秩。奉以世室。商祀穆穆。制以重屋。神禹卑宮。階以一尺之崇。成湯受命。革以三尺之盛。赫赫周堂。制度景彰。七筵兮南北之廣。九筵兮西東之長。堂并包於五室。室辨正於五方。左青陽而右總章。面明堂而背北堂。耽然太室。儼乎中黃。都徽名之在南。取盛德之向陽。或謂厥堂惟一。厥室惟九。闢闔其三十六戶。疏達兮七十二牖。亦規上而天覆。復矩下而地厚。近郊之宮。廣而能受。通天之宇。高而弗偶。八方象其幅員。九陛參其前後。肅肅一作桓桓焉。聽政之廟。應辰而周彰。趨趨焉。承天之柱。列宿而相望。環林兮葱蔥。圓海兮泱泱。既方舟而經梁。復素飭其迴牆。陳位序以有嚴。議法象而必臧。示邦域之景鑠。期

人神之樂康。左有辟雍。天子學宮。墳籍浩以明備。文物森其會同。奉三壽以勗天下之孝。設三乏以勸諸侯之風。右有靈臺。庶民子來。若經始於神明。迺占候於昭回。天之道也。惟默默以有象。聖之心也。蓋惕惕而無災。此三雍之大者。故百世以欽哉。若夫約周之禮。稟夏之正。天子外青陽之位。體大德之生。彼相協謀。有司奉行。慶賜必均。歷象必明。布農事於準直。習舞德於和平。止伯益之伐木。禁蚩尤之稱兵。惟倉廩兮賑天之窮。惟幣帛兮禮邦之英。無隱不彰。無潛不亨。蒙蕩蕩之至仁。浸灑灑之醇精。此明堂之春也。萬物爲之榮。又若炎以繼天。羲以永日。始於仲呂之管。復于清宮之律。天子乃登諸明堂。暨夫太室。命盛樂以象德。致大雩以祈實。外高明而有豫。定心氣而無逸。靜百官之事。驅五穀之疾。無索於關。無難於門。止北伐之威。以助養於生生。導南風之和。以飾喜於元元。此明堂之夏也。萬物爲之繁。爾乃象正火位。德王金行。羽漸于以南嚮。穀萬斯而西成。天子乃居總章之奧。奏清商之聲。圖有功而專任。詰不義而徂征。脩法制以謹收藏之令。養衰老以惻搖落之情。同我度量。平子權衡。人社以崇。厚兆民報本之志。神倉以祕。示萬邦致孝之誠。此明堂之秋也。天下爲之清。及夫蟲介時分。虎威夕永。詩人發其涼之詠。日官賓可愛之景。天子乃北堂以居。南面而省。錫飲蒸之慶。從祀寒之請。於是戒門閭。備邊境。勞三農於休息。警百辟於恭靖。關市必易。宮室必整。無用之器斯徹。無事之官必省。飭國典以俟來歲之宜。講武經以肅萬邦之屏。此明堂之冬也。天下爲之靜。斯乃順其時。與物咸宜。適其變。使民不倦者也。稽夫宗祀之文。大享之辰。上饗乎皇皇。盛節兮彬彬。比於郊也。我則取文之勝。方其廟也。我則取質之純。損益其禮。尊嚴其親。五天之坐。惝惝以陳。五帝之席。奕奕而倫。惟太室之位。迺上帝之神。作配者先王。從祀者五臣。樽俎離離。玉幣

莘莘。牲牢之舉。既遵於夏后。蔬果之薦。復本於周人。禮無不當。誠無不臻。聖人於是出齋宮而肅肅。被法服而循循。酌一獻以從質。躬百拜以表寅。司儀實相。樂正攸賓。進俎豆之吉蠲。羅篋簾之輪囷。六樂咸在。統美乎列皇。八風相盪。同和乎天鈞。下舞上歌。蹈德詠仁。非常之祭。駿奔者萬國。莫大之孝。蟻懷者兆民。於是神醉其德。人樂而極。太史書於策。大夫頌於國。頌曰。明堂崇之。明王祀之。禮以成之。樂以歌之。光天之下。教以化之。若夫元朔會同。羣后對越。穆穆乎舜門之關。晰晰乎宣燎之發。帝時待旦。而久求衣。以先紆黃組。冠通天。建日月。服乾坤。佩干將。外崑崙。進山嶽之圭。當雲龍之軒。正聖人之大寶。示天下之有尊。巍巍焉負扆而立。濟濟焉辨色而入。太常正其等衰。九賓序其名級。中階之前。三公屹然。應門之外。九采察焉。阼階之東。諸侯以同。西階之西。諸伯以齊。門東北面者。子之位。門西東上者。男之次。東門之外。則有樂浪蟠木。九夷之國。西面而北上。西門之外。則有蒙汜大秦。六戎之屬。南上而東向。南門之外。則有朱垠越裳。八蠻之族。唯北是望。北門之外。則有葷粥幽陵。五狄之種。唯東是向。於是旒旒旅進。鏘鏘肆覲。嚮明者。蓋取諸離。觀光者。受之以晉。君臣之位。定禮樂之道。振雅韻以奏文鐸。以徇皆望雲而就日。必歌堯而頌舜。上和而下樂。金聲而玉潤。況乎晨光赫曦。天顏弗遠。冕紱兮霞集。玉帛兮川歸。盛乎王庭之聲。明煥乎天家之光輝。若北辰之會衆星。咸粲粲而在共。如太陽之臨多露。普湛湛而將晞。莫不君三揖于上。臣載拜于下。行典禮。揚風雅。訪雋良。議窮寡。人曷幽而覆盆。賢曷側而遺野。于以盛名器。于以休宗社。署聖法於圓闕。馳神教於方夏。皇哉耀今昔之榮觀。至哉敷億兆之純嘏。故曰。揖讓而治天下者。明堂之謂也。惜乎三代以還。智者間間。諸儒靡協。議者喋喋。而皆膠其增損。忘禮樂之大本。泥於廣狹。廢皇王之業。

使朝廷茫然有逾遠之嘆。惘然有中輟之議。殊不知五帝非沿樂而興。三王豈襲禮而至。爲明堂之道。不必尙其奧。行明堂之義。不必盡其制。適道者與權。忘象者得意。大樂同天地之和。豈匏竹而已矣。大禮同天地之節。豈豆籩之云爾。自漢魏之下。暨隋唐之際。堂或三五之上。道非三五之世。蓋不取其厚而取其薄。不得其大而得其細。享配之文。或然未分。政教之烈。斯焉弗聞。是則帝道不施。胡取乎總章。皇德不隆。胡取乎合宮。故夫明堂之設也。天子居之日。敬日思。思之何也。萬微存乎消息。敬之何也。兆靈繫之安危。繇是惟克念以作聖。思堯舜之齊名。懼巍巍之弗逮。迺孜孜於雞鳴。唯至平之休代。思阜財於吾民。懼四維之有艱。尙瘡痍而百辛。故聖人之寶儉。弗下剝而上侈。思寡費而薄索。民庶幾于格恥。惟下武之太寧。亦省躬于干戈。取諸豫於四方。慨風雲以長歌。惟知人其古難。思濟濟乎賢者。蓋舉一於臯陶。迺連茹于天下。惟好生之至德。思與物而爲春。懼幽陋之靡及。常咨命于仁人。惟及人之一德。始若晦而彌彰。故三五之君子。騰茂實而無疆。惟皇極之大範。思天下而與平。懼萬物之或差。持我心於誠衡。然後見天下齊於無體。和於無聲。脰眉而壽。吾何仁之有。含哺而嬉。吾何力之爲。但淵淵縣縣。無反無偏。浸淳澤以咸若。樂鴻化於自然。此明堂之道也。蓋無德而稱焉。我國家凝粹百靈。薦馨三極。東升煙於岱首。西展琮於汾側。未正天神之府。以讓皇人之德。祖考來格。俟配天之儀。諸侯入朝。思助祭之職。豈上聖之謙。而愚臣之惑也。臣請考列辟之明術。塞處士之橫議。約其制。復其位。儉不爲其陋。奢不爲其肆。斟酌乎三王。擬議乎簡易。展宗祀之禮。正朝會之義。廣明堂之妙道。極真人之能事。以至聖子神孫。億千萬期。登於斯。念於斯。受天之禱。與天下宜而已乎。

宋文鑑卷第三

賦

松江秋汎賦

鳴蟬賦

秋聲賦

圓丘賦

右史院蒲桃賦

詆仙賦

憫獨賦

靈烏賦

凌霄華賦

楫欄賦

離憂賦

石室賦

鑿二江賦

葉清臣

歐陽修

歐陽修

宋 祁

宋 祁

宋 祁

宋 祁

梅堯臣

梅堯臣

劉 敞

劉 敞

狄遵度

狄遵度

交趾獻奇獸賦

司馬光

思歸賦

王安石

歷山賦

王安石

事君賦

王回

松江秋汎賦

葉清臣

澤國秋晴。天高水平。遙山晚碧。別浦寒清。循遊具區之野。縱泛吳松之漚。東瞰滄海。西瞻洞庭。槁葉微下。斜陽半明。樵風歸兮。自朝暮。沙溜滿兮。誰送迎。浩霜空兮。一色橫。霽色兮。千名於是積。潦未收。長干無際。澄瀾萬頃。扁舟獨詣。社橘初黃。汀葭餘翠。鷺鷥朋飛。別鷓孤唳。聽漁棹之遞響。聞牧笛之長吹。既覽物以放懷。亦思人而結袂。若夫敵寇初平。霸圖方盛。均憂待濟。同安則病。魚貪餌而登釣。鹿走險而忘命。一旦辭祿。揚舲高泳。功崇不居。名存斯令。達識先明。孤風孰競。又若金耀不融。洛塵其蒙。宗城寡扞。王國爭雄。拂衣客右。振擢江東。拖翠綸兮。波上。膾蟬翼兮。杵中。儻卽時之有適。遑我後之爲恫。至如著書笠澤。端居甫里。兩槳汀洲。片帆煙水。夕醉酒壚。朝盤魚市。浮游塵外之物。嘯傲人間之世。富詞客之多才。劇騷人之清思。緬三子之芳徽。諒隨時之有宜。非才高見。棄於榮路。乃道大不容於禍機。申屠臨河而蹈壑。伯夷登山而食薇。皆有謂而然爾。豈得已而用之。別有執簡仙瀛。持荷帝柱。晨韜史氏之筆。暮握使臣之斧。登覽有澄清之心。臨遣動光華之賦。荷從欲之流慈。慰遠游之以懼。肇提封之所履。屬方割之此憂。將濬疏於匯川。期拯濟乎沚疇。轉白鶴之新渚。據青龍之上游。濯埃垢於緇袂。刮病膜乎昏眸。左引任公之釣。右援

仲由之桴。思勤官而裕民。迺善利之遠猷。彼全身以遠害。蓋孔臧於自謀。鮮鱗在俎。眞茶滿甌。少迴俗士之駕。亦未可爲茲江之羞。

鳴蟬賦

歐陽修

嘉祐元年夏大雨水。奉詔祈晴于醴泉宮。聞鳴蟬。有感而賦云。

肅洞庭以祗事兮。瞻玉宇之崢嶸。收視聽以清慮兮。齋予心以薦誠。因以靜而觀動兮。見乎萬物之情。於時朝雨驟止。微風不興。四無雲以青天。雷隱隱其餘聲。乃席芳藥。臨華軒。古木數株。空庭草間。爰有一物。鳴于樹顛。引清風以長嘯。抱纖柯而永歎。嘒嘒非管。泠泠若絃。裂方號而復咽。淒欲斷而還連。吐孤韻以難律。含五音之自然。吾不知其何物。其名曰蟬。豈非因物造形。能變化者邪。出自糞壤。慕清虛者邪。凌風高飛。知所止者邪。嘉木茂樹。喜清隱。一作陰者邪。呼吸風露。能尸解者邪。綽約雙鬢。修嬋娟者邪。其爲聲也。不樂不哀。非宮非徵。胡然而鳴。亦胡然而止。吾嘗悲夫萬物莫不好鳴。若乃四時代謝。百鳥嚶兮。一氣候至。百蟲驚兮。嬌兒姹女。語鸚鵡兮。鳴機絡緯。響蟋蟀兮。轉喉嚼舌。誠可愛兮。引腹動股。豈勉強而爲之兮。至於汙池濁水。得雨而聒兮。飲泉食土。長夜而歌兮。彼蝦蟆固若有欲。而蚯蚓又何求兮。其餘大小萬狀。不可悉名。各有氣類。隨其物形。不知自止。有若爭能。忽時變以物改。咸漠然而無聲。嗚呼。達士所齊。萬物一類。人於其間。所以爲貴。蓋已巧其語言。又能傳於文字。是以窮彼思慮。耗其血氣。或吟哦其窮愁。或發揚其志意。雖共盡於萬物。乃長鳴於百世。予亦安知其然哉。聊爲樂以自喜。方將考得失。較同異。俄而陰雲復興。雷電俱擊。大雨旣作。蟬聲遂息。

秋聲賦

歐陽修

歐陽子方夜讀書。聞有聲自西南來者。悚然而聽之。曰。異哉。初淅瀝以蕭颯。忽奔騰而砰湃。如波濤夜驚。風雨驟至。其觸於物也。縱縱錚錚。金鐵皆鳴。又如赴敵之兵。銜枚疾走。不聞號令。但聞人馬之行聲。予謂童子。此何聲也。汝出視之。童子曰。星月皎潔。明河在天。四無人聲。聲在樹間。予曰。噫。嘻。悲哉。此秋聲也。胡爲乎來哉。蓋夫秋之爲狀也。其色慘淡。煙霏雲斂。其容清明。天高日晶。其氣慄冽。砭人肌骨。其意蕭條。山川寂寥。故其爲聲也。淒淒切切。呼號憤發。豐草綠縟而爭茂。佳木葱蘢而可悅。草拂之而色變。木遭之而葉脫。其所以摧敗零落者。乃其一氣之餘烈。夫秋。刑官也。於時爲陰。又兵象也。於行用金。是謂天地之義氣。常以肅殺而爲心。天之於物。春生秋實。故其在樂也。商聲主西方之音。夷則爲七月之律。商。傷也。物既老而悲傷。夷。戮也。物過盛而當殺。嗟乎。草木無情。有時飄零。人爲動物。惟物之靈。百憂感其心。萬事勞其形。有動于中。必搖其精。而況思其力之所不及。憂其智之所不能。宜其渥然丹者爲槁木。黝然黑者爲星。星。奈何以非金石之質。欲與草木而爭榮。念誰爲之。賤賊亦何恨乎。秋聲。童子莫對。垂頭而睡。但聞四壁蟲聲唧唧。如助予之歎息。

圓丘賦

宋 祁

若夫天地之區。旣奧而腴。王者所以作京焉。神明之隲。匪攻而築。上帝所以定位焉。我朝之擁歸運也。譏函鎬保界之陋。鄙周維淳濟之淵。乃据梁之芒芒。偵河之渾渾。畫邦畿之千里。于以宅天子之尊。然後翼翼乾乾。作邦孚先。禘其祖之所自出兮。遂有事乎昊天。占國南之七里。得高丘之崛然。自乾寗之初。闢保

坤靈而不遷。藏偉兆於遐葉。震元符於茲年。此烈祖所以哀神之對。神宗所以旅物之獨。真考之所陟降。丕后之所周旋。藹列聖以烝衍。總萬靈而賓延。翕降監之厚福。焯巍巍而亡原。則晉考卜乎委粟。漢勝飾乎甘泉。曾不得望我之末光。絕炎況並驅而齊肩哉。敢問圓丘之狀也。其何如矣。廣矣大矣。略可詳矣。上崔嵬以鬱律兮。外博敞而神麗。迺朱鳥以高蟠兮。槩瑤魁而邪峙。休氣回復乎其椒兮。榮泉滋滲乎其趾。魍魎不若泯伏於其遠兮。神明肅然離衛乎其邇。於是攘之辟之。其蓄其翳。修之平之。其坎其曠。上三陔以積高。外四門而疏陸。列道糊頰。重營界紫。無縮板以作勞。不藉廟而昭侈。因天質之自然。非人力之攸致。峯兮似高山之在周邦。截焉若隆雝之亘汾澗。及夫涓日肇祀于郊之宮。陶匏尙質。金石有容。璧奠褥以蒼蒼兮。鼎歃雲而降隆。百神服食。曼衍乎坎間兮。有司守燎。粲爛乎壇中。穆穆天子。相維辟公。成盛氣以彊力。相升降兮。穹崇披大紫之莫莫。招翠黃之雍雍。合蕭薈於欽柴。曳高煙乎璇穹。塞天淵以隤祉。奮光明於亡窮。踈乎已事。罔有不恭。若乃自內出者無匹不行。自外至者無主不止。故我率乎祖而推本。正乎位而升配。使禮動乎上。則神饗。樂交乎下。而人喜。畢九州以獻力。罄一純以盡意。君子曰。觀天下之物。無以稱其德。所以因天事。天取至誠之爲貴。則斯丘也。實國家集福之清場。事神之寶時。國聽之所馮厚。靈心之所翔會。駐魄寶於鸞歛。賁黃圖之方志。彼草樓列仙之館。像設梵王之廬。豚蹄種祠之託。鱗長九淵之居。皆祠官之細。祀族之餘。尙且落成者鼓吻而極嘆。乞靈者舐筆而爭書。叛宣父以語怪。溺丘明之好巫。獨圓丘歸而遺美。寧儒者怡僅而未之思歟。遂作頌曰。屹圓壇。赫眇眇。大盤盤兮。君之升。帝是饗。牽而安兮。禮無違。福不回。委如山兮。聖繼聖。萬斯年。長監觀兮。

右史院蒲桃賦

宋 祁

癸酉之仲夏。予授詔修書。寓於右史院。紉繹多暇。裴回堂除。有蒲桃一本。延蔓疎瘠。垂實甚寡。予且玩且惜。以爲省戶凝切。禁廷敞閑。人不天摧。禽不棲啄。與平原槁壤有間。匪灌叢宿莽所干。而條悴葉芸。不爲時珍何邪。得非地以所宜爲安。根以屢徙爲危。封殖浸灌。信美非願。因爲小賦。代其臆對云。

昔炎漢之遣使。道西域而始通。得蒲桃之異種。偕苜蓿以來。東矜所從。以至遠。遂徧殖乎離宮。去葱雪之寒鄉。託崑函之福地。並萬寶以均載。歷千古而舒粹。玩之可使蠲煩。食之足以平志。不由甘而取壤。迺因少而獲貴。鄙柚苞之輕悅。賤蔗境之塵滓。粵何人斯。殖我于茲。託深嚴之祕署。切轆轤之文棖。培孤莖以膏壤。引柔蔓乎標枝。泉石渠以蒙浸。露金莖而泣滋。布涼影於宮月。獵重葩於禁颺。蔽周廬之岑寂。隱肅唱而逶遲。彼得地而逢辰。宜欣欣以茂遂。奚敷華而委質。反慘慘而茲瘁。乏磊砢於當年。讓紛華於此世。是必野芟非曾掖之玩。非實異太官之味。困枳橘之屢遷。嘆匏瓜之徒繫。亦猶鬱柳有性。不願栝樵之華。海鳥取容。非榮觴酒之饋。胡不放之巖際。歸之壠陰。上敷榮於膠木。外結庇於緇林。蒙煙沐霧。跨野彌岑。豐茸大德之谷。棲息無機之禽。保深根以庇本。誠繁實之披心。窮天年以善育。奚斤斧之可尋。亂曰。階藥街華堂。萱爭麗枝。以萬年爲名。木以五衢稱瑞。是皆託中涓以進。孰荷鉤盾之爲地。結賞心以自如。非孤生之所冀。

詆仙賦

宋 祁

予旣守壽春。覽郡圖得八公山。故老爭言。山上有車轍馬跡。是淮南王上賓之遺。耕者往往得金。云丹砂

所化。可以療病。因取班固書葛洪神仙二傳。合而質之。嗟乎。人之好奇而不責實也。尚矣。而洪又非愚無知者。猶憑浮證。僞況鄙人委巷語耶。作詆仙賦。

憫茲俗之鮮知兮。徇悠悠之妄陳。常牽奇以合恠兮。欲矜己以自神。操百世之實亡兮。唱千齡之僞存。彼

淮南之有將兮。固殊刺而殞身。緣內篇之丕誕兮。眩南公之多聞。謂八人者語王兮。歷倒景而上賓。卽玉

匕之神藥。託此謳乎霄晨。王負驕以弗虔兮。又見譎於列真。雖長年之彌億兮。屏帑偃而念愆。葛傳云。仙

安不恭。乃謫守郡。都廟後爲散仙。塞斯事之吾欺兮。聊反復乎遺言。號聖仙之靈稟兮。宜常監德而輔仁。不足察王之倨

貴兮。遠引內於天門。已乃悟其非是兮。胡爲賞罰之紛紜。寧仙者之回惑兮。無以異乎常人。國爲墟而嗣

絕兮。載遺惡而不泯。故里盛傳其遺金兮。證礎石之餘痕。武安陰語而前死兮。更生僞鑄以贖論。彼逞詐

以罔時兮。宜自警於斯文。

憫獨賦

宋 祁

憫前人之抗志兮。雖有適而遂迷。特我醒於皆醉兮。矜獨是於衆非。吾固知高木不得林兮。孤音鮮與之。諧。特立廢於曹跼兮。一妍掩於萬蚩。舉吾黨以同寐兮。挈予覺其何之。越家祝而訶冕兮。裸戶裯而晒衣。奮單辭以正議兮。安足救輿談之參差。發介瞭之精覽兮。何預羣蒙之佞嬉。屈自高以赴淵兮。夷已信而餓薇。波潰流而無益兮。返蒙謹而被訾。今吾有道於此兮。請質古而瑩疑。狂者以不狂爲狂兮。飲泉流而後宜。非聖者以聖爲非兮。均獵較而免譏。挫爾方而殺鹿兮。常偶欣而儻悲。保獨行以中晦兮。庶明哲而爲期。

靈鳥賦

梅堯臣

鳥之謂靈者何。噫。豈獨是鳥也。夫人之靈。大者賢。小者智。獸之靈。大者麟。小者駒。蟲之靈。大者龍。小者龜。鳥之靈。大者鳳。小者烏。賢不時而用。智給給兮爲世所趨。麟不時而出。駒流汗兮擾擾於脩途。龍不時而見。龜七十二鑽兮。寧自保其堅軀。鳳不時而鳴。烏鴟鴞兮。招唾罵於邑閭。烏兮事將兆而獻忠。人反謂爾多凶。凶不本於爾。爾又安能凶。凶人自凶。爾告之凶。是以爲凶。爾之不告兮。凶豈能吉。告而先知兮。謂凶從爾出。胡不若鳳之時鳴。人不怪兮。不驚。龜自神而刳殼。駒負駿而日役。體劬劬兮。喪精烏兮。爾靈。吾今語汝。庶或汝聽。結爾舌兮。鈐爾喙。爾飲啄兮。爾自遂。同翺翔兮。八九子。勿噪啼兮。勿睥睨。往來城頭。無爾累。

凌霄華賦

梅堯臣

厥草惟夭。厥木惟喬。草有柔蔓。木有繁條。綠根兮附帶。一作實布葉兮敷苗。朱華粲兮下覆。本幹蔽兮不昭。嗟兮。一作乎。此木幾歲幾年。而至於合抱。夫何此草。一旦一夕。而遂曰凌霄。是使藜藿蒿艾。慕高豔而仰翹翹也。安知蘋藻自潔。蕙蘭自芳。芙蓉出汗而自麗。芝菌不根而自長。或紉珮帶。或采頤筐。或製裳於騷客。或登歌於樂章。故得爲馨爲薦。爲嘉爲祥。皆無附著。亦以名揚。奚必託危柯而後昌。吾謂木老多枯。風高必折。當是時。將恐摧爲朽。萎不復萌蘖。豈得與白卉並列也耶。

柝欄賦

劉敞

圓方相摩。純粹精兮。剛健專直。交神靈兮。馮翼正性。柝欄榮兮。中立不倚。何亭亭兮。受命自天。非曲成兮。

外無附枝。匪其旁兮。密葉森森。劍戟鏗兮。溫潤可親。廉而不傷兮。雪霜青青。不畏彊兮。壽比南山。邈其無
疆兮。被髮文身。何佯狂兮。沐雨櫛風。蹇無所妨兮。苦身克己。用不失職兮。摩頂至踵。尙禹墨兮。黃中通理。
類有得兮。屹如承天。孔武且力兮。懷其無華。不尙色兮。表映衆木。如繩墨兮。播棄蠻夷。反自匿兮。遁世無
悶。曷幽嘿兮。明告君子。吾將以爲則兮。

離髮賦

劉 敞

抱戚戚以長處兮。弔惻惻以自眎。魂離離以駿邁兮。精蒙蒙而就翳。氣質亂以轆轤兮。形爽沕而荒瘁。信
民生之多艱兮。伊天命之方摯。知隕性之無續兮。畏忝經而遺義。日月騰以漂忽兮。春與秋其狎至。卒撫
心以抑志兮。諒投艱以遺大。胄帝堯之餘烈兮。歷三正而相仍。下天漢而逾熾兮。啓東藩於大彭。胡亂夏
以泯楚兮。賢辟世而迅征。溯江介以幽處兮。汜三徙而弗聲。求王明而受福兮。祖來儀於太平。自彭城以
南皆江友羣龍以登績兮。勅休命於遠夷。兆別子於都邑兮。更名數於京師。繇清白以象賢兮。爰頽慶而歷
茲。馭長策以遙駿兮。周窮荒而不疑。敵輸歡以馴教兮。棘變服而來娛。中心實使生外兮。謾大道之難推。
惟保姓之蟬聯兮。上參差以千歲。裕後葉之孔艱兮。憚情申而事廢。志激揚之未究兮。不克荷而爲罪。誨
丁寧之在耳兮。洵僂俛而違殆。忽馳思於昊天兮。又寤擗而自懟。發與齡以交永兮。且命訴而罔害。涼不
肖而遭愍兮。曾夫人之髮髯。原本始而罔豫兮。心涓湯以崩潰。覩履厚而戴高兮。顧久生其誰賴。願去人
間以超舉兮。復供養以弭憂。苟一覩於顏色兮。豈餘生之足留。中怵忽而自失兮。恭聞命乎前脩。天不可
以忌兮。道不可與謀。毋苟襲匹婦以圖諒兮。固將徇齋父以寡尤。

石室賦

狄遵度

石室之幽。古城之陬。煙剝雨落。苔萃薜稠。斷勁頑而植立。攢衆磊而互鳩。齧首屹以孤挺。虹氣攄而外浮。謂築金之用侈。陋銘燕之積偷。傑立西土。邈視千秋。何愛人而思樹。卒頽否之靡由。室之經始。請稽其紀。其人則遠。其室甚邇。其室也奠。維人之繫。其繫維何。維德之被。其被維何。撤華於裔。棄民而夷。嘗亦聞之。易夷而民。侯其偉而。惟蜀之啓。邈乎遠矣。會牧野而微盧。與同導嶧。冢而櫟。棹斯泊。或斃力而啓其隘。或窮兵而伐其地。東抗諸夏之喉。右得秦原之臂。地不爲之限。天不設其閉。氣清肅而休晏。物菴茂而被麗。柰何椎髻之與雜。卉服之與俱。貪其地則地或爲己有。視其民則曰非吾徒。己雖善忍。彼亦何辜。有大人者。民之是圖。視爾之鄙。嗟予其吁。曰吾不智。將彼之愚。教而有類。聖其欺予。解辯而冠。削衽而裾。疏之濬之。使蕩其滯。培之養之。使豐其枯。誘而利之。麾督而趨。圓而規之。不熱而拘。乃豫乃詠。以嬉以娛。處乎其變。泱乎其舒。始也夷貉之弗如。今也鄒魯之靡殊。始也自我。今居居。今也視我。今媯媯。孰我有德。室其視諸室之奠兮。知公之德。安以肆兮。室之堅兮。知公之德。純以一兮。室之磊兮。知公之德。傑以卓兮。室之魁兮。知公之德。碩以鉅兮。德不可忘。室不可墮。墮其室則胡以見公之德。泯其德則胡以示後之規。孰治其業。我將趨之。孰締其跡。我將經之。故教無俗兮。不變俗。靡教兮。弗移。曰吾之智。斯亦其宜。曰彼之愚。故甚之欺。況乎位天下之正位。居天下之廣居。其所爲民。皆二帝三王之故俗。其所治具。皆二帝三王之成謨。法不更造。事不更謀。曰是懵者。奚足以教。則斯室也。其謂何乎。

鑿二江賦

狄遵度

予始至蜀。詢諸古之賢於蜀有功者。以爲無出文翁上者。於是作石室賦。已而復聞有李侯者。於蜀有大功焉。二人者用力於民。雖有勞逸。然參其功亦其等耳。於是又爲之賦。鑿二江。使蜀之民知蜀之所以爲蜀。皆二公之力乎。

嗚呼。吾聞魚□□降秦太守之前。蜀之爲國。不幾千萬年。方二江之害被茲土。以禹之功不是。施兮。嗟後來亦奚言。彼民之昏溺兮。無乃得之於天。不能遷土而改宅兮。其流漂亦誰冤。勁崖挺以中亞兮。激狂瀾而右旋。橫驚折走莽。知其所之兮。吼穹谷而下穿。蛟鼉鼈蟹。呀以相濡兮。何允蠢而緣延。喙膚吮血。沸以咀嚼兮。咸飶腐而飽臚。萑蒲菱芡。紛以相被兮。汙百頃之良田。土不藝而民無所食兮。孰與奏其艱鮮。民之害固不可終極兮。歷百千萬世。天乃授之以賢。曰噫。中國之無人。遂使民至於此焉。天之生斯民兮。固使之食飽而居安。降巨蓄以漂之兮。天之意不然。水之性固就下。善利兮。決之則宣。濬九川而距四海。亦奚艱。且九載之孜孜。民不憚苦而訴煩。蓋因利而爲利兮。勞之在先。不忍一勤其力兮。乃至驚萬世而害弗捐。胡不浚發其利源。剷削其害根。巨崖剖以罅裂兮。耒耨乾而陷坤。怒石奮以失墜兮。吁電走而雷奔。蕩重淵以傾覆兮。喪百恠之精魂。雲轉霧溢。盤薄蹙踏兮。注壑于其間。寂寥歲漫。肆以長往兮。若氣散於坯渾。決其餘以旁漑兮。居其側數百頃。皆膏腴之上珍。民降丘而下宅兮。若蟻聚而蜂屯。則幾年幾世之積害。一日刷去兮。不啻捐芥而蕩塵。嗚呼。蜀之爲國。非地之中。宜乎夷貊之雜處。魚鼈之與同。有李侯者。至。然后別類於水物。有仲翁者。至。然后同俗於華風。然則今所以棟宇而處。衣冠而嬉。皆二公之所翳。若李侯之事。固所莫得而繼。彼仲翁之教。亦何憚而弗爲。嗚呼。以禹之功。至大至神。括六合以橫被。疇有

存而勿論。胡茲爲害。獨不得聞。無乃力所不洎乎。抑亦遺其功於後人。而今而後。乃知民未得所欲。事或有不利。先世所未暇除去。聖人所未及裁制。苟有志於生民。皆吾人之所事。若曰茲事體大。必聖人而后爲。則小子也不敢與知。

交趾獻奇獸賦

司馬光

皇帝御天下三十有六載。化洽於人。德通於神。邇無不協。遠無不臻。粵有交趾。來獻其麟。其爲狀也。熊頸而鳥喙。豨首而牛身。犀則無角。象則有鱗。其力甚武。其心則馴。蓋遐方異氣之產。故圖牒靡得而詢。於是降輅車之使。發旁縣之民。除塗於林嶺之隘。引舟於江淮之濱。曠時月而陟萬里。然後得入覲乎中宸。與夫雕題卉服之士。南金象齒之珍。款紫闥而盆入。充彤庭而並陳。於是羣公卿士。百僚庶尹。儼然垂紳薦笏。旅進而稱曰。陛下功冠邃古。化侔儀極。恭承神祇。嚴奉宗稷。純孝烝烝。小心翼翼。出入起居。不忘於訓。典進退周旋。必咨於軌。則體文王之卑服。遵大禹之菲食。宮室觀臺。無龔刻之華。輿馬器用。無珠玉之飾。遊必備於法駕。燕不廢於朝夕。此皆帝王所不能爲。而陛下行之。尙不忘於怵惕。是以方內乂寧。黎民滋殖。垂髫之童。耳皆習於詩禮。戴白之叟。目不睹夫金革。至於根著。浮流。踐行。喙息。無不翔舞。太和涵濡。茂澤此殊俗。所以嚮臻。靈獸所以來格。雖漢室之初。黑鷗貢於絕徼。周家之隆。白雉通於重譯。殆不足方也。臣等謂宜命協律播之聲歌。詔太史編之簡策。以發揮不世之鴻休。張大無倫之丕績。不亦偉乎。皇帝乃穆然深思。愀然不怡。曰。吾聞古聖人之治天下也。正心以爲本。修身以爲基。閨門睦而四海率服。朝衆和而羣生悅隨。故務其近。不務其遠。急其大。不急其微。今邦雖康。未能復漢唐之宇。俗雖阜。未能追堯舜之

時。況物尙疵癘。而民猶怨咨。朕何敢以未治而忘亂。未安而忘危。享四方之獻。當三靈之釐。且是獸也。生嶺嶠之外。出沮澤之涓。得其來。吾德不爲之大。縱其去。吾德不爲之虧。柰何貪其琛寶之美。悅其鱗介之奇。容其欺紿之語。聽其諂諛之辭。以惑遠近之望。以爲蠻夷之嗤。不若以迎獸之勞。爲迎士之用。養獸之費。爲養賢之資。使功烈烜赫。聲明葳蕤。廢耳目一日之玩。爲子孫萬世之規。豈不美歟。於是羣臣拜手稽首。咸曰。此盛德之事。臣等愚戇所不及。陛下誠有意於此。臣等敢不同心竭力。對揚而行之。皇帝於是御械。樸之篇。觀大畜之繇。延黃髮之儒。顯巖穴之秀。善有可旌。無間於幽遠。言有可采。不棄於微陋。位匪德而不升。官無能而不授。使稷契居左。臯夔立右。伊呂在前。周召侍後。相與講經藝之淵源。覽皇王之步驟。求大化之所未孚。訪惠澤之所未究。興民之利。若療夫飢渴。除民之害。若憂夫疾疢。賜予簡而功無所遺。刑罰清而姦無所漏。浮費省而物不屈於求。須苛役蠲而農不妨於耘耨。使之夏有葛而冬有裘。居有倉而行有糗。絲纊之饒。足以養其老。甘脆之餘。足以慈其幼。地不加廣而百姓足。賦不加多而縣官富。道塗之人。恥爭而喜讓。閭閻之俗。棄滴而歸厚。戶知禮義之方。人享期頤之壽。然後旃裘之長。頓頽而嚮服。祝髮之渠。回面而奔走。靡不投利兵而襲冠帶。焚僭服而請印綬。於是三光澄清。萬靈敷佑。風雨時若。百稼豐茂。休氣充塞。殊祥輻湊。甘露霖霖於林薄。醴泉鬻沸於嵌竇。平虛羅植於階阨。朱草叢生於庭雷。鳳凰長離駢枝而結巢。黃龍騶虞羣友而爲畜。由是觀之。則彼裔夷之凡禽。瘴海之怪獸。皮不足以備車甲。肉不足以登俎豆。夫又何足以耗水衡之芻。而污百里之囿者哉。

思歸賦

王安石

蹇吾南兮安之。莽吾北兮親之。思朝吾舟兮水波。暮吾馬兮山阿。亡濟兮維夷。夫孰驅兮亡幟。風翛翛兮來去。日翳翳兮溟濛之雨。萬物紛披蕭索兮。歲逶迤其今暮。吾感不知夫塗兮。徘徊徬徨以反顧。盍歸兮。盍去兮。獨何爲乎此旅。

歷山賦

王安石

餘姚縣人有與季父爭田于縣于州于轉運不直提點刑獄令余來直之將歸閔然望歷山而賦之歷山在縣西上虞縣界中或曰舜所耕云

歷山之峨峨兮予汝耕之孰汝疆之此匪予私云然兮誰汝使子人之子兮余師歷山之峨峨兮則維其常人之子兮云曷而亡云曷而亡兮我之思今孰繼兮我之悲嗚呼已矣兮來者爲誰

事君賦

王回

北面以受命兮命同而功則異矢中心而自贊兮非有道曷明其所爲蓋圖國之在人兮我得之故爲貴若貨利之不敢愛兮奉君欲之所便役股肱而忘死兮濟君難於已然豈不輸忠而塞報兮柰何猶憾於天倬我圖而孔臧兮志常足而名全閱萬物之至衆兮孰一人之至寡呼同德以佐佑兮賴先權於取捨張有司而賦政兮寄聰明於夙夜儻虛其人而瘝厥官兮雖有食而誰暇彙以進夫賢能兮罄崑澤而無留但見朝大夫士兮暨四方之守侯咸顯任其所知兮迓交泰之時休君無爲而垂拱兮我亦退食而優游昔重華之弼唐兮拔嶽牧與禹稷文命躡其近武兮晤臯陶而謨九德摯虺夾以相湯兮美遂良而舉直文公作周衡兮尙勤訓於三宅其誠可薦於天地兮況我民之馴格君臣享其淑問兮詒萬世之矜式

亞斯之不敢緩兮。亦何世而無人。隨小大以成功兮。但挾霸而未純。諒要道之自然兮。如歲運於陽春。迷
咫尺以它之兮。固治亂之所分。臧仲之蔽展禽兮。坐掛譏於竊位。公孫託擯於仲舒兮。衆交詆其疾忌。夫
豈不念於善傳兮。反貪巧而速累。曾莫望於貨之徒兮。猶可以逃罪。彼匠者之構廈兮。操斧墨而自能。使
榱桷老於深林兮。斧墨具而焉程。惟得人而事君兮。乃受命而有成。感先儒之話言兮。聊頌箴而一明。

宋文鑑卷第四

賦

抱關賦

王回

駟不及舌賦

王回

責難賦

王回

愛人賦

王回

大報天賦

范鎮

鴻慶宮三聖殿賦

劉敞

秋懷賦

劉敞

抱關賦

王回

嘉祐五年。回始仕。爲衛真主簿。日負吏責。憫己之不如古人也。作抱關賦。

抱關之無責兮。聊可充吾食兮。匪可食兮。吾何易兮。抱關之無愧兮。聊可由吾仕兮。匪可仕兮。吾何累兮。抱關之無悶兮。聊可託吾遯兮。匪可遯兮。吾何慙兮。

駟不及舌賦

王回

彼駟能行。駸駸萬里。此舌能言。人纔聞耳。萬里遠矣。駟行有疆。聞耳甚微。舌言無方。六轡在手。縱之吾游。

見險逢艱不可控留。一出諸口。死傳吾志。善惡吉凶。孰追孰避。蓋古君子取物以箴。學士誦焉。可毋慎乎。

責難賦

王回

臣卑而君尊兮。侔地道之承天。北面贊以伏朝兮。南面受之偃然。役股肱於夙夜兮。須有命而後虔。含厥美以自忠兮。避成功而不敢先。何責善於難行兮。奄恭名而獨傳。蓋曰善之爲猷兮。匪身修而弗克。五事生之所稟兮。覺初微而漸頹。儻一失其本源兮。外物來而橫逆。況宅勢於人上兮。百度叢而歸責。治則身安而名榮兮。亂甚者喪其家國。賢臣出而登用兮。爵旣好而祿又豐。師保阿焉受教兮。箴諫謹於羣工。匪聖法而不敢述兮。推天命於始終。使吾君至誠兮。執忠信以自主。使吾君達其所忍兮。仁無不恕。使吾君恥不若先王兮。遵義之路。使吾君不敢慢於匹夫兮。禮乃大具。使吾君察天下之理而無鑿兮。智足以成務。勤君之思而劬君之力兮。誰謂吾倨。蓋志行則爵祿可報兮。否則遁而去。昔舜禹之相堯兮。勗著於典謨。商摯慕其遺風兮。引撻市而爲虞。說冢宰於武丁兮。繩正木而靡渝。周公之告孺子兮。揚文武之永圖。召伯又歌乎公劉兮。美厚民而匪居。雖孔孟之游於衰世兮。固守經而嚴如。宜其名實之一揆兮。彼興廢何區區。後千載豈無臣兮。忘鑽仰於我極。逢君欲以就利兮。凡枉尋而直尺。量君才爲不及兮。聊順時而姑息。詆高論曰迂闊兮。喜近己而循迹。嗚呼。君名貶於雜霸兮。專頌美於在昔。臣不恭莫甚於此兮。徒沒齒而愧惕。竊獨嘉夫魏公兮。沃唐文而迓衡。知正己而民服兮。破俗辨之刑名。旣柔遠而能邇兮。尙惜其學略而功速成。作正位之儆戒兮。雖芻蕘者亦聽。匪吾言之能賦兮。唯尙文之易明。

愛人賦

王回

假天民之秉彝兮。同懿德而自好。縱百骸以徇物兮。義與利其殊報。彼君子兮。唯先覺是號。故忠恕以愛人兮。捨元元其焉肖。竊誦夫曾氏之求志兮。忘違禮而寢於大夫之簣。感童子之關諷兮。雖疾病猶扶而反席。元與春務養吾欲兮。何屑屑而姑息。詒話言於一朝兮。可推而措諸靡極。蓋曰德之爲物兮。在己而不在他焉。其形輜於鴻毛兮。其力重於太山。吾人所以相保而生死兮。固賴此而能然。俾各達其常心兮。因厥類區而復遷。孝莫大於尊親兮。不格姦於幾諫。慈莫隆於燕子兮。擇明師而講善。忠莫美於致君兮。專責難於可願。禮莫隆於任臣兮。敕欽職而有間。莫戚於夫妻之際兮。風雖鳩而誰溷。莫孺於兄弟之間兮。泣關弓而弭怨。莫樂於朋友之交兮。競切磋而成信。其餘泛吾義之所及兮。亦應乎求而敢倦異。此則陷父於惡兮。晉申生纒諡爲恭。納寵孽於驕奢兮。衛莊侯卒覆其宗。逢主欲以厚斂兮。冉求服鳴鼓之攻。王僚試於私人兮。形變雅之大東。恣同床之干政兮。嬉姐繼以興戎。小不忍於拂母兮。鄭克叔而俱凶。損友之三科兮。匪孔門之所容。況巧言與佞色兮。實媚衆以雷同。嗚呼。是非之甚明兮。成敗亦不爲効。歷萬古而猶惑兮。寧醉昏而夢未覺。惜勞心而日拙兮。竊方循理而造要。庶無忝於曾氏之言兮。聊矢賦而彌邵。

大報天賦

范鎮

大宋七十有二載。符節合於聖神。陶鈞運於真宰。化至而乾用九。令行而風不再。泰山四維兮。固基圖而靜寧。黃河一清兮。撫期運而茂對。元尊降休。其如響。富媪効珍。而弗愛。星氣交見。景炎青赤之光。魚馬兩至。道出東西之海。於時百靈會鈞天之游。萬物極崇丘之大鑿。井者罔識帝力。仰益者不知天蓋。以上方

游神治古之表。垂意幾成之會。道皇極以甚夷。基太平而無外。重茲盈成。罔或遑怠。若曰時靡愆伏。物不疵癘。協氣洪鬯。而融融無際者。上穹之保艾。邊鄙不聳。干戈倒載。生靈相與。而謹然於內者。三后之大賚。按物理以順考。曾朕躬之弗逮。不有反本之報。曷爲含生之賴。況夫事具往聖之行。文備前世之載。媿庭有六宗之禋。周家有始祖之配。書以巡嶽而用事。禮以掃地而展采。總條貫於先猷。赫聲文乎當代。上一其唱。下百其響。伯夷秩宗之典。叔孫奉常之掌。咸謹職以先次。率參謀而來上。僉曰。用日之至。吾道之長。就國之南。吾君之嚮。可以爲人而祈福。示聖人之能饗也。涓辰之良。旣如是。講儀之盛。又如彼。將命以方底。飛文以疾置。鼓先令於民聽。俾咸知於上意。西踰月毳之垠。東走天池之紀。北窮祝栗之野。南極濮鉛之地。雷出而奮豫。風興而披靡。穹居卉服。革體木薦之會。鬢首貫胸。離身反踵之帥。尋聲望景。知中國之有至仁。梯虛航深。示戎狄之無外事。順走我轍跡。服馴我邊轡。迺有變觥共觝之獸。赤汗赭沫之駟。浮琛沒羽之珍。文鉞碧砮之異。諸福之物。倜儻奇偉。衆變之狀。燦爛譎詭。按圖謀而未書。歷封禪而不至。滔滔焉。峨峨焉。來助祭者。波委而嶽峙。吾皇游巖廊。操絕瑞。嘉聞聲教之遠。樂觀儀物之備。迺飭四方。近逮周行。搜傑索俊。提忠挈良。相與齊於螭螭。蠓蠓之中。思所并而周流。常羊者。已在出警之先期也。闕觚削其如倚。鋪首呀而欲驥。行幄黝而下垂。樂宮帆其高張。八校拱著。五旗司方。禮器之葳蕤。軍裝之陸梁。錯文以章藻采兮。四會五達之莊。旣法從之。矧飭。倏呼鞭之對揚。神扶絳旻。乾行東箱。左黃鍾兮。五應以俱動。前式道兮。三候而相望。始乘輿也。顛顛昂昂。奮至德之光。大明登兮。重昏破而羣陰藏。旣遵途也。秋秋踰踰。走萬人之望。駭颺馳兮。浮埃沉而瑞氣翔。參忠信於倚衡兮。遠何適而不臧。摠德法於御勒兮。大何爲

而不防。嶽然其不動兮。躬自厚而矜莊。春然其太和兮。躬不違而滋涼。顯儲思於逆釐之事也。徑息駕乎列仙之場。儼陟降以肅潔兮。杳悟靈於忽恍。平款謁之辭。稱畢孝思之容。外溢葦然如傷。沛然不懌。念報天之罔極。顧履霜而懷惕。莫重乎禮經之五。以觀乎世廟之七。內則樂穆羽舞。旄狄薦苾芬。儀赫奕。遲奉乎明靈之來格。外則熊司旗。虎視戟。威振厲。氣勃鬱。肅陳乎游徼之駢塋。俄而傳呼旦之聲。嚴出廟之蹕。眄重闈以南直。屈夫禮神之室。觀夫涂大朱以洞闢。壇八觚而翼騫。颯紳綏之絳纓。頰貂蟬之葱芊。上摩星以旖雲。下藻野而縟川。聖人凝旒以則數。薦璧而象圓。樂六變而導和。爵三獻而告虔。百神愛瑞以祖洽。四方承宇而來旋。啓騰管之芬膏。焜樵蒸於高煙。杳馨明之升聞。藹嘉休而肅延。迴五輅兮清道。御兩觀於中天。歌塗巷而沸湧。觀堵墻而駢填。或陰而霞紛。振衣而警袂。方冬而暑盛。疊跡而側肩。靚粧千車。迴轅衝軻。岌若移山之行。隱如奔雷之聲。礚礚礚礚。以拱乎神庭。鐵衣萬騎。奮蹠橫逸。轟如積雪之釋。迅如衝風之疾。宛轉絡繹。以環於帝室。嚴辦兮中外。臚句兮上下。繩鶴馭以飛書。絙雞竿而肆赦。縱係縲以畢出。普疵吝而一灑。重離之曜。大繼明以照四方。泰山之雲。不崇朝而徧天下。飭飫賜。沐純嘏。受釐而延膝席。飲福而奏需雅。太室之聲。曼延於壽曆。覆孟之安。盤固於宗社。彼甘泉汾陰。后土之祠。交門竹宮。神光之拜。或孜孜於曲請。或屑屑於未戒。隘哉陋乎。曾未知福含生。懷萬靈之爲大也。有一二眉壽。顧謂臣曰。子游都而盛其際。吉其逢者。所謂觀國之光。利用賓于王矣。亦嘗知盛際之所自出。吉逢之所由來者乎。子少留。吾其語汝。夫聖人之將有爲也。必本於仁義。聲而爲樂。文而爲禮。柄而刑賞。統而祠祭。崇讓以樹之。懷遠以固之。作德以茂之。此古先之能事。教化之肇基也。故其始下詔。則有司指圖有經。叩天進辭。

相與上乎號榮者。當宁卻而不名。斯崇讓之至誠也。將僕儀。則百蠻款塞。移珍謁。謹象譯。厥角于北闕者。本朝羈而不絕。斯懷遠之上烈也。既已事。則縣官去。煩削密。輕徭緩租。驅躋於仁壽者。庶黎愉然而宥。斯作德之洪覆也。夫一舉而關衆目。非曰躬聖發憤。其孰能大圖而殫究。子蓋亦按胥庭之圖。披羲農之籙。援結繩造契之具。迹卷領垂衣之躅。料平基緒之馮厚。準元精之回復。揚波以挹其腴潤。摘芳以舉其稠緝。然後據文心。散辭氣。伏天庭而淮牘。臣蹶然而仰。曰。富哉言乎。微丈人。後進生。其不識王澤之滲漉也。謹拜手而系曰。赫赫鉅宋。體元垂統。升中而奉兮。恢恢大圓。應聖何言。隕社以蕃兮。吾皇之隆。彼蒼之崇。合符無窮兮。

鴻慶宮三聖殿賦

劉敞

臣伏見陛下。追述祖考。崇奉明祀。新作三聖殿。以昭孝明功于天下。臣以文學中第。太常試官。祕書。目覩盛事。不敢以鄙薄自絀。輒作古賦一篇。以歌詠盛德。昔靈光景福之作。世稱其美麗。然其所謂壯大。不出乎彫刻畫績。文彩之煌煌而已。又盛道工人之巧。民力之衆。材木之多。金玉之偉。臣以謂聖王有作。則必智者獻其巧。壯者輸其力。山林不敢愛其材。府庫之聚。皆所供億也。是物理之常。不足以夸大。臣愚竊陋之。若夫天命廢興之際。聖王授受之符。非敏智通達。未有能究知其始終者。固難爲寡見淺聞者道也。臣竊大之。是以略所陋。而張所大。不敢仰希風人雅頌之列。庶幾有其志云爾。蓋上帝之所選建。明聖命以天位者。乃所以享德而報功焉。未有德盛於前。功播於後。而其子孫寂寥。千載無聲者也。賢哲所談。六籍之云。德莫著於有虞。功莫隆於五臣。禹平水土。夏姒以家。司徒后稷。是教是食。肇商興周。歷載累百。臯陶

大理五刑以明于其苗裔。乃興于唐。若夫薰淳耀以攸司。奏庶民之鮮食。焚山烈澤。害服妖息。鳥獸咸若。草木允殖。固伯益之力焉。天報以位。俾秦周繼于其子孫。誣祖不紹。去火卽水。叛禮尙刑。法以慘急。然猶兼六國一天下。而不知變于初二世以斃。非天不相朕虞之後。乃其否德。得罪于祖而斷棄也。惟伯益之功未報。是以大命復集于趙氏焉。五代喪德。九土分裂。海水橫流。民用墊溺。鳥獸昌熾。黔首失職。滔滔惑惑。蓋若洪流之未闢。於是太祖乘火而帝。繼益之功。天胙吉土。曰惟商丘。是爲星火。大辰之居。亦曰明堂。布政之由。出潛離隱。或躍在淵。以有九有。百度正焉。削禍戡亂。出民塗炭。風揮日舒。天地正觀。荆燕吳蜀。楚越井冀。懾威懷仁。奔走失氣。嘯強者執服。柔從者加賜。太宗承之。眞宗成之。登封降禪。矢直砥平。巍巍乎邈三五而儔儷。彼漢魏之瑣瑣。曾何比京。夫伯益始掌火而底績。而宋以火帝興于火墟。天之報施。豈不昭昭可推而類也哉。且夫積功以凝命。而創業因物以胙土。由土以建號。樂以反初。禮不忘其本。是故作于原廟。建之別都。三聖鼎列。大廈以居。以答景貺。以昭成功。俾子孫知厥所由。億兆仰德而不窮也。厥後烈風雲雨。電雷震曜。儆戒于下。濫炎流燒。天子愴于大異。反己正德。伏念七年。乃其有得。曰天以德訓予。而以威震予。依類託諭。予敢不信。夫政不變。不足以日新。禮不修。不足以化民。天之示人。若曰。政禮之敝。雖祖宗之爲。猶當勿憚乎改更。於是詔三事。飭九卿。和布于舊。載損載益。以答天誠。以舉聖職。夫旣天行而日白矣。乃復闕宮獎夫神衷。三后在天。對越上穹。經之營之。不日成之。閎偉奇麗。所以使宮寢之勿躡也。清閑窅密。鬼神之所都也。絜百圍而置楹。兮。度千仞以架棟。擇一木於萬章兮。顧餘羨者猶衆。般倮獮人之儔。獻巧而林立兮。莫不心競而賈用。亘長廊其如城兮。闢重門其似洞。變拱粲其如星兮。侏儒屹

其承重如翬斯飛。如鳥斯革兮。誠可慄其將動。闔陰房之密靜兮。雖六月其必寒。闕陽榮之敞麗兮。蓋中夜而已旦。涉廣除而徑上兮。每百尺而一級。歷青珉之瑩滑兮。曾不得而側立。顧風雨之在下兮。足以避夫燥溼。良非人力之所爲兮。宜鬼神之攸集。於是使夫設色之工。後素之巧。想像形容。圖寫必効。夫其龍顏日角。天質之顛昂兮。臣乃今知真人之異表。於是駕鑾輅。發玉蚪。千乘萬騎。雲動而景附兮。想平生之豫游。旂常繽紛以絕翕兮。鍾鼓軒轟。簫管發而啁啾。雜魚龍之奇技兮。蜿蜒曼延於道周。百神紛而並迎兮。出閭闔而御夫龍舟。爾乃川后靜波。屏翳息風。舳艫相銜。若複道之延屬兮。亘千里而相通。百工備官而夙設兮。棹夫謹呼而奏功。惟吉行之五十兮。餘日力而靡窮。既屆既止。威儀若初。以幸夫壽宮。乃卽前楹。以脩祀事。威神如在。望之可畏。殫金玉以備用。罄飛潛以薦味。帷帳筦簞之安肆。几杖筆研之儲侍。靡一物之蓋闕兮。所以廣孝思而盡心志。守臣侍祠。罔不盼飭。既事而旋。闕而莫覲。列仙之儒。倥傯之倫。迎神頌祇於其側。若夫祝融重黎。相土闔伯。固已喜動乎魄。情見乎色。護清蹕而唏盛德也。巍巍大哉。不可得而記已。且夫天命之不忘。人生之大寶也。祖宗之有繼。子孫之勿替也。茲聖王所以繼統垂業。超商邁周。卹嗣錫羨。貽厥孫謀。使萬有千歲。得以晞風而承流也。遂作頌曰。崇崇商丘。大火主兮。曰宋之興。道是配兮。建邦設都。以有九土兮。有皇上帝。明德輔兮。伯益之功。邈不可忘兮。三聖承承。有烈光兮。奕奕寢廟。神翺翺兮。胥于萬年。尙無疆兮。

秋懷賦

世量力以爲智兮。孰不自師其成心。不強短以彼修兮。亦各濟其所任。蓋周任之明清兮。予嘗服於德音。

劉攽

羌專直其似愚兮。遂底滯而廢沈。惟古人有不遇兮。亦奚慨於斯今。昔旣冠而從仕兮。冀陳力而帥職。何日月之不淹兮。疊疊至乎不惑。世與我其異衷兮。增余懷之默默。數廢日而陪參兮。願自竭而安得。將奔走而及事兮。愧初心而變色。譬游者之無術兮。念愈躁而逾沒。荷衆賢之并容兮。曾介善之不遺。辱興廉之未舉兮。遂以造夫攸司。君之門不可以徑入兮。旣待詔而歷時。唯褊心之狷狹兮。樂繩墨其自持。誠詭遇其有獲兮。雖得獸而恥之。信天命之有在兮。非智勇其孰勿疑。時旣秋而涼風兮。草木落而變衰。皎月麗於西廂兮。蟋蟀迅而鳴悲。閱四序之代謝兮。旣逝者之如斯。悼我心之弗獲兮。起惆悵而稱詩。

純鬱邑其馮中兮。何鑒寐其弗夷。方永夜之未艾兮。廓靜處而長思。悼既往之弗及兮。慨來今之曷知。緒將絕而復續兮。精發越而淫移。倏四海其再撫兮。泯萬期乎須臾。武勝商而歸周兮。天保定其千億。叔旦兼乎三王兮。仰勤思而有獲。孔潛精於好學兮。致憤懣於無益。樂好善而用魯兮。孟見喜乎顏色。仁弗遇於衛頃兮。願奮飛而不得。翟相氛而見祥兮。獻肇謀乎虞虢。彼遠慮之與近思兮。智與愚皆從其職。嗟民生之多艱兮。羌以心爲形役。君子有不安其命兮。小民有不度其力。非蚊虻之嚼膚兮。曾內懷於大棘。惟昔夢之遽遽兮。旣悵然而獨寤。亮伐柯之不遠兮。何內轆而采固。晞聖人之大覺兮。綿萬世而不遇。幸曲肱而自怡兮。庶無迷於初度。

拙賦

周惇頤

或謂予曰。人謂子拙。予曰。巧竊所恥也。且患世多巧也。喜而賦之。

巧者言拙者默。巧者勞拙者逸。巧者賊拙者德。巧者凶拙者吉。嗚呼。天下拙刑政徹。上安下順。風清弊絕。

洛陽懷古賦

邵雍

洛陽之爲都也。居天地之中。有終天之王氣在焉。予家此。治平歲。會秋乘雨霽。與殿院劉君玉登天宮寺三寶閣。洛之風景。因得周覽。惜其百代興廢以來。天子雖都之。而多不得其久居也。故有懷古之感。以通諷諭。君玉好賦。以賦言。

秋雨霽。日色清。景方出。秋益明。何幽懷之能快。唯高閣之可憑。天之空廓。風之輕冷。覽三川之形勝。感千古之廢興。乃眷西北。物華之妍。雲情物態。一氣茫然。擁樓閣以高下。煥金碧之光鮮。當地勢之拱處。有王

居之在焉。惜乎天子居東都。此邦若諸夏。不會要于方來。不號令于天下。聲明文物。不此而出。道德仁義。不此而化。宮殿森列。鞠而爲茂草。園囿基布。荒而爲平野。鸞輿曾不到者三十餘年。使人依然而歎曰。虛有都之名也。噫。夏王之治水也。四海之內。列壤惟九。而居中者實曰豫州。荆河之北。此爲上流。周公之卜宅也。率土之濱。建國爲萬。而居中者實曰洛陽。灋澗之側。此唯舊都。迄于今日。二千年之有餘。因興替之不定。故靡常其厥居。我所以作賦者。閱古今變易之時。述興亡異同之迹。追旣失之君王。存後來之國家也。噫。太昊始法。二帝成之。三王全法。參用適宜。伊六聖之經理。實萬世之宗師。我乃謂治民之道。於是乎大盡矣。逮夫五霸抗軌。七雄駕威。漢之興。乘秦之弊。曹之擅。幸漢之衰。始鼎立而治。終豆分而隳。晉中原之失守。宋江左之畫畿。或走齊而驛魏。或道陳而經隋。自元魏廓河南之土。植六朝之風物。李唐蟠關中之腹。孕五代之亂離。其間或道勝而得民。或兵強而懼下。或虎吞而龍噬。或雞狂而犬詐。或創業於艱難。或守成於逸暇。或覆餗而終焉。或包桑而振者。故得陳其六事。雖善惡不同。其成敗一也。其一曰。大哉德之爲大也。能潤天下。必先行之於身。然後化之於人。化也者。効之也。自人而効我者也。所以不嚴而治。不爲而成。不言而信。不令而行。順天下之性命。育天下之生靈。其帝者之所爲乎。其二曰。至哉政之爲大也。能公天下。必先行之於身。然後教之於人。教也者。正之也。自我而正人者也。所以有嚴而治。有爲而成。有言而信。有令而行。拔天下之疾苦。遂天下之生靈。其王者之所爲乎。其三曰。壯哉力之大也。能致天下。必先豐府庫。峙倉箱。銳鋒鏑。峻金湯。嚴法令于烈火。肅兵刑于秋霜。竦民聽于上下。懼夷心于外荒。其霸者之所爲乎。其四曰。時若傷之于隨。失之于寬。始則廢事。久則生姦。旣利不能勝言。故宄得以疾賢。是必薄

其賦斂欲民不困而民愈困。省其刑罰欲民不殘而民愈殘。蓋致之之道失其本矣。其五曰。時若任之以民。專之以察。始則烈烈終焉缺缺。既上下以交虐。乃恩信之見奪。是必峻其刑罰。欲民不犯而民愈犯。厚其賦斂。欲國不竭而國愈竭。蓋致之之道失其末矣。其六曰。水旱爲沴。年歲豐虛。此天地之常理。雖聖人不能無。蓋有備而無患。不得中者。加以寬猛失政。重輕逸權。不有水旱而民已困。而況有水旱兵革焉。所謂本末交失。不亡何待。天下有成敗六焉。此之謂也。君天下者。得不用聖帝之典謨。行明王之教化。士可殺不可辱。民可近不可下。上能撫如子焉。下必戴其后也。仲尼所以陳革命則抑爲人之匪君。明遜國則杜爲人之不臣。定禮樂而一天下之政教。修春秋而罪諸侯之亂倫。刪詩以揚文武之美。序書以尊堯舜之仁。贊大易以都括。與六經而並存。意者不可以地之重。易民之教。不可以民之教。悖天之時。教之各備。則居地而得宜。是故知地不可固有之也。君上必欲上爲帝事。則請執天道焉。中爲王事。則請執人道焉。下爲霸事。則請執地道焉。三道之間。能舉其一。千古之上。猶反掌焉。則是洛之興也。又何計乎都與不都也。如欲用我。吾從其中。

灑灑堆賦

蘇軾

世以瞿唐峽口。灑灑堆爲天下之至險。凡覆舟者皆歸咎於此石。以余觀之。蓋有功於斯人者。夫蜀江會百水而至於夔。瀾漫浩汗。橫放於大野。而峽之小。大曾不及其十一。苟先無以齟齬於其間。則江之遠來。奔騰迅快。盡銳於瞿唐之口。則其嶮悍可畏。當不啻於今耳。因爲之賦。以待好事者試觀而思之。天下之至信者。唯水而已。江河之大。與海之深。而可以意揣。唯其不自爲形。而因物以賦形。是故千變萬

化而有必然之理。掀騰悖怒。萬夫不敢前兮。宛然聽命。惟聖人之所使。予泊舟乎瞿唐之口。而觀乎滪頂之崔嵬。然後知其所以開峽而不去者。固有以也。蜀江遠來兮。浩漫漫之平沙。行千里而未嘗齟齬兮。其意驕逞而不可摧。忽峽口之逼窄兮。納萬頃於一盃。方其未知有峽也。而戰乎灩澦之下。喧逐震掉。盡力以與石鬪。勃乎若萬騎之西來。忽孤城之當道。鉤援臨衝。畢至於其下兮。城堅而不可取。矢盡劍折兮。迤邐循城而東去。於是滔滔汨汨。相與入峽。安行而不敢怒。嗟夫。物固有以安而生變兮。亦有以用危而求安。得吾說而推之兮。亦足以知物理之固然。

屈原廟賦

蘇軾

浮扁舟以適楚兮。過屈原之遺宮。覽江上之重山兮。曰惟子之故鄉。伊昔放逐兮。渡江濤而南遷。去家千里兮。生無所歸。而死無以爲墳。悲夫人固有一死兮。處死之爲難。徘徊江上。欲去而未決兮。俯千仞之驚湍。賦懷沙以自傷兮。嗟子獨何以爲心。忽終章之慘烈兮。逝將去此而沉吟。吾豈不能高舉而遠游兮。又豈不能退默而深居。獨嗷嗷其怨慕兮。恐君臣之愈疎。生既不能力爭而強諫兮。死猶冀其感發而改行。苟宗國之顛覆兮。吾亦獨何愛於久生。託江神以告冤兮。馮夷教之以上訴。歷九關而見帝兮。帝亦悲傷而不能救。懷瑾佩蘭而無所歸兮。獨惇惇乎中浦。峽山高兮。崔嵬故居廢兮。行人哀。子孫散兮。安在。況復見兮高臺。自子之逝。今千載兮。世愈狹而難存。賢者畏譏而改度兮。隨俗變化。斲方以爲圓。黽勉於亂世而不能去兮。又或爲之臣佐。變丹青於玉瑩兮。彼乃謂子爲非智。惟高節之不可以企及兮。宜夫人之不吾與。違國去俗。死而不顧兮。豈不足以免於後世。嗚呼。君子之道。豈必全兮。全身遠害。亦或然兮。嗟子區

區獨爲其難兮。雖不適中。要以爲賢兮。夫我何悲。子所安兮。

昆陽城賦

蘇軾

淡平野之靄靄。忽孤城之如塊。風吹沙以蒼莽。悵樓櫓之安在。橫門豁以四達。故道宛其未改。彼野人之何知。方傴僂而畦菜。嗟夫。昆陽之戰。屠百萬於斯須。曠千古而一快。想尋邑之來陣。兀若驅雲而擁海。猛士扶輪以蒙茸。虎豹雜沓而橫潰。罄天下於一戰。謂此舉之不再。方其乞降而未獲。固已變色而驚悔。忽千騎之獨出。犯初鋒於未艾。始憑軾而大笑。旋棄鼓而投械。紛紛籍籍。死於溝壑者。不知其何人。或金章而玉佩。彼狂童之僭竊。蓋已旋踵而將敗。豈豪傑之能得。盡市井之無賴。貢符獻瑞。一朝而成羣兮。紛就死之何怪。獨悲傷於嚴生。懷長才而自浼。豈不知其必喪。獨徘徊其安待。過故城而一弔。增志士之永慨。

赤壁賦

蘇軾

壬戌之秋。七月既望。蘇子與客泛舟。游於赤壁之下。清風徐來。水波不興。舉酒屬客。誦明月之詩。歌窈窕之章。少焉。月出於東山之上。徘徊於斗牛之間。白露橫江。水光接天。縱一葦之所如。凌萬頃之茫然。浩浩乎如馮虛御風。而不知其所止。飄飄乎如遺世獨立。羽化而登仙。於是飲酒樂甚。扣舷而歌之。歌曰。桂棹兮蘭槳。擊空明兮泝流光。渺渺兮予懷。望美人兮天一方。客有吹洞簫者。倚歌而和之。其聲嗚嗚然。如怨如慕。如泣如訴。餘音嫋嫋。不絕如縷。舞幽壑之潛蛟。泣孤舟之嫠婦。蘇子愀然。正襟危坐而問客曰。何爲其然也。客曰。月明星稀。烏鵲南飛。此非曹孟德之詩乎。西望夏口。東望武昌。山川相繆。鬱乎蒼蒼。此非孟德之困於周郎者乎。方其破荊州。下江陵。順流而東也。舳艫千里。旌旗蔽空。釃酒臨江。橫槊賦詩。固一世

之雄也。而今安在哉。況吾與子漁樵於江渚之上。侶魚鰕而友麋鹿。駕一葉之扁舟。舉匏樽以相屬。寄蜉蝣於天地。渺滄海之一粟。哀吾生之須臾。羨長江之無窮。挾飛仙以遨遊。抱明月而長終。知不可乎驟得。託遺響於悲風。蘇子曰。客亦知夫水與月乎。逝者如斯。而未嘗往也。盈虛者如彼。而卒莫消長也。蓋將自其變者而觀之。則天地曾不能以一瞬。自其不變者而觀之。則物與我皆無盡也。而又何羨乎。且夫天地之間。物各有主。苟非吾之所有。雖一毫而莫取。惟江上之清風。與山間之明月。耳得之而爲聲。目遇之而成色。取之無禁。用之不竭。是造物者之無盡藏也。而吾與子之所共食。客喜而笑。洗盞更酌。肴核既盡。杯盤狼籍。相與枕藉乎舟中。不知東方之既白。

後赤壁賦

蘇軾

是歲十月之望。步自雪堂。將歸于臨臯。二客從予。過黃泥之坂。霜露既降。木葉盡脫。人影在地。仰見明月。顧而樂之。行歌相答。已而歎曰。有客無酒。有酒無肴。月白風清。如此良夜。何。客曰。今者薄暮。舉網得魚。巨口細鱗。狀似松江之鱸。顧安所得酒乎。歸而謀諸婦。婦笑曰。我有斗酒。藏之久矣。以待子不時之需。於是攜酒與魚。復遊於赤壁之下。江流有聲。斷岸千尺。山高月小。水落石出。曾日月之幾何。而江山不可復識矣。予乃攝衣而上。履巉巖。披蒙茸。踞虎豹。登虬龍。攀栖鶻之危巢。俯馮夷之幽宮。蓋二客不能從焉。劃然長嘯。草木震動。山鳴谷應。風起水涌。予亦悄然。而悲。肅然而恐。凜乎其不可留也。反而登舟。放乎中流。聽其所止而休焉。時夜將半。四顧寂寥。適有孤鶴。橫江東來。翅如車輪。玄裳縞衣。戛然長鳴。掠予舟而西也。須臾客去。予亦就睡。夢一道士。羽衣蹁躑。過臨臯之下。揖予而言曰。赤壁之遊樂乎。問其姓名。俛而不答。

嗚呼噫嘻。我知之矣。疇昔之夜。飛鳴而過我者。非子也耶。道士顧笑。子亦驚悟。開戶視之。不見其處。

秋陽賦

蘇軾

越王之孫。有賢公子。宅於不土之里。而詠無言之詩。以告東坡居士曰。吾心皎然。如秋陽之明。吾氣肅然。如秋陽之清。吾好善而欲成之。如秋陽之堅。百穀。吾惡惡而欲刑之。如秋陽之隕羣木。夫是以樂而賦之。子以爲何如。居士笑曰。公子何自知秋陽哉。生於華屋之下。而長遊於朝廷之上。出擁大蓋。入侍幃幄。暑至於溫。寒至於涼而已矣。何自知秋陽哉。若予者。乃真知之。方夏潦之淫也。雲蒸雨泄。雷電發越。江湖爲一。后土冒沒。舟行城郭。魚龍入室。菌衣生於用器。蛙蚓行於几席。夜遠溼而五遷。晝燎衣而三易。是猶未足病也。耕於三吳。有田一廛。禾已實而生耳。稻方秀而泥蟠。溝塍交通。牆壁頽穿。面垢落暨之塗。目眩溼薪之煙。釜甑其空。四鄰悄然。鸛鶴鳴於戶庭。婦宵興而永歎。計無食其幾何。矧有衣於窮年。忽釜星之雜出。又燈花之雙懸。清風西來。鼓鐘其鐙。奴婢喜而告予。此雨止之祥也。蚤作而占之。則長庚澹其不芒矣。洛於陽谷。升於扶桑。曾未轉盼。而倒景飛於屋梁矣。方是時也。如醉而醒。如瘖而鳴。如痿而起。行如還故鄉。初見父兄。公子亦有此樂乎。公子曰。善哉。吾雖不身履。而可以意知也。居士曰。日行於天。南北異宜。赫然而炎。非其虐。穆然而溫。非其慈。且今之溫者。昔之炎者也。云何以夏爲盾。而以冬爲衰乎。吾儕小人。輕愷易喜。彼冬夏之畏愛。乃羣狙之三四。自今知之。可以無惑。居不障戶。出不御笠。著不言病。以無忘秋陽之德。公子拊掌一笑而作。

中山松醪賦

蘇軾

始予宵濟於衡漳。車徒涉而夜號。燧松明以記淺。散星宿於亭臯。鬱風中之香霧。若訴予以不遭。豈千歲之妙質。而死斤斧於鴻毛。効區區之寸明。曾何異於束蒿。爛文章之糾纏。驚節解而流膏。喜構厦其已遠。尙藥石之可曹。收薄用於桑榆。製中山之松醪。救爾灰燼之中。免爾螢爝之勞。取通明於盤錯。出肪澤於烹熬。與黍麥而皆熟。沸春聲之嘈嘈。味甘餘而小苦。歎幽姿之獨高。知甘酸之易壞。笑涼州之蒲萄。似玉池之生肥。非內府之烝羔。酌以瓊藤之紋樽。薦以石蟹之霜螯。曾日飲之幾何。覺天刑之可逃。投拄杖而起行。罷兒童之抑搔。望西山之咫尺。欲褰裳以遊遨。跨超峯之奔鹿。接掛壁之飛猿。遂從此而入海。眇翻天之雲濤。使夫嵇阮之倫。與八仙之羣豪。或騎麟而翳鳳。爭檣挈而瓢操。顛倒白綸巾。淋漓宮錦袍。追東坡而不可及。歸舖歎其醜糟。漱松風於齒牙。猶足以賦遠遊而續離騷也。

懷歸賦

沈括

歸休乎。嗟生亦勞兮。歲常九行而一息。四方已莫不異兮。欲終往而安卽。披荆榛以孤鶩。涉大塗之梗塞。投屏顏以盆入。孰爲晏眠而朝食。譬欬一山而百折兮。況千里之綿邈。高浪鱗卷而電劃兮。近不保乎咫尺。嗟子乘此而安之兮。託扶搖以寸翮。吾一念子之往兮。意久兀磳而屹栗。彼夫人之聖哲。寧有欲乎顛踣。摩冥冥之無窮。抽萬世之潛默。雖皎中而自信。亦終壞坎而莫覲。來之不可與謀兮。果去亦庸何傷。旣振轡而大驅兮。蓋倡伴其所適。期無羨於古人兮。苟亦善吾之令德。終曠蕩之可驤兮。信幽履之不惑。

黃樓賦

蘇轍

熙寧十年秋七月乙丑。河決於澶淵。東流入鉅野。北溢于濟。南溢于泗。八月戊戌。水及彭城下。余兄子瞻。

適爲彭城守。水未至。使民具畚鍤。畜土石。積芻藁。窒隙穴。以爲水備。故水至。民不恐。自戊戌至九月戊申。水及城下二丈八尺。塞東西北門。水皆自城際山。雨晝夜不止。子瞻衣製履屨廬於城上。調急夫。發禁卒。以從事。令民無得竊出避水。以身帥之。與城存亡。故水大至。民不潰。方水之淫也。汗漫千餘里。漂廬舍。敗冢墓。老弱蔽川而下。壯者狂走。無所得食。槁死於丘陵林木之上。子瞻使習水者。浮舟擲載糗糧以濟之。得脫者無數。水旣涸。朝廷方塞澶淵。未暇及徐。子瞻曰。澶淵誠塞。徐則無害。塞不塞天也。不可使徐人重被其患。乃請增築徐城。相水之衝。以木堤捍之。水雖復至。不能以病徐也。故水旣去。而民益親。於是卽城之東門爲大樓焉。堊以黃土。曰。土實勝水。徐人相勸成之。輟方從事於宋。將登黃樓。覽觀山川。弔水之遺迹。乃作黃樓之賦。其詞曰。

子瞻與客遊於黃樓之上。客仰而望。俯而歎曰。噫。嘻。殆哉。在漢元光。河決瓠子。騰蹙鉅野。衍溢淮泗。梁楚受害。二十餘年。下者爲汙澤。上者爲沮洳。民爲魚鼈。郡縣無所。天子封祀太山。徜徉東方。哀民之無辜。流死不藏。使公卿負薪以塞。宣房瓠子之歌。至今傷之。嗟。惟此邦。俯仰千載。河東傾而南洩。蹈漢世之遺害。包原隰而爲一。窺吾壖之摧敗。呂梁齟齬。橫絕乎其前。四山連屬。合圍乎其外。水洄洑而不進。環孤城以爲海。舞魚龍於堽壑。閱帆檣於睥睨。方飄風之迅發。震鞞鼓之驚駭。誠蟻穴之不救。分閭閻之橫潰。幸冬日之旣迫。水泉縮以自退。棲流枿於喬木。遺枯蚌於水裔。聽澶淵之奏功。非天意吾誰賴。今我與公冠冕裳衣。設几布筵。斗酒相屬。飲酣樂作。開口而笑。夫豈偶然也哉。子瞻曰。今夫安於樂者。不知樂之爲樂也。必涉於害者。而後知之。吾嘗與子馮茲樓而四顧。覽天宇之宏大。繚青山以爲城。引長河而爲帶。平臯衍

其如席。桑麻蔚乎旆旆。畫阡陌之從橫。分園廬之向背。放田漁於江浦。散牛羊於煙際。清風時起。微雲灑
露。山川開闔。蒼莽千里。東望則連山參差。與水背馳。羣石傾奔。絕流而西。百涉湧波。舟楫紛披。魚鼈顛沛。
沒人所嬉。聲崩震雷。城堞爲危。南望則戲馬之臺。巨佛之峯。歸乎特起。下窺城中。樓觀翱翔。崑峨相重。激
水旣平。眇莽浮空。駢洲接浦。下與淮通。西望則山斷爲缺。傷心極目。麥熟禾秀。離離滿隰。飛鴻羣往。白鳥
孤沒。橫煙澹澹。俯見落日。北望則泗水潑漫。古汴合焉。匯爲濤淵。蛟龍所蟠。古木蔽空。烏鳥號呼。賈客連
檣。聯絡城隅。送夕陽之西盡。導明月之東出。金鉦薄於青嶂。陰氛爲之辟易。窺人寰而直上。委餘彩於沙
磧。激飛楹而入戶。使人體寒而戰慄。息洶洶於羣動。聽川流之蕩瀾。可以起舞相命。一飲千石。遺棄憂患。
超然自得。且子獨不見夫昔之居此者乎。前則項籍劉戊。後則光弼建封。戰馬成羣。猛士成林。振臂長嘯。
風動雲興。朱閣青樓。舞女歌童。勢窮力竭。化爲虛空。山高水深。草生故墟。蓋將問其遺老。旣已灰滅而無
餘矣。故吾將與子弔古人之旣逝。閱河決於疇昔。知變化之無在。付杯酒以終日。於是衆客釋然而笑。頽
然就醉。河傾月墮。攜扶而出。

宋文鑑卷第六

賦

感山賦

崔伯易

客有爲予言太行之富。其山一名皇母。一名女媧。或於此煉石補天。今其上有女媧祠。因感其說爲之賦。其辭曰。

曲轅先生。從先大夫之南征。省黑許於紫霄。訪武王於朱陵。授羅浮之隱書。擷三茅之神英。息肩淮泗之濱。閉關弦歌。與世無營。一日梁國公子。銅鞮處士。闐然踵門。悅然相親。曰先生倦游者矣。祈有異聞。先生不對。賓請愈勤。於是爲論山中之物。山中之民。敝山中之遺懽。詠山中之淳文。二客相視而笑曰。先生唐相之家。族蕃西京。京於吾鄉。駕材累程。連聯高山。見于羣經。茲其不言。疑未之行。試爲先生陳之。何如。公子贊之。處士曰。夫坤厚之勢。猶一人之體。崑崙爲之首。自首而下。峽岷屹嶺。無復平地。陵轢百國。有陰山焉。橫二千餘里。北爲戎狄。南爲古聖之所治。測中言之。殆吾國之乾位。听天銅渾。周髀保章。參地之形。茲爲最詳。上正樞星。下開冀方。逢胃而畢。自柳以張。亂則冀安。弱則冀強。起爲名丘。妥爲平岡。歸乎甚尊。其名太行。挾大河於楚東。瞰北嶽其在旁。其高也邈迤而上。始莫知其高也。登躡千里。昂目而前望。駭實與夫天當。其深也繚繞盤辟。始莫知其深也。馳朔東而左轉。垂三月而見脊。盛連延乎碣石。傳曰。東海之水不盡。而此山也。吾莫知其所極。此其知言哉。如彼大邦。圻鉤壤連。如彼大川。洲維浦聯。殊鄉異觀。習乎所

傳。坳然若鞍者曰鞍山。突然若竈者曰竈山。色黑者黑山。形方者方山。如此之類。名何可殫。墨翟察而知驥之貴。尸佼過而辨牛之難。穆王升由雀道而出。世宗行自大河而還。孝明嘗登幸上黨郡。章帝以游至天井關。孟德北上。紀摧輪之恐。謝公西顧。引憂生之端。阮籍失路。而詠懷。劉峻懷交。而發嘆。歸晉陽子惠之便道。對二坂祖濬之祥觀。開元錫問於逢車。武德置縣。而當煩。霍襄吾襟。共附吾肘。纏午壁之勢。探長城之口。天門揭其部分。烏嶺支其躡。蹂姑射王屋。降虛雷首。靡迤嶽岑。參錯釘。或拱其左。或捧其右。或導其前。或贊其後。讓以奇巘。貢以重岫。曾夸娥之輸力。攤大帝之寶授。上瞻矚兮鵬擊。下砰磕兮鯨鬪。又若王畿之外。五等諸侯。奉命守土。率屬千萬。悉面內而騰輶。此山之形也。汾潞丹洹。滹池灑易。涑沁淇漳。清源濟溴。奄响將迎。縱橫嗽激。安陽巨馬。出其夸。白絮北涿。度其液。觸遙阜以孤引。漱榮光而歷。凝染漸漬。哀青貯碧。此山之容也。奠荒有神。開社有伯。以風主威。以雲主澤。翻手燄陽。覆手霹靂。近靡百城。遠需萬域。暴暑亟寒。暗天一白。煙不得爲瘴。氣不得爲疫。豈其幽深也。深其欲而難期。其并合也。合其力則無敵。此山之氣候也。軒后以來。至于成王。自時建都。遷徙不常。遠近表裏。其陰其陽。春秋之前。封國既多。春秋之後。唯晉爲彊。大抵以兵爲阻。以險爲防。守不敢弛。戰不敢忘。越至卑耳。而齊桓以霸。一入孟門。而平公幾亡。燕趙中山。衛韓與魏。或主山東。或主河內。或主山西。或主河外。或城其隈。或據其會。或保作咽頸。或恃爲腹背。屯留有常阻。山陽有常界。跬步之側。萬人死之。復驅萬人而地不少退。如熊斯林。如虬斯壑。左顧右睨。爪牙鋒鏑。乘間薄人。肝腦塗地。以塞旗虜。將而爲樂。不然。假息竊視。扞以城郭。從姬歌兒。名珎重璞。不敢不獻。雖欲藏之。亦終歸乎攫搏。駭乎哉。固嘗一朝之中。一舍之間。烹四十餘萬之衆。築頭顱。

之山舉長平爲鼎鑊。舊壁荒城。豆分碁錯。今千餘年。幽陰寂寞。此山之勢勝也。當時雄豪。迭指交質。行野者非樂其野。逐獸者非卽其獸。裴徊陵陸。踰陘阪阜。裁約六國。眈眈九道。孰爲龍首。孰爲天竈。向背孰徒。草木孰遘。器械孰便。憑倚孰厚。東西孰廣。南北孰袤。爲蛇孰尾。爲鶴孰喙。孰方孰圓。孰牝孰牡。衝輪孰敏。沮鴈孰懋。孰利襲掩。孰利藏獲。孰此出擊。孰此入寇。孰可徒搏。孰可騎驟。孰可啗誘。孰可斥候。孰可接戰。孰可桃鬪。孰最恐夜。孰不欲晝。勝此孰遂。敗此孰救。佯遁孰止。乘亂孰走。孰要於邇。孰閉其後。記省在目。陳說在口。憑軾結鞞。忿袞去就。所過之邑。鷗視狼吼。詰無不講。嚮無不偶。入軍則建旗鼓。入朝則佩印綬。以國試膽。以民試手。爲縱橫家。隨以此售。關警遲速。稱畫貧富。矯尾厲角。恐惕翻構。鬼神不能窺其密。賢駿不能糾其繆。中人主之利欲。移將相之恩舊。其後或主或臣。建功立業。尤顯聞於後世。則有決羊腸之險。衝此山之道。攻滎陽伐韓。以威天下。應侯爲秦昭王之謀也。據敖倉之粟。杜中山之阨。距飛狐之口。守白馬之津。使天下知所歸者。酈食其爲漢高祖之謀也。踰此山入射犬。破青犢之衆。殺謝躬於鄴。以收復天下爲心者。漢光武之謀也。濟河降射犬之衆。還軍敖倉。屬魏种以河北事。然后西向以爭天下者。魏武帝之謀也。進據武牢。扼其襟要。俾竇建德不能踰山入上黨。收河東之地。而卒以併天下者。唐太宗之謀也。徐思以觀。亦吾之近藩。北壓燕薊。西臨順檀。籠裏控外。聯區接寰。州開其隅。邑疏其間。衡而爲壘。缺而爲關。有朝歌內黃。黎陽之支離。有五原高平。廣武之依攀。前規成臯。逆嬰邯鄲。收襄帷趣駕之威。宰簪笏假轡之官。大城望之如雲。小城夾而金完。各負城勢。熊驪虺蟠。宿貌貅之倘伴。峙芻粟之噴岌。此又其山古今因人以明效者也。偏隅之禔。蒸鬱成象。或爲樓闕。或類亭障。下利墾闢。其土白壤。穀備五種。穎粟豐。

穰以陶則不窳。以牧則易長。駢駢駢駢。駢駢駢駢。繁鬣赤喙。黃脊白顙。奇毛異骨。駟駟駟駟。或出凹揜。或會廣敞。或隨齧而乍散。或就飲以羣往。秦青靚之而目眩。造父逢之而伎癢。若乃邊風夜號。寒氣朝蕩。木葉晝脫。川原蕭爽。挺逸彩之疎瞬。厲雄心之倜儻。分騰而郊野暗。聚鳴而阮谷響。最下者籛糧載士。日中而馳百里。鳳臆蘭筋。探前扶後。何止乎蹄間三丈馬之所施。險之所依。有德者然後能之。其或守之不以道。用之失其宜。則是二者在所爲盜賊之資。司馬侯告晉侯。以先王之不務者。非棄之也。而吳起言商紂之國。志有激於當時。何則。宣帝處先零金城。而終貽漢患。武帝倚元海并州。而俄傾晉基。自後聰曜石勒。姚萇季龍。元魏高齊。諸苻慕容。呼侶嘯類。提羌占戎。或屯於定襄。或保於居庸。或建都鄴下。或渡軍河中。或改元離石之北。或僭號沙河之東。胡塵一蹶。三關遂空。長安之城。洛陽之宮。搖轡長驅。傳國都而扼蹤。暴衣冠於塗炭。客宗廟於妖覩。更帝迭王。抑爲盛衰。其四方簡冊。不可得而書者。凡幾戰而幾攻。由是觀之。爲彼君者。始失之一朝。遂使天下之人。親戚離散。一百二十六載。挂性命於兵鋒。此又當世賢人君子。登高慮遠。所宜追述爲萬世深誠者也。當彼之時。國中窄而山中寬。天下危而山中安。外儉人苟容。以盜官兮。內浩歌乎考槃。外吁嗟愁涕之辛酸兮。內遊鹿豕其方歡。外窮奢極侈以相殘兮。內交讓乎瓢箪。外仍樞縮劍以銜冤兮。內樂天其盤桓。仁智所依。仙聖所迹。其動如龍。非迅雷烈風不起。其出如鳳。非醴泉甘露不食。服皇媧之妙道。藏補天之神石。或餌木而探芝。或吞陽而嗽液。或自耦於樵釣。或偶懷於老易。引公和之餘韻。振文舉之歸策。壘王二老。猶自輕之士。壺關令狐。殆多言之客。至精元以友造化。緒餘尙足以治萬國。此其山之隱逸也。卽以仰之。首名歸山。嶺巒紆餘。巉巖屏顏。曳泉紳之飄飄。束雲衣之迴還。

積衆精於寶姥。穆靈氣於天丹。轟雲霞之朝覆。豁光恠之宵環。其金則鉞盪鏐銑。鏐鏐鏐鏐。其玉則瓊玖
瑋瑋。瓊琪瓊瑤。石黃綠而青碧。珠玫瑰而木難。餘糧石脂之礪。砢楮堊理長之爛。編陰映宛倚。穹注蟠聯。
絲絛氈綱。鉛鹽銅礬。備先賦之不名。距三方而祖繁。復有紫沙黃霧。神鋼是取。逗落液於庫澗。萃堅英於
弱土。播蚩尤之遺勇。回歐冶之靈顧。下分擅乎百源。上夾輸於六務。此其山之琛賂也。其鳥五色豪鷹。窟
生峻峻。貌如秋胡明星。明星响撥利戟。足卷枯荆。鷗趨鵝隨。往還青冥。木栖則鷓鴣鸞鶴。水止則鵠翠鳧
鶻。殊種詭類。莫可殫名。其狀如麋有距。四角馬尾。聲若鍾磬。以出爲瑞。赤虎文豹。黃熊封豕。麕鹿瑞獬。行
搏坐噬。草則紫團之萋。勤漏盧。麋銜牡蒙。菴容首烏。牛漆豹足。龍沙虎須。赤節紫蒨。如雷。此胡雲英玉支。
解蠶菴。蘭鹿腸鶴虱。彭根屈据。澤態天糅。芳臭粉敷。或同葩異實。或冬榮暑枯。或珍傳太一。或用講史區。
木則有榛有栗。其桐其椅。篁篠懷風。桃李成蹊。梗柗楓檜。思仲蕪莠。梓漆樞栲。青檀紫葳。樅檜槐棗。棠榴
椶黎。陽榼槩桑。粉榆棧槻。交柢並節。韜唐蔭隄。身緣中材。實資療肌。松柏千歲。蹇金石姿。彌根萬仞之峰。
落影千丈之溪。孤榦直出。百尋而後。有枝遠而望焉。或如翔鸞。或如蟠螭。其大蔽牛。其圓中規。參差櫺櫓。
下隔百步。猶膠戛而相羈。公子矍然曰。陸產之盛。僕知焉。不若是之詳也。且聞之。漢甘泉肇於武帝。唐含
元建於高宗。或決事於上。或受計其中。始用材之有餘。終興利於無窮。陛下臨御以來。四十餘年。未聞闕
苑囿之觀。事土木之工。戶牖朱綠之飾。詔五歲而一易。服玩帷帳之具。雖屢補而尙供。四方黎元。自視忸
然。咸願獻力京師。進娛皇躬。聽鍾鼓管籥之音。瞻車馬羽旄之容。儻有司因億兆之心。率懷衛磁。相澤潞
之人。披蒼莽。伐崆嶺。賤新甫之得。簡徂徠之封。激春淫之悍豪。扶丹濟其來東。經營庶民。作爲新官。以壯

闕乎中區。以周嚴乎九重。高闈祕廬。侍從兮螭蟬。翠華黃屋。往來其冲融。追三雍養老之法。申其孝慈。復延英訪問之迹。考其邪正。更取士之弊法。著久官之新令。明刺舉勸沮之典。絕苟簡異同之政。廣庶長廊翼其兩旁。左選天下經術辯通之士。以爲議郎。居講朝廷疑難之義。補百司之闕。出委觀民決獄之事。以信其所詳。右選天下材勇溫恭之人。以爲衛士。居講司馬軍機之要。掌諸門之禁。出委偏裨別屯之任。以觀其所莅。興利如此。顧不爲偉歟。山日以開。貨日以通。衆庶習知。勿爲牢籠。欲發者發。欲攻者攻。登者捐者。剝者斲者。烹者掇者。爇者弋者。四時憧憧。皆民所同。庶寶之輪幽。萬模之紛紜。雕腹彩製。羽須毛羣。弓矢鎧楛之材。輿馬骨革之倫。被服織華。鼓鑄精珍。三十取一。歸于縣官。寧有聞子富而父貧。興利如此。顧不爲偉歟。公子再言。處士再思之曰。公子之惠。亦云善矣。且民可與樂成。不可與慮始。況乃三晉人號沉鷺。孕鶉火之流烈。感斗極之勁氣。瞻顧端巧。手足便利。蔑淫蠱狂厲之感。無喘夜鞍塚之累。專思慮而喜任俠。貴然諾而多矜。忤重淪姦侈之化。孤守而莫變。由滲唐虞之澤。彌久而未墜。平居之際。以氣義相視。馳馬射獸。以爲樂。投石拔距。以爲戲。悲歌慷慨。以摠其鬱。矜誇功名。以見其志。自古受命之主。不先得其土。則先得其士。不得其地。不足以控諸夏。不得其兵。不足以威萬寓。粵天寶失御之後。事雖近而不復言。而五代不綱之時。其迹甚明。而可以數。朱梁失守。則晉人南下而急攻河陽。師厚不死。則魏博六州。據山口之路。莊宗之禍。由鄴郡而起。清泰之敗。緣上黨之助。蕃戎陷相。而石滅。鄴兵過河。而劉去。或羣盜乘隙而並出。或前軍自此。而先渡河東之舉。昧李驤疾度。控孟津之策。世宗之征。賴車駕倍程。有南平之遇。可畏也。如人懷心腹之疾。難去也。如木受根柢之蠹。故吾太祖皇帝之興也。踐祚五月。親平澤潞。念賊失仲。

卿之計。不西下而直趨懷孟。而我用向拱之言。速濟河而擊其未聚。離穴成擒。吳祚之前料。登無難色。李氏之深諭。如洪波薄江。借海以爲力。大霆擊空。與電而俱赴。交廣閩蜀之區。淮海江漢之壘。彊侯暴王。襲頓蹙躓。納土稱臣。冠佩隣聯。雖天命之所在。亦主威之使然。其勢如此。猶藏太原。謝將休戎。十有九年。太宗之弔伐也。指師爲林。轉糧如川。斷石嶺之應。剋隆成之堅。躬擐甲冑。劊鋒易弦。晝夜圍督。六師爭先。壓之以天下之重。然後始能破焉。迨我真宗。撫養其人。留蹕授關南之師。促使益安陽之屯。許北虜之通和。勅猛將之疏軍。以至陛下。仁風德澤。扶導長養。踰八十春。賦不聞竭。其才力未嘗疲其身。喜辯者不知約。從連衡之謀。尙勇者不知收城奪邑之勳。室家熙熙。老於耕耘。如養虎者不與之全物。賞先至者不導於一津。茲柰何合之深山。觸鷲猛而爲勅敵之怒心。鐵鑿棘矜。若南國之茶。海濱之鹽。千百良民。化爲頑兵。或蒙欲而拒捕。或負恃而貪凌。始追罪而羣亡。終盛氣而橫行。鎮之常員。則威有所不足。列之大誅。則民轉相震驚。陸機謂興利不足以補害。君焉孰懲。公子曰。不然。古初生民。禽獸雜居。無機械以荐食。無衣裳以被軀。累聖哀之。脩其所無。鑽燧取火。鑠金於鑪。銳以鋒刃。俾持以趨。逐其蟲蛇。創其室廬。剝木成舟。結繩爲屬。剡木爲矢。弦木爲弧。以飲以食。以畋以漁。服牛軛馬。紡績鑿鋤。後王因之。訖今以娛。安有至治之世。導民以利。復爭亂之是虞。太公封齊。熊繹封楚。魚鹽之義。山林之阻。公一發之。民往如鶩。不數十年。齊楚以富。彼諸侯之國。民且守法。豈天下之廣。人或敢侮。調發存邑里之籍。出入視保伍之名。倚之守令之良。護以使者之能。蓋建隆初興通餽之役。奚今日之政。姑息而艱行。是有司不復舉。因民之利。四方無時。有可勞之氓。弗卹所治之法。何如而已。亟此禁山推海之圖。疑所思之未明。處士曰。君不聞天子之建宮。

乎。厭江陵之瑰幹。空鄧林之巨樹。山鬼見榮而儵燦。坤后斥縑而容與。青帝執規。白帝司矩。攝離朱之魄。觀其徽纆。捨倭繭之神。相其斤斧。裁魯鎮以爲址。判湘巒以爲礎。趨步而龜鳥正。叱咤而虹蜺舉。星覆重。撩雲縮萬堵。塗以齊赭。甃以號土。華薦金石之美。梁修牙角之賦。揚瑤琨與織貝。荆斲丹而箇籥。蒙羽之。織縞澗漚之。臬紆優尊而百禮六樂。華國則東房西序。邦賄豐息。寧主是耶。公子曰嘻。上方東被于流求。西薄乎羊同。南暢于訶陵。北愴乎空峒。積摯鴻臚。填貨大農。天人之交。何求而不充。徒念覃懷之域。三河之衝。澗斷乎滄溟。背栖乎犬戎。齊楚甌越。魯鄭巴邛。轅有所不通。重兵之常處。列城之所宗。將帥之治守。詔使之過從。壤地所生。衣食所庸。不疲其貲。卽疲其力。不出於官。則出於農。帑焉而乏。府焉而空。或驕陽淫雨之災。或戍發備河之逢。流離其民。易資梟雄。或陰會於朋仇。或椎埋以成風。故先諸權。俾怡其衷。禹散歷山之金。而贖賣子之虐。湯鑄莊山之幣。而救無糧之凶。非先君不足以說士。非首衆不足以就功。如彼泉源。我發其蒙。如彼委藏。我啓其封。設坐視天財而不知發。猶有此民而不以爲兵。徒示二虜之涵容。處士曰。君知其一。未覩其二。琉璃之河。華林之莊。昔居臣民。今游犬羊。然黠虜奚民。視此而莫敢乘焉。吾非有以守之。殆由天設于王公。帝限乎豺狼。若之何侵而夷之。以紓其行。餌之可欲。以發其狂。義未聞於灌瓜。兵或興於爭桑。投藟生心。文子之至喻。牛甘必鬪。管堅之所量。國家近邊。雖上腴之地。久禁而不耕。所棄甚輕。爲利甚明。發丁以通驛。隋政之已失。治氣而未盡。魏室之旋傾。彼烏足陳於治朝哉。山東之兵。三十五將之師。君所聞也。請置其說。公子曰。大農之家。不患穿墉而廢困倉。善賈之行。不念胠篋而捐金珠。備得其術。則害何能擾。利果大入。則小或可疎。今防秋之兵。不寄之士豪。而歲起屯戍。繕

治之物。不蓄於逐州。而授于京都。不募人訪銅。而私或自鑄。重給民曠土。而爭糴於胡。遺計若此。庸爲利歟。由衆人焉。南牧之慮。將智者兮。北伐之涂。推石傅土。決其成功。束馬懸車。胙乎能事。突收燕樂。捐范陽。涿郡三道之師。直壓懷柔。拒虎北石門。四兵之勢。引輕軍發羌夏之東穴。出奇道斬匈奴之右臂。二客紛辯。旣久。色相不平。抗袂俱起。質于先生。先生覲然而笑。適然而興。曰。坐。吾告汝。夫有財而弗取。無道者之言也。取而不以先王之制。無法者之言也。二者吾聖人之深惡。不順乎冬夏。不相乎陰陽。禽獸之殄暴。貨幣之誅狀。不時而源枯。不禁而山傷。逆于天元。降爲災祥。則雖傳道之人。豈容無責哉。古者大德大功之人。天子尊之。公侯之爵。殊其奉養之方。功厚者享亦厚。德長者報亦長。推之四海之內。入爲公卿。出爲牧伯。盛不過數十土地。所育人民。所藏其貨。易供其財。易當其報。非天子之獨私焉。蓋天下皆樂其有以報也。故其民賢者勉焉。以脩其業。愚者雖甚欲焉。而無敢望。其志易平。其勞易償。今高貲大姓之家。列肆俸於府庫。邸第羅於康莊。金紉采綴。鍤劓焜煌。被以黼繡。裹以雕牆。狗馬棄齊民之食。飲輿妾賤士夫之衣裳。賓昏祠葬。隳敗紀綱。通吏買法。陰淫陸梁。其憑荒負險之民。擅彌山絡野之疆。畜奴如兵。占田論鄉。主逋。叟寇者攸衆。寶龜藏甲者爲常。州縣徒史。私爲之視察。鄉亭部夫。公隨之奮攘。是天下山林之出。除公上之賦。守令吏寺。略有常制。每郡每邑。宛轉糜潰。輸幾侯而幾王。彊桀相師。極欲爲威。怒網而川。貧笑斧而林飛。孰察諸刊剝水火之遺製。孰恤乎豎穉曲直之所宜。積之徒多。而器用殊寡。舉之或遠。而民資自疲。富者售之益輕。貧者勞而愈微。誓窮原藪之饒。而況膏腴之歸。乃方乃州。或蝗或饑。民以爲災。而彼反爲宜。從是其氓。匿稅併田之不暇。益令羣猾藏租。隱地之無疑。南方諸山。非復昔時。材不愛而木不蕃。木

不蕃而獸不滋。迨有千里不毛。裹餼莫支。是天地陰陽晝夜長養。猶不能以充其欲。則吾民何負。獨爲狸而畜雞。蓋馭民無予奪之政。厚生無發歛之期。萬物失由儀之道。四海廢崇丘之詩。或者縣官列膠幹皮羽之須。營棟宇舟車之材。上苛之以敲笞。下撓之以追催。索之于邇。則此旣莫有求之于遠。則險孰能來。方此之時。時蓄之家。驩相比朋。固所以制百姓之命。其年而篡其業。更歲而竭其財。如是不已。饑寒怨愁。不委於溝壑。則聚爲盜賊。非此二者。吾不知其安所爲哉。始於傷財。則終於害民。察其蠹國。必固乎亂俗。故國家以皇祐之版書。較景德之圖錄。雖增田三十四萬餘頃。返減賦七十一萬餘斛。由是言之。土地財利。名制約束。不用先王之法。其爲弊也。民失其平。若之何而可復。高者愈貪。而肆蛇豕。下者抵禁。而趨口腹。刑罰日增。裁害日續。蓋兼并不去。不足以語政。制度不立。不足與言治。禁錫存省米之說。賤肉有愛牛之意。此言雖小。可以推類。事爲之法。物爲之制。數罟之得。非不多也。先王禁之。以其傷生。原蠶之利。非不博也。先王禁之。以其害氣。果實未熟。木不中伐。用器不中度。禽獸不中殺。鬻於市者。執而有罰。不以其時。不順其教。捕一禽。折一草。謂之不仁。斷一樹。伐一木。謂之不孝。公卿大夫。羣士黎庶。居室有品。器械有度。車馬有等。衣服有據。飲食有常味。人徒有常數。戮民不敢服纒。君子不履絲屨。爲農者不得爲工。爲士者不得爲賈。天王之尊也。合圍猶惡其盡物。諸侯之貴也。殺牛尙戒於無故。小旣無越。大豈容負。草木鳥獸。而舜以命益。水火土穀。而堯以任禹。名山大川。縱封國而不盼。至其漆林。獨二十而征。五著于後。王脩之。愈明典之於天官。圖之於地卿。任之九職之事。辨其五物之征。主山而有虞。主林而有衡。中土下土。贊其政令。府史胥徒。頌其所行。豺祭而弓矢陳。隼擊而尉羅興。司險達其道路。山師辨其物名。鷲獸在前。穴氏

火物而誘之出。阱獲既設。冥氏伐鼓而使之驚。然後萬民隨之。詔焉以程。斬材者有期日。竊木者有常刑。至于金玉錫石。卍人之專取。犀象麋鹿。角人之所登率。避其孳育。以待其豐成。必以其時。素王稱其大順。不可勝用。孟軻陳其養生。貴賤有差。六器五輅之資。民得而無所用。興造不安。五金六材之屬。民用而無所傷。禁發之有期。重輕之有常。天生時而寒暑平。地生財而品類昌。碩以盆鼓。蕃以谷量。暴暴如山岳。渾渾如河江。山出銀甕丹甌。椒聚麒麟鳳凰。追前世之盛。被于此時。以吾君之聖。方諸先王。陶唐之二官。姚虞之總章。商人之重屋。周人之明堂。雖虜眉耆者。愛惜朝夕。期有以必覩也。子之言曾何比。今於漢唐。陛下慈仁如天。廣厚如地。任臣則勿疑。聞諫而必喜。賞罰不濫。切愛乎民命。祭祀馨虔。動交乎天祉。遠民之弊。雖守臣不知。而知之甚詳。克己之誠。在匹夫難行。而行之甚易。至若五帝憲老之禮。三王觀風之制。六典建官之法。三適進賢之例。患有司不得其術。不患朝廷之不行。患臣下不舉其職。不患信任之不至。今也輔相大臣。左右良士。重君子爲臣。去就之節。思古人得君功烈之致。施以善俗爲本。學以力行爲貴。居朝廷不以先後持其嫌。守藩鎮不以內外疑其勢。同德一心。齊力協議。臯陶謨而矢契稷之業。伯夷讓而中夔龍之志。以共察天下之善。不使有蓋虛驕士之黨。以共收天下之傑。不使有妬功蔽賢之吏。以衆人之耳爲耳。聽衆耳之所不聽。以衆人之目爲目。視衆目之所不視。授百司因革於吏。而總其成績。委二邊軍賦於將。而責其必治。法制素具。東南旣饒。天府宏壯。講練有時。吳越皆霸王之兵。朝令乎西。西納十四州之地。夕使乎北。北歸十三州之城。渾然臨之以至健。隕然載之以不傾。伊洛之水。畫乎其前。戎夷畏之。踰黃河之湍。丘垤之山。篲乎其旁。戎夷阻之。甚太行之橫。與其邀近功於一山。增衆糴之弊。牽危疑於往。

代。汨因循之名。使王者之興。百有餘年。神聖在位。而仁愛之澤。獨未及於禽獸草木。曷可同世而語哉。二客離席。跼蹐媿謝不敏。請爲弟子。旣而少進。曰。問阜財得阜民之法。問治山得治國之風。且昔者將大有爲之君。必有所不召之臣。欲有謀焉。則就之。不得已而後起。有學焉而後臣。有不可得而臣者。今山之隱逸。亦如是而後至乎。曰。莫可得而知也。神農之於悉諸。黃帝之於崆峒。顓頊之於綠圖。高辛之於柏招。帝堯之於務成。帝舜之於尹壽。禹之於國先生。湯之於伊尹。文王之於鬻熊。武王之於尙父。周公之於虢叔。齊桓之於管仲。然尊德樂道。說者如此也。吾觀之彼數子者之心。將如是而已乎。莫可得而知也。二客悅。若自失。再拜而罷。

宋文鑑卷第七

賦

珠賦

崔伯易

煎茶賦

黃庭堅

別友賦

黃庭堅

汴都賦

周邦彥

珠賦

崔伯易

高郵西北有湖名璧社。近歲夜見大珠。其光屬天。嘗問諸漁。皆言或遇於它湖中。有竊謀之者。則風輒引。舡而去。終莫能至。賦曰。

萬物之精。上爲列星。其在下者。因物而成形。故天下之偉寶。不妄其所託。託物之主。實內鍾乎神靈。吾嘗臨東海。旅南溟。泛淮江之湯湯。濟岳陽之洞庭。觀其溶液衍裕。蓋天地之委藏。祕恠惚恍。蛟虬嶸嶸。豈世人敢指名哉。若乃雲夢震澤。浮梁合浦。默潛宮亭。神見牛渚。直湘沅以南浮。懷涇渭而北注。顧導東而成滄浪。激西而爲灩澦。延平誕奇。漢臯殊遇。率傳載之雜出。爲異物之所處。或設限於藩服。或效琛於王府。鑠高郵之經治。裂楊州之故部。有湖隸旁。將三千所。大或萬頃。小亦千畝。迤邐兮聯絡。參錯兮駢布。由卑以自處兮。傾十數州之羨沃。穹山大野。谿谷原藪。晝夜走險。越千里而來赴者。莽不知其幾千百處。壓東

南之滌漫。勢漭瀉而無涯。魚則鯁鯉。鱖鱓。鱗鯁。鱗鱗。鳥則鳩鵲。鳧鷖。鷓鴣。鴻駕。翥若煙海。會如泥沙。蟲螺
鱗若蝦蛤。卉菱芡而荷華。水不數舟。陸無筭車。漑灌乎民田。漕引乎國家。夾埭長陂。程水壤之固護。飭官
命屬。厭功利之紛拏。迨夫地脈泉源。孰爲要遮。潛合陰附。應淮海之唘。微風翻瀾。矧其甚邪。其或駭怒
決溢。隄防之所不加。決滌千里。農民播溺。宛轉流離。而不相救。又況其廬舍之與桑麻。噫。是亦涉者之厯
觀矣。瑰祥恢恠。庶幾乎託焉。間乃省貢書。考圖編。所陳者特盤殮之微。固不聞有把握之貴。爲當世之所
傳。發詠乎川珍。翺翔乎水邊。爰有蘆人漁子。相語而來。前曰。先生之念者。貨也。若夫川澤之精理。則不然。
不寶於人。獨寶於天。今此有夜光之珠。產於深淵。我意其神。先生辨旃。其始也。天和景晴。湖波夜平。煙冉
冉以四收。萬籟息而無聲。則是珠也。凜氣將之。若海月之升。含彩吐耀。周隅皆明。呀紺石而爲宮。被綠苔
以垂纓。挹奔星之光芒。吸沆瀣之精英。木散景兮扶疎。草露實兮紅青。林烏警而移枝。羣犬愕兮爭鳴。於
是叩人徐呼。上流俱起。撫鴻罇以先趨。領罇筍之已試。連徽挺投。灑網持柅。嗟雖鑑其眉睫。疑未曉其機
器。方詭置之漸張。果造形而已逝。而況伏見靡時。欵彼倏此。與蛟龍之爲朋。曾風雨而作衛。彼能三足而
在。禦鼈九肋而充饋。漢蛟蚌之青骨。鄭龜羹之異味。勅牛悅水而黃奪。澤馬翫繩而足躡。犀狎偶而解角。
翠因媒而折翅。江使被執於行役。巨魚爲腊於貪餌。文具瑋瑁。出禍其腸腹。金華玉英。坐窮於淘漚。麀蜃
胎寒。熠燿自喜。怵絕意於遐引。適足殺其軀而已矣。是故號數選者。我固謂之貨也。能不爲珠之笑耶。予
曰。嗚呼。噫嘻。信子言也。旣明且哲。則大雅君子者耶。不常所居。擇利害而去就者耶。用以晦明。知在己者
耶。色斯舉矣。學孔子之徒者耶。薄泥塗而不辱。不恥下賤者耶。川不涸。岸不枯。有德鄉里者耶。久而不聞

其遯世者耶。旣而復曰。嗚呼噫嘻。照魏王之乘耶。燭隋侯之室耶。謂上幣耶。飾冠冕而佩耶。客有聞者。亦矍然而興曰。嗚呼噫嘻。吾聞諸石室之書曰。王者得之。長有天下。四夷賓服。然則得之者。或非其心。獨王者之心耶。

煎茶賦

黃庭堅

洵洵乎如澗松之發清吹。皓皓乎如春空之行白雲。賓主欲眠而同味。水茗相投而不渾。苦口利病。解膠滌昏。未嘗一日不放箸而策茗椀之勳者也。余嘗爲嗣直淪茗。因錄其滌煩破睡之功。爲之甲乙。建溪如割。雙井如處。日鑄如斲。其餘苦則辛。整甘則底滯。嘔酸寒胃。令人失睡。亦未足與議。或曰。無甚高論。敢問其次。涪翁曰。味江之羅山。嚴道之蒙頂。黔陽之都濡。高株瀘川之納溪。梅嶺夷陵之壓軛。臨邛之火井。不得已而去於三。則六者亦可酌兔褐之甌。淪魚眼之鼎者也。或者又曰。寒中瘠氣。莫甚於茶。或濟之鹽。勾賊破家。滑竅走水。又況雞蘇之與胡麻。涪翁於是酌歧雷之醪醴。參伊聖之湯液。斯附子如博。投以熬葛。僂之堊。去藪而用鹽。去橘而用薑。不奪茗味。而佐以草石之良。所以固太倉而堅作彊。於是有胡桃松實。菴摩鴨腳。勃賀摩蕪。水蘇甘菊。旣加臭味。亦厚賓客。前四後四。各用其一。少則美。多則惡。發揮其精神。又益於咀嚼。蓋大匠無可棄之材。太平非一士之略。厥初貪味雋。永速化湯餅。乃至中夜。不眠耿耿。旣作溫齊。殊可屢敵。如以六經濟三尺法。雖有除治。與人安樂。賓至則煎。去則就榻。不游軒后之華胥。則化莊周之胡蝶。

別友賦送李次翁

黃庭堅

曩聞義於孫李。指尊選以見招。惜予行之舒舒。曰其夜以爲朝。予望道於堦垣。見萬物之富有。恨逸駕之絕塵。又騁予以四牡。喟車後之無策。其四方乎索友。仰雲飛而注弋。俯淵靚之沈鉤。或一能之勝予。忘日月之不予謀。或登吞舟之鱗。或下垂天之翼。手予弓而不釋。恐斯道之或息。維廬江之四李。三隱約於龍眠。維若人之仕蚤。懷明月而麗川。歲庚午而會梁。語聞道之大用。吸江漢以爲深。累丘嶽以自通。尾擊之而首應。西犯之而東抗。棄旗鼓而不逐。儼其陳之堂堂。偉道學之崇峯。增懦夫之激昂。觀出日於東方。雖於食馬而不吝。無肯綮以自試。居自喜於餘刃。彼覆卻之萬方。期斯言之猶信。水渾渾而進舟。風剌剌而侵裘。恐事親之不勸。則惟是之同憂。

汴都賦

周邦彥

臣邦彥頓首再拜曰。自古受命之君。多都於鎬京。或在洛邑。惟梁都於宣武。號爲東都。所謂汴州也。後周因之。乃名爲京。周之叔世。統微政缺。天命蕩杙。歸我有宋。民之戴宋。厥惟固哉。奉迎鸞輿。至汴而上。是爲東京。六聖傳繼。保世滋大。無內無外。涵養如一。含牙帶角。莫不得所。而此汴都。高顯宏麗。百美所具。億萬千世承學之臣。弗能究宣。無以爲稱。伊彼三國。割據方隅。區區之霸。言餘事乏。而三都之賦。磊落可駭。人到于今。稱之矧皇。居天府而有遺美。可不愧哉。謹拜手稽首獻賦曰。

發微子客游四方。無所適從。旣倦游。迺崎嶇。邇迥迥。造於中都。觀土木之妙。冠蓋之富。煒燁煥爛。心駭神悸。瞋瞞而不敢進。於是夷猶於通衢。彷徨不知所屆。適遭衍流先生。目而招之。執其袂。局局然嘆曰。觀子之貌。神采不定。狀若失守。豈非蔽席隱茅。未游乎廣廈。誅草鉏棘。未擷乎蘭蕙。披褐挾縵。未曳乎綺縠。微邦

陋邑未覩乎雄藩大都者乎。發微子姤然有赧色。曰：臣翺翔乎天下。東欲究扶桑。西欲窮虞淵。南欲盡反戶。北欲徹幽都。所謂天子之都。則未嘗歷焉。今先生訊我。誠有是也。然觀先生類辯士。其言似能碎崑崙而結溟渤。鏤混沌而形罔象。試移此辯。原此汴都。可乎。臣固不敏。謹願承教。先生笑曰：客知我哉。於是申喙據牀。虛徐而言曰：噫。子獨不聞之歟。今天下混一。四海爲家。令走絕徼。地掩鬼區。惟是日月所會。陰陽之中。據要總。殊搃鍵。制樞拱。衛環周。共安乘輿。而此汴都。禹畫爲豫。周封鄭地。觜觶臨而上。直實沈分以爲次。惟蓬澤之故境。昔合廡之所至。芒碭渙渦。截其面。金隄玉渠。累其脊。雷夏灘沮。繞其脇。羸丘營婁夾其腴。梁周帝據而糜沸。唐漢尹統而寧一。故此王國。襲故不徙。恢圻甸域。尊崇天體。司徒制其畿疆。職方辨其土地。前千官而會朝。後百族而爲市。分疆十同。提封萬井。舟車之所輻輳。方物之所灌輸。宏基融而壯址植。九鼎立而四嶽位。仰營域而體極。立土圭而測晷。蜀險漢盆。荆惑閩鄙。惟此中峙。不首不尾。限而不迫。華而不侈。環睇賾於郡縣。如岫嶺之迤邐。觀其高城萬雉。埤堦鱗接。繚如長雲之方舒。屹若崇山之礧礧。坤靈因最。屬而跼躅。土怪畏榨。壓而妥貼。靡胥不可。絕而登。爵鼠不可。嚼而穴。利過百二。嶮踰四塞。鄙秦人之踐華。陋荊州之卻月。頓捷步與超足。矧蹻跚與蹙蹙。闕城爲門。二十有九。瓊扉塗丹。金鋪鏤獸。列兵連卒。呵夜警晝。異物不入。詭邪必究。城中則有東西之阡。南北之陌。其衢四達。其塗九軌。車不理轂。互人不爭。險易。劇驂崇期。蕩夷如砥。雨畢而除。糞夷菲穢。行者不馳而安步。遺者惡拾而恣棄。跨虹梁以除病涉。列佳木以安怵惕。殊異羊腸之詰曲。或踈蹶而折轉。顧中國之闐闐。叢貨贗而爲市。議輕重以奠賈。正行列而平肆。竭五都之瓊富。備九州之貨賄。何朝滿而夕除。蓋趨贏而去賸。萃駟僧於五均。擾販夫

於百隧。次先後而置敝。遷有無而化滯。抑彊賈之乘時。摧素封之專利。售無詭物。陳無竄器。欲商賈之阜通。迺有墜而不稅。銷卓鄭猗陶之殖貨。禁乘堅策肥之擬貴。道無游食以無爲。矧敢婆娑而爲戲。其中則有安邑之棗。江陵之橘。陳夏之漆。齊魯之麻。薑桂藁穀。絲帛布縷。鮫魴鮪鮑。釀鹽醴鼓。或居肆以鼓鑪橐。或鼓刀以屠狗彘。又有醫無閭之珣玕。會稽之竹箭。華山之金石。梁山之犀象。霍山之珠玉。幽都之筋角。赤山之文皮。與夫沉沙棲陸。異域所至。殊形妙狀。目不給視。無所不有。不可殫紀。若夫帝居宏麗。人所未聞。南有宣德。北有拱辰。延亘五里。百司雲屯。兩觀門峙。而竦立。罌恩遐望。而相吞。天河羣神之闕。紫微太一之宮。擬法象於穹昊。敞閭闔而居至尊。樸桷不斷。素題不枿。上圓下方。制爲明堂。告朔朝歷。頒宣憲章。謂之太廟。則其中可以敍昭穆。謂之靈臺。則其高可以觀氛祥。後宮則無非員無錄之女。佞倖滑稽之臣。陋甘泉與楚宮。繆延壽與阿房。信無益於治道。徒竭民而怠荒。故今上林仙籙。不聞乎鳴蹕。瓊甌歲久而苔蒼。其西則有寶閣靈沼。巍峨泛灑。繚以重垣。防以回隄。雲屋連簷。瓊欄壓墀。池水則溶溶沄沄。洋洋湜湜。涵潤澗澗。瀟灑浩浩。微風過之。則瀾汎澗澗。漫散洄淀。潛潛漣漪。大風過之。則汨湧潏灑。瀟灑滂沱。掀鼓漾溢。不見津灤。儼欄景以斷續。漾金碧而陸離。恍馮浯與方壺。帝令鬼鑿而神移。其中則有孤蕩菹蘆。茵莖蓮蕩。蓂蘋薔葦。其魚則有鱣鯉鯨鮪。鰲魼鯢鱈。魴鱒鱖鱣。鰕歸王鮪。科斗魁陸。鼉鼉鼈蜃。含蜃巨螯。容與相羊。蔭藻衣蒲。其鳥則有鴨鵝鵝鵝。鵝鷺鳧鷖。鸚鵡鷓鴣。鶻鵠鸚鵡。鶴鷓楚雀。鶴鷓揮霍。鸞鶴龜龜。羣鶴眷啄。其木則有檟檣栢欄。梗楠栴檀。檣檣檳榔。槩柘桑楊。梓杞豫章。勾科扶疏。蔽蒂竦尋。集弱椅施。挈枝刺條。條榦蟠根。矯躩鱗皴。其下則有申葉蘭茝。芸芝荃蓀。髮布絲勻。馥郁清芬。其氣襲人。上方欲與

百姓同樂。大開苑圃。凡黃屋之所息。鸞輅之所駐。皆得窮觀而極賞。命有司無得彈劾也。於時則有絕世之巧。凝神之技。恍人耳目。使人忘疲。是故宮旋室浮。鱣艦移也。蛟螭蜿蜒。千棹渡也。虺虎鬻鱗。角抵戲也。壘流電掣。弄丸而揮劍也。鸞悲鳳鳴。織麗歌也。鴻驚燕居。綽約舞也。靈震雷動。鈞天作也。犇麤駟驥。羣馬闐也。辮鞴輶輻。萬車轍也。灑天駘日。揚埽塏也。杌山蕩海。歡聲同而和氣浹也。震委蛇而嘯罔象。出鮫人而舞馮夷者。潛靈幽怪。助喜樂也。若迺豐廩貫膾。既多且富。永豐萬盈。廣儲折中。順成富國。星列而棊布。其中則有元山之禾。清流之稻。中原之菽。利高之黍。利下之稌。有釐有芑。有秬有秠。千箱所運。億廩所露。入既夥而委積。食不給而紅腐。如坻如京。如阜如野。無菜色。溝無損瘠。攜拾狼戾。足以厭饑夫。與寡婦。備凶旱之乏絕。則有九年之預。又將敦本而勸稼。開帝籍之千畝。良農世業。異物不覩。播百穀而克敏。應三時而就緒。蹠鎛鎧闕。灌暉雨霏。孰任其力。侯疆侯以。千耦其耘。不怒自力。疏邈其理。狼莠不植。奄觀堅阜。與與蕤蕤。溝塍畹畦。亘萬里而連繹。醜惡不毛。磽陿荒瘠。化爲好時。轉名不易。惟彼汴水。貫城爲渠。並洛而趨。昔在隋葉。禊丁大業。欲爲流連之樂。行幸之游。故鑿地導水。南抵乎揚州。生民力盡於畚鍤。膏血與水而爭流。鳳觸徒見於載籍。玉骨已朽於高丘。顧資治世以爲利。迄今抗筏而浮舟。桃花候漲。竹箭比駛。洶湧澗灑。瀉洑沸灑。掬防巖岸。滂瀉迅邁。匪江匪海。而朝夕舞乎滂湃。掀萬石之巨艦。比坳堂之一芥。舵艣不時而相值。篙師颺拱而俟敗。智者不敢睥睨。而興作。繇千禩而爲害。豈積患切病。待聖人而後除耶。厥有建議。導河通洛。引宜禾之清源。塞擘華之渾濁。蹙廣堤而節暴。紆直行而殺虐。其流舒舒。經炎涼而靡涸。於是自淮而南。邦國之所仰。百姓之所輸。金穀財帛。歲時常調。舳艫相銜。千里不絕。越舡吳艫。官

艘賈舶閩謳楚語。風帆雨楫。聯翩方載。鉦鼓鏗鈴。人安以舒。國賦應節。若夫連營百將。帶甲萬伍。控弦貫石。動以千數。其營則龍衛神勇。飛山雄武。奉節拱聖。忠靖宣効。吐渾金吾。擲颺萬勝。渤海廣備。雲騎武肅。材能蹶張。力能挾輶。投石超距。索鐵伸鉤。水執鼉鼉。陸拘羆貅。異黨之寇。大邦之讎。電驚雷擊。莫不繫纍。而爲囚。於是訓以鸛鵲魚麗之形。格敵擊刺之法。剖微中虱。貫牢徹札。揮鉞擲鏃。舉無虛發。人則便捷。器則犀利。金角丹漆。脂膠竹木。以時取之。遴棄惡弱。割蛟革以連函。剡兕觥以爲引。刺魚服以懷鑿。百工備盡。錙磨鏤削。其成鑿鋼。而鏤植之霜凝。而電爍。故有彊衝勁弩。雲梯轆車。脩鍛延蹤。銛戈兌父。繁弱之弓。肅慎之矢。谿子之弩。夫差之甲。龜蛇之旒。烏隼之旗。軍事蚤正。用戒不虞。其次則有文昌之府。分省爲三。列寺爲九。殊監爲五。左選爲文。右選爲武。曰三十房。二百餘案。二十四部。黜隋之陋。更唐之故。補弊完罅。剔朽焚蠹。人夥地溥。事若織組。滋廣莫治。聲聲成蠱。纖弱不除。將勝戕斧。雖離婁之明目。迷簿書而莫覩。豪胥倚文以鬻獄。庸吏瘞官而受侮。各懷苟且。以逃責。孰肯長慮而卻顧。官有隱事。國有遺利。紛訟牘於庭庀。繫繫囚於囹圄。此浮彼沉。甲可乙否。操私議而軋沕。各矛盾而齟齬。於是合千司之離散。儼星羅於一字。千梁負棟。萬楹鎮礎。誅喬松以爲煤。空奧山而斷楮。官有常員。取雄材偉器者以充其數。上維下制。前按後覆。譬如長蛇。扶其脊膂。而首尾皆赴。闔戶而議。飛檄乎房闔。應答乎秦楚。披荒榛而成徑。釋繳縛而得緒。崇善廢醜。平險除穢。纖悉不遺乎一羽。於是宣其成式。變亂易守者。刑之所取。貽之後昆。永世作矩。至若儒宮千楹。首善四方。勾襟逢掖。褒衣博帶。盈切乎其中。士之匿華鏟采者。莫不拂巾衽。裼彈冠結綬。空巖穴之幽邃。出郡國之遐陋。南金象齒。文旄羽翮。世所罕見者。皆傾囊鼓篋。羅列而願售。咸能湛

冰乎道實沛然攻堅而大叩先斯時也皇帝悼道術之沉鬱患詰訓之荒繆諸子騰躡而相角羣言駘蕩而莫守黨同伐異此妍彼醜挈俗學之蕪穢詆淫辭而擊掙滅冥突之熒燭仰天庭而覩晝同源共貫開覆發葩於是俊髦並作賢才自厲造門闈而臻壺奧騁辭源而馳辨囿術藝之場仁義之藪溫風扇和儒林發秀宸眷優渥皇辭結糾榮名之所作慶賞之所誘應感而格駒行雉响磨鈍爲利培薄爲厚魁梧卓行撈鋒露穎不驅而自就復有珮玉之音籩豆之容絃歌之聲盈耳而溢目錯陳而交奏煥爛乎唐虞之日雍容乎洙泗之風誇百聖而再講曠千載而復觀又有律學以議刑制算學以窮九九舞象舞勺以道幼稚樂德樂語以教世胄成材茂德隨所取而咸有若夫會聖之宮是爲原廟其制則般輸之所作其材則匠石之所掄萬指舉築千夫運斤揮汗霏霧吁氣如雲鞀鼓弗勝靡有諗勤赫赫大字有若山踊而嶙峋下盤黃墟上赴北辰藥珠廣寒黃帝之宮榮光休氣籠曠往來葱葱鬱鬱而氤氳其內則檐椽棧題采賢楹桶闌棋闈闔屏宇闔閣聳張矯踞龍征虎蹲延樓跨空甬道接陳黝堊備曄燦爛詭文菱阿芙蓉之流漫驚波迴連之瀟泅飛仙降真之縹緲翔鶴鸞鷗之甃甃地必出奇土無藏珍球琳琅玕璠璵瑤琨流黃丹沙玳瑁翡翠垂棘之璧照夜之蠟鵠象鬣角割犀剗玉鏤刻雕鏤其妙無倫焜煌煥赫璀璨輝映繁星有爛彤霞互照軒廡所繪功臣碩輔書太常而銘鼎彝者環列而趨造龍章鳳姿塊形瑋貌文有伊周武有方召猶如蹇誥以立朝圖寧社稷指斥利害踟躕四顧而不撓其殿則有天元太始皇武儷極大定輝德熙文衍慶美成繼仁治隆之名重曠隆準天日炳明皇帝步送百寮拜迎九卿三公挾輔扶衡儀仗衛士填郛溢城于時黔首飈集百作皆停地震嶽移波翻海傾足不得旋耳不得聽神旣安止窮閭微巷

惟聞咨嗟嘆異之聲。於是山疊房俎。犧樽竹筐。踐列於兩楹。瞽史陳辭。宰祝行牲。案芻豢之肥臞。視物色之犖駮。登降裸獻。百禮具成。至於天運載周。甲子新曆。受朝萬方。大慶新闢。于時再鼓聲絕。按稍收鏞。儼三衛與五仗。森戈矛與戈戟。探平明而傳點。趣校尉而唱籍。千官鶩列以就次。然後奏中嚴外辦也。撞黃鍾以啓樂。合羽扇以如翼。伏飛道。駕以臨座。千牛環帝而屏息。爐烟既升。寶符奠瑞。聆乾安之妙音。仰天顏而可覲。羌夷束髮而蹈舞。象胥通隔而傳譯。宣表章以上聞。奏靈物之充斥。羣臣迺進萬年之觴。上南山之壽。太尉升奠。尙食酌酒。樂有嘉禾靈芝。和安慶雲。舞有天下大定。盛德升聞。飲食衍衍。燔炙芬芬。威儀孔攝。而中度笑語不諱。而有文。故無族譚錯立之動衆。躡席布武之紛耘。蓋天子以四海爲宅。有百姓而善羣。廷內不洒掃而行禮。則天下雲擾而絲棼。故受玉而惰。知晉惠之將卒。執幣以傲。知若敖之不存。聞樂而走者。爲金奏之下作。雖美不食者。爲犧象之出門。賦滿露彤弓。而武子不敢答。奏肆夏大明。而穆子不敢聞。蓋禮樂之一缺。則示亂而昭昏。是以定王享士會以殺烝。而刑三晉之法。高祖因叔孫之制。而知爲帝之尊。豈治朝之禮物。尙或展翳而沉湮。此所以舉墜典而定彝倫者也。其樂則有咸池承雲。九韶六英。采齊肆夏。簫韶九成。神農之瑟。伏羲之琴。倕氏之鍾。無句之磬。鏗鏗鏗鏗。和氣薰蒸。于以致祖考之格。于以廣先王之聲。昔王道旣弱。淳風變澆。樂器遭鄭衛而毀。矇瞽適秦楚而逃。朝廷慢金石之雅正。諸侯受歌管之敖嘈。文侯聽淫聲而忘倦。桓公受齊樂而輟朝。季子始無譏於鄆。仲尼迺忘味於韶。故使制度無考。中聲浸消。非細則擗。非庠則高。惟今也。求器得耕野之尺。吹律有聽鳳之簫。或灑或離。或鼗或鑿。或鏞或棧。或管或笳。衆器俱舉。八音孔調。鸞鷲離丹穴而來集。鳴嚶啾而舞脩。又有賓旅巴渝之舞。僮

侏狄鞮之倡。遠人面內而進技。踰山海而梯航。故納之廟者。周公所以廣魯。觀之庭者。安帝所以喜其來。王若其四方之珍。以時修職。取竭天產。發窮人迹。砥其遠邇。陳之藝極。厥材竹木。厥貨龜貝。厥幣錦繡。厥服絺綌。旃貢羽毛。祀貢祭物。嬪貢絲枲。物貢所出。器貢金錫。礪砥磐丹。鈇松怪石。惟金三品。惟土五色。泗濱浮磬。羽畎夏翟。龍馬千里。神茅三脊。方箱橢筐。肆陳乎殿陛。豐苞廣匱。亟傳乎騎驛。連檣結軌。川咽塗塞。職歛終歲而不息。至於羗氏。焚翟儋耳。雕脚獸居。鳥語之國。皆望日而趨。累載而至。懷名琛。拽馴獸。以致於闕下者。旁午。迺有帛氎。鬪麤。蘭干細布。水精琉璃。軻蟲蚌珠。寶鑑洞膽。神犀照浦。山經所不記。齊國所不覩者。如糞如壤。輪積乎內府。或致白雉於越裳。或得巨螭於西旅。非威靈之遐暢。孰能出瑰奇於深阻。蓋徼外能率。夾種來以修好。則中土當有聖人出而寧宇。然皇帝不寶遠物。不尙殊觀。抵金於嶄巖之山。沉玉於五湖之川。洞剽之劍。迺入騎士之鞘。齧鄴之馬。或服鼓車之轅。至於乾象表貺。坤維薦祉。靈物仍降。嘉生屢起。暈適背鏹。虹蜺抱珥。鳴星隕石。怪颺變氣。垂白鮐背者。不知有之。況能言孺倪。豈獨此而已也。復有穹龜負圖。龍馬載文。汾陽之鼎。函德之芝。肉角之獸。簫聲之禽。同穎之禾。旅生之穀。游郊栖庭。充畦冒時。非煙非雲。蕭索輪囷。映帶乎闕角。葱蔚乎城壘。鷺鳥不擢。猛獸不噬。應圖合諫。窮祥極瑞。史不絕書。歲有可紀。發微子於是言曰。國家之有若是歟。意者。先生快意於吻舌。而及此耶。先生曰。國家之盛。烏可究悉。雖有注河之辯。折角之口。終日危坐。抵掌而譚。猶不能旣其萬一。此特汴都之治迹耳。子亦知夫所以守此汴都之術。古昔之所以興亡者乎。客曰。願聞之。先生曰。繫此寰宇。代狹代廣。更張更弛。黃帝都涿鹿。而是爲幽州。少昊都窮桑。迺今魯地。伏犧都陳。帝嚳都亳。堯都平陽。迺若昊天而授人時。舜都蒲

阪。迺觀羣后而輯五瑞。公劉處幽。而兆王業之所始。太王徙邠者。以避狄人之所利。文王作豐。方蒙難而稱仁。武王治鎬。復戎衣而致父。蓋周有天下三百餘年。而刑措不用。及其衰也。亦三百餘年。而五伯更起。星離豆割。各據穀兵。以專利。彊侯協帶於弱國。不領人君之經費。天下日蹙。而日裂。中國所有者無幾。當時權謀爲上。雌雄相噬。孰有利背。兵孰先選。糧孰夙峙。孰有橋關之卒。孰有憑軾之士。孰有素德。孰有彊倚。孰欲報惠。孰欲雪恥。或奉下邑以賂讎。或舉連城而易器。骸骨布野。介冑生蟻。肘血丹輪。馬鞍銷髀。勢成莫格。國墟人鬼。噫彼土宇。凡幾吞而幾奪。幾完而幾弛。秦中形勢之國。加兵諸侯。如高屋之建瓴水。神臯天邑。以先得者爲上計。其他或左據函谷。右界褒斜。號爲百二之都。東有成臯。西有崤澠。定爲王者之里。以至置春陵之俠客。興泗上之健吏。扼襟控咽。屏藩表裏。名城池爲金湯。役諸侯爲奴隸。拓境斥地。輶轡荒裔。東包蟠木。西卷流沙。北繞幽陵。南裹交趾。厥後席治滋永。泰心益侈。或慢守以啓戎。或朋淫而招宄。橫調無藝。而垂竭。游役不時。而就斃。慮今日縱而不繼。鷺鷥厭觀。而常值。睡毗則覆尸。而流血。愉悅則結纓。而珮璫。粉墨雜糅。賢才逆曳。腫微訥。而竊肉食。賊臣迴穴。而圖大器。郡國制節。侯伯方軌。或爲大尾。而不掉。或爲重腿。而屢蹶。室有丹楹。城有百雉。朝廷無用於揚燎。冠冕不閑於執贄。天維披裂。地軸杌隳。羣生夔難。而殄瘁。雖有城池。周以鄧林。縈以天漢。曳輦可以陟崇巘。設附可以濟深水。故魏武侯浮西河而下。自侈其地。而進戒於吳起。蓋稅政肆於廟堂之上。則敵國起於蕭牆之裏。爰問左孟門。而右大行。左洞庭。而右彭蠡。發徵子曰。天命有德。主此四方。如輻之拱。如楫之會。極其碁鞏者。天與之昌。其闕柯者。天與之亡。且非易之所能壞。亦非險之所能藏。非愚之所能弱。亦非賢之所能彊。故將吞楚。

也。白地首斷於大澤。將繼劉也。雄雉先雒於南陽。龍絜出積。而槩弧隱亡周之語。葦收襲門。而天帝貽刑。號之殃。人力地利。信不能偃植。而支仆。而皆聽乎彼蒼。故鯨鯢勸解。決一死於吻血。兕虎闔關。踐巍嶽爲平崗。蹂生靈如躪塊。簸天下如揚糠。其敗也。抉目而拚骨。其成也。頂冕而垂裳。由此觀之。土地足以均沛。澤而施靈光而已。易險非所較。賢否亦未可議也。先生曰。以易險非所較者。固已乖矣。以賢否非議者。烏乎可哉。客不聞王公設險以守其國。有德則昌者乎。地欲得險。勢欲參德。迫隘卑陋。則無以容萬乘之扈。從。供百司之廩餼。據偏守隅。則無以限四方之貢職。平道理之遠邇。撫原申區。割宅製里。走八極而奔命。正南面而負辰。舉天下於康達。力士轡鞞。而不敢取。貪夫汗縮。而不敢睨者。恃德之險也。襟馮終南太華之固。背負清渭濁河之注。搯人之吭。而拊人之脊。一日有變。而萬卒立具。然而布衣可以窺隙。而試勇。匹夫可以爭衡。而號呼。彼天府之衍沃。適爲人而保聚。此以地爲險者也。地嚴德暢。然後爲神造之城。天設之阻。大哉炎宋。帝眷所矚。而此汴都。百嘉所毓。前無湍激旋淵。呂梁之絕流。後無太行石洞。飛狐句望。浚深之岩谷。豐樂和易。殊異四方之俗。兵甲士徒之須。好賜匪頒之用。廟郊社稷百神之祀。天子奉養羣臣。稍廩之費。以至五穀六牲。魚鼈鳥獸。闔國門而取足。甲不解纍。刃不離鞬。秉鉞匈奴。而單于奔幕。抗旌西。熨而冉驪。螳伏。南夷散徒。黨而入質。朝鮮畏菹醢。而修睦。解編髮而頂文弁。削左衽而曳華服。逆節躑躅。而取禍者。折簡呼之。而就戮。耽耽帝居。如森鋌利鏃之外向。死士逡巡。而莫觸。仁風冒於海隅。頌聲溢乎家塾。伊昔天下。阨危。王猷失度。皇綱解紐。嗥豺當路。帝懷寶曆。未知所付。可受方國。莫越藝祖。圖緯協期。謳謠扇孺。赤子雲望。而風靡。英雄螽趨。而蠅附。玉帛駿奔者。萬國冠冕。充塞乎寰宇。絕塞稅鎧。而免軸障。

壘熄燧而摧櫓。拜檻神威。有此萬旅。奕世載德。蔑聞過舉。髮櫛禾耨。子構稚哺。擊菓懋穗。疏惡鑿嫵。鉞觚角之磳刻。刺撻搶而牧圉。爰暨皇帝。粉飾朴質。稱量纖鉅。鏗鏘奏廟之金玉。璨璨夾楹之簠簋。訓典嚴密。財本豐阜。刑罰糾虔。布施優裕。田有願耕之農。市有願藏之賈。草竊還業而歛迹。大道四通而不戢。車績馬連。千百爲羣。肩輿輻載。前卻而後跂。搏壤歌謔者。萬井未聞。歐嚙而告瘳。雖立墻爲界。其誰敢僑。膊以批棹。況此汴都者乎。抑又有天下之壯。客未嘗覩其奧也。且宋之初營是都也。上睇天時。下度地制。中應人欲。測以聖智。建以皇極。基以賢傑。限以法士。垣以大師。屏以大邦。扞以公侯。城以宗子。以義爲路。以禮爲門。鍵鑰以柄。開闔以權。掃除以政。周裹以恩。迺立室家。以安吾君。有庭其桓。社稷臣也。有榭其桷。衆材會也。有闈孔張。通厥明也。有牖孔陽。達厥聰也。其檻如衡。前有憑也。其壁如削。後有據也。其陛則崇。止陵踐也。其極則隆。帝居中也。邑都旣周。宮室旣成。於是上意自足。迺駕六龍。乘德輿。先警蹕。由黃道。馳騁乎書林。下觀乎學海。百姓欣躍。莫不從屬。車之塵而前邁。妙技皆作。見者膽碎。迺使力士。提挈乎陰陽。搏挽乎剛柔。應乎成器。方圓微碩。或粉或白。隨意所裁。上方咀嚼乎道味。斟酌乎聖澤。而意猶未快。又欲浮槎而上。窮日月之盈昃。尋天潢之流派。操執北斗之柄。按行二十八壘之次。奪雷公之枹。收風伯之鞞。一瞬之間。而甘澤霽霈。囚孛彗於幽獄。敷景雲而黯靄。統攝陰機。與帝唯諾。而無闕。如此淫樂者。十有七年。疲而不止。諫而不改。吾不知天王之用心。但聞夫童子之歌曰。孰爲我尸。孰釐我載。茫茫九有。莫知其界。客迺覩覩然驚。拳拳然謝曰。非先生無以刮吾之矇。藥吾之贖。臣不能究皇帝之盛德。謹再拜而退。

宋文鑑卷第八

賦

大禮慶成賦

張耒

齋居賦

張耒

鳴雞賦

張耒

雨望賦

張耒

鳴蛙賦

張耒

哀伯牙賦

張耒

求志賦

晁補之

大禮慶成賦

張耒

惟宋六世皇帝踐祚之七年。所以和同天人。綏靜中外。垂鴻襲裕。增高累厚。以對神祇。祖考者。固已蒙被。充塞光融。翕赫六合。一意四海。一口無得而言矣。粵以壬申之仲冬。將有事于南郊。乃詔列位。恪職賦事。而有司建言。惟我國家。因時施禮。郊丘之位。天地咸在。牲幣並薦。禮樂合舉。而古者乃以陰陽之至。卽南北之郊。別位殊時。薦獻異數。有司其何從。於是天子惕然深思。祇畏敬戒。曰。茲大事。我其敢專。羣公卿士。典禮之官。竭思和會。以訂不易。於是議者曰。先王齊明以享帝。而帝之享否。雖聖人未由知之。惟受福者。

其享之占也。恭惟國家合祭天地于茲六世矣。惟我太祖躬膺駿命。以遏亂略。堂皇二儀。拓落八極。以定萬世之業。太宗威定宇內。震蕩大鹵。以一九有定天下於一尊。眞宗熙洽富盛。符瑞委積。南牧之獮不戰請命。威加北荒。奏功僭宗。仁宗席安據厚。不動指顧。孽獠猾羌。含毒內向。吏士未頓。藏竄屈伏。終始太平。垂五十年。英宗入纂。百姓與能。神考有爲。六服承德。此可謂受天地之福矣。然則神祇之安吾享也。其久哉。於是天子乃翳青雲之屋。乘雕玉之輿。應龍受轡。招搖翼輶。建虹霓之修竿兮。颺彗星之飛旂。太一執節以先駟兮。二十八星拱手布武。經營而周流。貔貅六師。雷霆萬乘。初海沸而雲湧。忽山峙而川靜。蓋天子粹然玉溫。健然天運。望宮門而動色。顧執策而命進。惟烜赫之靈源兮。實鼻祖於神明。覽光德而來降兮。館玉宇之嚴清。張咸英之廣樂。備千籥之盛舞。景光交徹。鸞鶴來下。神嬉靈豫。醉爵飽俎。翼翼清廟。觀德之宮。七聖在天。時降于宗。世有哲孫。豈弟無疆。惠我文人。瞻祖祏而念功兮。顧禰室而感親。聖孝油然而發中兮。在位望而含辛。霽暘告旦。祥飈掠塵。從我髦士。來祇精禋。御史肅吏。司馬飭兵。旣透透遲遲。雲流而日行兮。汭洵洵業業。海運而天聲。靈旗洪旆。翕赫歛霍兮。攢拏龍虎。而亂鯤鵬。雄鷲憎威而震伏兮。柔良化禮而肅清。弛威弧戢天戈兮。固已熄滅蚩尤。而折機槍。執飛廉。圍商羊。屬之有司兮。羲和磨刮。披拂盡獻其光明。蓋傾都空閭。翹首跂足。俯窺履綦。傍覘佩玉者。忽焉不知手之加額。口之成祝也。於是背都城。望帷宮。郊垌坦其迤邐兮。場圃旣寒而畢功。頽青雲以連屬。粲虹霓之經緯。紫微下屬於兩觀。勾陳錯施於萬雉。扶傾之神仰立而拱。翔德龍下抱而曳。疑神變之歛成兮。涌九地而出峙。連廡千柱。廣殿萬杙。飛薨鬪桷。洞牖屹壁。酸股之隅。眩目之極。唐洛執筭而莫計。班倕操斤而自惑者。類非資材於斷塹。而皆

機杼之紡績也。一室之用。足以溫一家。一宮之費。何啻衣一國。驚霆之蹕。既震。洶壑之聲。咸寂。啟齋寢之靜深兮。何清虛而邃密。天子方端而虛儼。而一多儀未舉。精意已塞。甲夜始晦。嚴鼓載作。飛斂走伏。神讐鬼愕。望舒騰精以燭宵兮。玄冥收威而布德。靈囂五震。軫車將中。天子乃被袞執玉兮。齊明莊栗之誠。動于進趨。表于形容。千燎具揚。萬炬畢融。上揜熒惑。旁爍燭龍。近爲朝暘。遠爲融風。赫赫曦曦。煌煌輝輝。列次之士。野屯之師。歸如酌醇醪。而御兼衣。黃流汪洋。璧玉照徹。祥祲衡布。協氣下浹。音爲樂和。形爲人悅。白質之獸。簫聲之鳥。紛披雜沓。應奏而舞節。陟降既周。燎煙始升。奔星走虹。奉璧薦牲。豐降奔馳。而仰鶩兮。祝融焜煌而上征。開闔闔兮。闢清都。后帝燕兮。百神愉。圓錫蓋兮。方獻輿。岳輸固兮。溟効濡。於是禮備樂成。整車而旋。萬類環極。端門闕天。賞出千庾。恩流百川。北包大壤。南盡島蠻。西越流沙。東窮海壖。令未脫口。雷連風傳。野無窮人。獄無宿愆。破械解縲。負帛囊錢。車反其舍。士復其伍。効技呈才。千饒萬鼓。天子舉酒以屬羣公。咸曰休哉。天子之功。系曰於穆。聖主建皇極兮。嚴恭精禋。帝來格兮。柔祇並位。儼牲璧兮。文祖右坐。臨有赫兮。於惟祖宗。有常則兮。諱兵畏刑。後貨食兮。政有損益。茲不易兮。帝則鑒之。戩穀錫兮。兢兢業業。日一日兮。三載一祀。年萬億兮。

齋居賦

張 耒

仲夏之月。陰氣始至。陽旣盛而初剝。陰浸亨而用事。水伏畏涸。火燎方熾。其於人也。心實過炎。而腎受其弊。惟人之生。受命在子。推卦曰坎。於行爲水。微陽所潛。元氣之始。故火甚烈。則正氣或因而衰。則水受害者。君子之所深畏。於是屏事燕息。滌慮齋居。旣靜事以無形。又遠眺而高居。卻紛華而弗陳。與淡泊乎爲。

徒絕嗜。窒慾。愛精。蓄神。聲色不御。滋味罕親。冲然與和。俱遊湛兮。以道合真。故能體強志寧。愉樂壽考。遠去疾厲。保此難老。嗚呼。苟能推此以盡道。考此以察物。則豈惟齋戒以御時。宜其顛沛而勿失。且夫冰炭相乘。利害交至。隕真盜和。豈獨陰沴道心。惟微易失。難常困於侵陵。有如微陽。則浣心滌志。以卻外垢。虛中保和。以全天君。故能涉至變而不濡。更萬變而常存。蓋將窮年以齋居。豈特養生而善身乎。

鳴雞賦

張耒

先生閑居學道。昧旦而興。家畜一雞。司晨而鳴。畜之既老。語默有程。意氣武毅。被服鮮明。峨峨朱冠。丹頸玄膺。蒼距矯攫。秀尾翹騰。奉職有恪。徐步我庭。啄粟飲水。孔肅靡爭。山川蒼蒼。風霰宵凝。黯幽窗之紈紈。恍余夢之初驚。萬里一寂。鐘鼓無聲。聞振衣之膈膊。忽孤奏而泠泠。委更籌之雜亂。和城角之淒清。應雲外之鳴鴻。弔山巔之落星。歌三終而復寂。夜五分而既更。萬境皆作。車運馬行。先生杖屨而出。觀大明之東生。

雨望賦

張耒

淡海天之蒼茫。觀驟雨之滂霈。飄風擊而雲奔。曠萬里而一蔽。卒然如百萬之卒。赴敵驟戰兮。車旗崩騰。而矢石亂至也。已而餘飄既定。盛怒已泄。雲逐逐而散歸。縱橫委乎天末。又如戰勝之兵。整旗就隊。徐驅而回歸兮。杳然惟見夫川平而野闊。夫雲霞風月之容。雷雨電雹之變。非巧力之能爲。蓋人間之絕觀。必也。登雄樓傑閣。惟崢嶸。憑高山巨海之空曠。徹除耳目之障蔽。而後能窮極變化之奇狀。嗟我居之卑湫。今束視聽於尋丈。顧所欲之莫得兮。徒臨風而惆悵。

鳴蛙賦

張耒

余寓山陽學舍。夏大雨。屋四隅成塘。聚蛙以千計。聲鳴不絕。夜爲不能寐。客有獻予以殺蛙之術。曰：投余藥一丸。蛙無類矣。童子將用之。予曰：不可。復爲賦示之。夏雨初止。積潦過尺。有蛙百千。更跳互出。幸此新霽。夜月清溢。我勞其休。歸偃於室。于時蛙鳴。若嘯若啼。若訴若歌。若歡若悲。若喜而語。若怒而詬。若噉而嘔。若咽而嗽。瘖者之呼。吃者之鬪。或急或緩。或清或濁。若羌絲野鼓。雜亂無節。今又似夫蠻歌獠語。詭怪之迭作也。爾其困於泥潦。失其所處而悲。又若夫旱暵既久。得其所處而樂也。爰有童子。持燭來謁。曰：蛙羣夜鳴。君寢其聒。考之周官。洒灰驅蛤。君其教之。余得盡殺。余語童子。爾無是酷。爾樂而歌。而哀則哭。哭則悲嗟。樂有聲曲。聚語羣爭。引吭而呼。一日之間。不寧須臾。蛙不汝嫌。汝奚蛙誅。萬物一府。誰好誰惡。爾奚自私。己厚蛙薄。參通彼己。樂我自然。弭爾怒心。置燭而眠。夜半張子。援枕而吁。顧謂童子。記吾言歟。前言未究。請卒吾說。物各有時。夫誰敢遏。爾觀夫春露初霽。朝華始敷。文羽清喙。飛鳴自如。若奏琴箏。而和笙竽。清耳悅心。聽者爲娛。及夫陽春既徂。炎火將極。惡草蕃遮。淫潦瀦積。蛙於此時。生養蕃息。跳梁號呼。噫氣橫逸。子如之何時。不可逆時乎。時乎。美惡皆然。當其盛時。誰得而遷。及其雪霜既降。木實草衰。飛蠅聚蚊。孽無所施。於是此蛙歛吻收足。趺然土中。一聲不出。黨散巢披。不可終日。盛不可常。與衰迭來。子姑忍之。奚以殺爲哉。

哀伯牙賦

張耒

伯牙鼓琴。後世無如。我哀伯牙。似智而愚。天地之間。四方萬里。知爾琴者。一人而已。鍾子旣死。其一又亡。

欲彈無聽。泣涕浪浪。已奏已聞。欲語不可。悞塞滿懷。無所傾寫。折揚黃華。巷歌里曲。入邑娛邑。入國悅國。回視伯牙。面有矜色。夫操至伎者。必不和衆人之耳。而媚衆耳者。又善工之深恥。達衆者。常子子其無與。而冒恥者。乃身安而獲利。則亦安知夫至藝之非禍。而庸工之非耻也。嗟夫。將爲至巧者。必無顧於終身之無與。則至巧之於人。乃不祥之上器。操不祥之器。終身而不知。則伯牙者。乃後世之深戒。

求志賦

晁補之

幼余不自知。慙兮願求古人而與之遊。高乎邑於大野兮。魯東鄙而北鄒。固余心其悃款兮。求前聖又不遠。豈無鄰莫可與謀兮。治邴氏而俗泮。幽離房誠不忍兮。棄此而莫能藏。執徐之青陽兮。余先子兮東征。橫武林之大江兮。毗始寧之南邑。路會稽以周流兮。求歷山之所在。昔封嶠之世守兮。以後夫而致刑。越懲恥於夫椒兮。進樵女而抑心懿。二臣以國霸兮。卒焉異夫出處。行束薪而自言兮。妻不忍而求去。助申威於司馬兮。卒殞聲以淮南。睡訴死於婆婆兮。悲綽約之亦纖。彼章程之詭嘯兮。旣聘貽於甲夜。何仲御之清激兮。而亦云駭。夫觀者紛回穴其莫識兮。泮千載而迹陳。思苗山猶若茲兮。又何悲乎曲水。惟鄭公之志約兮。逢神人焉。靡求山峴。嶂而谷紆兮。風瀏瀏乎旦莫。耿吾何不可留此土兮。切悲越人之機。豈其食鮭而化音兮。無所用吾之綏。冬矇矇其多雨兮。夏瘴熱以生蠹。溪水之淺深兮。舟上下而擊石。吾遵夏蓋之山兮。聊以觀乎遠海。吾先子之初服兮。羌董道而不改。小人之有心兮。猶不假器。未余從於東安兮。依哲人而聞誼。蜀蘇子之有屨兮。漢遺化而多儒。往者其不可及兮。曷不從子之廬。胡余食兮山中。夕余宿乎江上。悲世俗之近市兮。余安能忍而與之皆往。余令樓季爲右兮。使王良前余。世解轡而馳石兮。緬

余得此坦塗。良吾轉使環瀋兮。密吾牙使撲屬。攬九州而顧懷兮。夫安知余力之不足。遭余生之懼憫兮。歸將毋乎故都。伏里門而畏鄰兮。幽獨守此四隅。時命大繆兮。吾遑遑欲何之。慨永夏之宜養。霜變然其萃之。增歔歔以啜泣兮。殺身其安可宇。摧榮而藩穴兮。雀鼠去而不舍。憫四序之不淹兮。春藹藹其既非。攬卉木猶若茲兮。吾獨不聊此時。悲予仲之婉孌兮。饒其心以詩禮。吾不能操贏而坐閭兮。耘東山而自食。歲旱曠而不雨兮。螟又生余之場。屬歲秋之有穀兮。河出墳而湯湯。於陵子之終褊兮。井上李其猶飽。服芬芳而潔腹兮。夫豈不足以忘老。衆麤豸而好朝兮。咸得時而的嚙。持衣裳而鬻暑兮。余固知余賈之不售。思遐舉而莫從兮。心紆軫而畫傷。訊黃石以吉凶兮。棋十二而星羅。曰由小基大兮。何有顛沛。既非初志之敢期兮。曾何以知其所繫。類清濟以去垢兮。芝九莖而爲華。宵倚楹而悲咤兮。疇獨憂余之無家。蕭苑候之慷慨兮。孰云非食之故。濟澶淵之靈津兮。橫中流而颺怒。思城闕之挑達兮。勉踵夫昔之人。羿之志於殼兮。亦反求夫余身。小人不知學禮兮。畏罪罟之所尋。宋七世之炳靈兮。皇純佑此下土。舉賢而授能兮。哀莞獨此黎庶。牧羊而肥兮。式亦用而有聞。辟雍之洋洋兮。宇千日而糾紛。連袂以成雲兮。汗而爲雨。豈余不足於同門兮。獨惆悵而延疇。先事而後得兮。惟其食者之費。舉九鼎於鯢淵兮。亦人假夫一臂。余張子之好修兮。蹇博大而無朋。雪霏而宇棟兮。松柏不改其青固。黃子嘗語余兮。曰此是爲明月。雖工師不以佩兮。保厥美亦未艾。彼喔咿爲已甚兮。羌浮石而沉木。子雲之好思兮。亦衆諄其寂寞。虞氏之爲政兮。舉五臣而與言。彼露霖之射谷兮。何足以容江潭之鱣。衆不察余之情兮。求余初猶未沫。超孤舉而遠尋兮。唯夫不足以論世。良恫韓而成漢兮。皓保惠而悟高。成功則去兮。曾何足以介其一毛。融躬行

既卒驕兮。禹服義亦太靡。陳輜車與乘馬兮。桓榮亦曾乎富貴。蕃居室以不理兮。滂之志以四海。允膺之激烈兮。羌不以生而害義。意豈弟神所嘏兮。何以罹此不祥。豈其莫忍鄰之粹兮。紛救鬪而得傷。嘉林宗之善哉。要成敗而不失。寧違不知時之可爲兮。行漁瀨以畢世。喟嵇康之蹈盡兮。愧孫子其安補。阮清吾而咎自兮。潛固自識而遠去。謂道不可爲兮。爲者敗之。衆悖然咸不留兮。惟至人焉在之。泮千祀而語鄰兮。孰與至人之服。意神龍之乘雲兮。吾欲從焉以足。士生各有遇兮。吾何爲侏僚兮。此時曾藿叔不足以化兮。求余身其庶幾。滋蘭以旨蓄兮。菊以爲糗。脩忠信以抑躁兮。大安知余之後圖。前聖吾永賴兮。攬百子與並興。時勦翔於道與兮。歷年歲以爲娛。

宋文鑑卷第九

賦

北渚亭賦

黃樓賦

送將歸

天下爲一家賦

南征賦

宣防宮賦

北渚亭賦

北渚亭。熙寧五年。集賢校理南豐曾侯輩。守齊之所作也。蓋取杜甫宴歷下亭詩以名之。所謂東藩駐皂蓋。北渚凌清河者也。風雨廢久。州人思侯。猶能道之。後二十一年。而祕閣校理南陽晁補之來承守。乏侯於補之。丈人行。辱出其後。訪其遺文故事。廬有存者。而圃多大木。歷下亭又其最高處也。舉首南望。不知其有山。嘗登所謂北渚之址。則羣峯屹然列於林上。城郭井闕。皆在其下。陂湖迤邐。川原極望。因太息語客。想見侯經始之意。曠然可喜。非特登東山小魯而已。迺撤池南葦間壞亭。徙而復之。請記其事。補之曰。賦可也。作北渚亭賦。其詞曰。

晁補之

秦觀

蔡確

呂大鈞

邢居實

劉跂

晁補之

登爽丘之故墟兮。睇岱宗之獨立。根旁礴而維坤兮。支扶疎而走隄。踰琅邪與鉅野兮。梁清濟而北出。前
漲漫而將屯兮。後摧離其相襲。坏者扈者。嶧者垣者。礪者礪者。障魯屏齊。曰惟歷山。或肺附之。箕拱環連。
勢厓絕而脈泄兮。萬源發於其間。谷射沙出。浸淫渠澗。澗澗汨泌。澎濤激瀾。忽漢起而成川。經營一國。其
利汾澮。防爲井沼。壅爲碓磳。得平而肆。迺滉漾而滂沛。經民間而貫府舍兮。瀦爲池之千畝。惟守之居。面
巖背阻。邈闔閭之遺址兮。肇嘉名乎北渚。悲經始之幾何兮。牛羊牧而宇顛。非境勝之爲難兮。善擇勝之
爲難。嘗試觀夫其園。千章之萩。合抱之楊。立而成阡。躋歷下之岩嶢。望南山之屏顏。脩榦大枝。出欄造天。
藐砢岫之蔽虧。乍髣髴其雲煙。思僊人之樓居。尙輕舉而高翻。盍駕言其北游。登斯渚而盤桓。崗巒忽其
翔舞。萩楊眇以如箸。撫千里於一瞬。收城郭乎環堵。其下陂湖汗漫。葭蘆無畔。菱荷荇藻。蘅荃杜葭。衆物
居之。浩若煙海。歲秋八月。草木始衰。乃命罾罟。觀魚其雉。鳴榔四合。方舟順涯。鱗鯉窘乎深塘兮。鴻鴈起
於中泚。復有桂舫蘭櫂。浮游其中。榜歌流唱。自西徂東。織餌投隈。微鱗掛空。客顧而嬉。傾盃倒鍾。明月出
於缺嶺。夕陽眇其微紅。天耿耿而益高。夜寥寥其方中。駭河漢之衝波。披海岱之冷風。恐此樂之難留兮。
願乘槎乎星渚。期韓終與偓佺兮。采芝英乎瑤圃。庶忘老而遺死兮。路漫漫其脩阻。於是酒酣太息。中座
語客曰。自昔太公。奄有此丘。是征五侯。桓公用之。攘狄尊周。方其盛時。山河十二。號稱東秦。臨菑遊樂。中
具五民。秋田青丘。實固海濱。而薛又其小邑也。區區之賦。食三千人。其彊孰與比哉。觀華不注。竭其孤嶽。
虎牙桀立。芙蓉菡萏。尙想三週。追奔執轡。下車取飲。僅以身免。困責質於蕭同。尙何私乎紀甗。而齊自是
亦不競矣。夸奪勢窮。雖彊安在。事以日遷。而山不改。則物之可樂。固不可得而留也。認而有之。來不可持。

所玩無固。去何必悲。此齊侯之所雪涕。而晏子之所竊嗤也。今我與客論古人。則知述屬有感。而歔歔。豈不重惑也哉。仕如行賈。孰非逆旅。託生理於四方。固朝秦而暮楚。曾無必於一笑。尙何知乎千古。於是客飄然喜。再拜舉觴而前曰。凡主人言。理實易求。而我曠然。已忘昔憂。使客常滿。使酒不空。請壽主人。如漢孔公。主人亦飄然喜。受飲反觴。執客之手而言曰。詩固有之。未見君子。憂心忡忡。旣見君子。云胡不樂。再拜洗觴而酬客。舍然大笑。

黃樓賦

秦觀

太史蘇公守彭城之明年。旣治河決之變。民以更生。又因修繕其城。作黃樓於東門之上。以爲水受制於土。而土之色黃。故取名焉。樓成。使其客高郵秦觀賦之。其辭曰。

惟黃樓之瓌瑋兮。冠雉堞之左方。挾光晷以橫出兮。干雲氣而上征。旣要眇以有度兮。又洞達而無旁。斥丹腹而不御兮。爰取法於中央。列千山而環峙兮。交二水而旁奔。岡陵奮其攫拏兮。谿谷效其吐吞。覽形勢之四塞兮。識諸雄之所存。意天作以遺公兮。慰平日之憂勤。繫大河之初決兮。狂流漫而稽天。御扶搖以東下兮。紛萬馬而爭前。象罔出而侮人兮。螭蜃過而垂涎。微精誠之所貫兮。幾孤墉之不全。偷朝夕以昧遠兮。固前識之所羞。慮異日之或然兮。復歷之以茲樓。時不可以驟得兮。姑從容而浮遊。儻登臨之信美兮。又何必乎故丘。觴酒醪以爲壽兮。旅殺核以爲儀。儼雲霄以爲侍兮。笑言樂而忘時。發哀彈與豪吹兮。飛鳥起而參差。悵所思之遲暮兮。綴明月而成詞。噫變故之相詭兮。逾傳馬之更馳。昔何負而遑遽兮。今何暇而遨嬉。豈造物之莫詔兮。惟元元之自貽。將苦逸之有數兮。疇工拙之能爲。躋哲人之知其故兮。

蹈夷險而皆宜。視蚊虻之過前兮。曾不介乎心思。正余冠之崔嵬兮。服余佩之焜煌。從公於樓兮。聊裴回以倘佯。

送將歸賦

蔡確

昔人之言秋意也。曰若在遠行。登山臨水送將歸。此其平日游子之所悲。怨慕悽愴。尙不能自支。而況於予乎。戀高堂之慈愛。積三歲之違離。余親屬子。以待我行。且復命於庭闈。其送子也。乃在粵嶺之南。溟海之西。洗亭之側。瀘水之湄。出門躑躅。以將別。仰天涕泣之交頤。浮雲爲我變色。行路爲我齋咨。而況於予乎。予方省愆念咎。奮食布衣。髮如秋霜。形如槁枝。子見吾親。勿以告之。明明二聖。仁如天也。雷霆雨露。固有明也。孤臣放逐。久當憐也。晨夕定省。歸可期也。子告吾親。其以斯也。居乎天下之險。處乎人跡之稀。觸氛霧以深入。仗忠信而不疑。以余之故。而兩走乎萬里。嗟如子者。其誰。周楚之郊。余親所棲。瞻彼白雲。子留子馳。安得借翰於鴻鵠。徑從子而奮飛也。

天下爲一家賦

呂大鈞

古之所謂天下爲一家者。盡日月所照以度地。極舟車所至以畫疆。以八荒之際爲蕃衛。以九州之限爲垣墻。列國則羣子之舍。王畿則主人之堂。凡民之賢而不可遠者。皆我之父兄。保傅。愚而不可棄者。皆我之幼稚。獲臧。理其財。乃上所以養下之道。分責之事。乃下所以事上之常。渾渾然一尊百長。以斟酌其教。令萬卑千幼。以奉承其紀綱。貨遷有無。而不知彼我之實。損益上下。而不辨公私之藏。大矣哉。外無異人。旁無四鄰。無寇賊可禦。無閭里可親。一人之生。喜如似續之慶。一人之死。哀若功總之倫。一人作非。不可

不媿。亦我族之醜。一人失所。不可不閔。亦吾家之貧。尊賢下不肖。則父教之義。嘉善於不能。則母鞠之仁。朝覲會同。則幼者之定省承稟。巡守聘問。則長者之教督撫存。嗚呼。周德旣衰。斯道斯屈。析爲十二。并爲六七。勢不相統。亂從而出。忘祖考之訓。則劫奪其屢盟之時。輕骨肉之命。則戰死於爭城之日。曲防遏糴。以幸其災。縱諜用間。以乘其失。乖睽有甚於鬪墻。鬪很不離於同室。迨至秦政。以強自吞。推所不愛。以殘自昏。斧斤親刃。其九族塗炭。自墮其一門。興阡陌而廢井田。則委貨財於盜賊之手。置郡縣而罷封建。則託婦子於羈旅之屯。貧富不均。幾臣僕其昆弟。苟簡不省。皆土苴其子孫。自漢以來。終亦不復。雖有王侯。而不得輒預其政。雖有守令。而不得久安其祿。譬之錦衣玉食。縱無所用之子。雕車良馬。委不善御之僕。門庭雖存。亦何足以統制。閨門無法。則何緣而雍睦。豪彊日橫。而略無鞭扑之制。單弱日困。而不識襁褓之鞠。豈天理之固然。寔人謀之不足。嘗聞之。治亂有數。廢興有主。昔旣有離。則今必有合。彼旣可廢。則我亦可舉。惟盛德之難偶。故曠時而未覩。豈有待於吾君。將一還於治古。

南征賦

邢居實

嗟予生之賤貧兮。常坎壈而多憂。汨東西與南北兮。無畎畝以歸休。皇六世之十祀兮。竭來賓夫京師。奉晨昏于庭闈兮。忽十年其于茲。哀衆人之夢夢兮。乘巖危以射利。驚精神於末流兮。固廉士之所恥。慕前哲之高蹈兮。臨川流而盥耳。懼離羣之孤陋兮。將遠舉而復已。彼世論之糾纏兮。謂白圭爲多疵。何我公之潔清兮。亦見尤於盛時。皇命之不可淹兮。方仲春而戒行。惟甲子之良辰。侍安輿而南征。昔仲尼之去魯。車遲遲以淹留。此雖非吾之舊邦兮。猶慘慘而懷憂。賓朋肅駕而來餞兮。班豆觴於水湄。執余手以踟

爾兮。不覺涕下而霑衣。輶軋軋而不能前兮。馬蕭蕭而反顧。念長路之超遠兮。恐白日之云暮。敕僕夫使
整駕兮。遂奮袂而辭去。將發輒而回首兮。望國門之穹崇。唯小人之眷戀兮。情鬱結乎余衷。經土山之盤
紆兮。入空谷之鴻豁。野曠蕩而無垠兮。榛林蕭條而來風。鹿呦呦以鳴羣兮。鳥嚶嚶而求友。悵遑遑於中
野兮。徒悵悵其誰咎。晨脂車於諸阡兮。夕稅駕于尉氏。登高丘以長嘯兮。聲慷慨而凌厲。想阮氏之風流
兮。停予車于山椒。斯人不可得而見兮。寄陳迹於蓬蒿。時荏苒其不淹兮。春草生兮青青。羣雉挾雌以高
飛兮。倉鷓得意而和鳴。麥漸漸以被隴兮。遵微行而徂征。欲淹留以容與兮。心搖搖而靡寧。平原塊莽以
阡靡兮。逾極目乎百里。獨熒熒以遠遊兮。曾不得而少止。歷釣臺之故丘兮。涉潁水之溱溱。望周襄之蕪
城兮。弔封人之圯墳。魂飛揚而不反兮。墓蕪穢而不治。曾不得其死所兮。豈純孝之可恃。蹇邈回於水濱
兮。日掩掩其黃昏。問捷徑於野人兮。釋予馬於汝墳。中且展轉而不能寐兮。起視夜之何其。僕夫告予以
肅裝兮。指明星而疾馳。羣山巖崑而造天兮。踐羊氏之北境。企余足以長望兮。南路眇其方永。經昆陽之
遺墟兮。聊裴回而逡巡。高城曲岬而特起兮。雉堞隱嶙而猶存。狐貉穴處於其下兮。鼯鼯吟嘯而成羣。蒿
艾蒼蘩以相依兮。枳棘鬱其榛榛。悼漢氏之絕滅兮。想世祖之中興。方巨滑之滔天兮。恣豺狼之噬吞。肆
橫行於天下兮。駟虎豹以爲羣。仗大義而奮討兮。實南土之裔孫。連機槍而一掃兮。忽電滅而無存。彼百
萬之貔貅兮。曾一旅之莫亢。信天道之輔順兮。豈人謀之不臧。迄於今幾千祀兮。魂魄遊乎何鄉。冀髣髴
其神靈兮。步徙倚而彷徨。過宛葉而引節兮。陟方城之峨峨。歎羈旅之無友兮。彈劍缺而浩歌。覽陵阜之
參差兮。實鸞熊之舊疆。不修德而恃險兮。曾幾何而不亡。宿上唐之候館兮。聽晨雞之悲鳴。濯予纓于泌

水兮。瞻桐柏之巖嶽。飄風嫖怒以來東兮。薄寒慘悽而中人。雲漫漫以承空兮。霰雪下而繽紛。念佳人之阻脩兮。嘆行役之多艱。車陷淖而不進兮。馬頓轡而盤跚。僕夫憔悴以懷歸兮。憩章陵而南邁。奠濁醪于漢祠兮。顧白水之如帶。真人一去而不返兮。佳氣葱鬱而如在。歷崎嶇之九邑兮。涉川路之千里。心澹澹而忘食兮。筋骨疲乎鞭箠。唯君子之無累兮。雖九夷其可居。矧神農之所宅兮。土深厚而無虞。誦孔氏之法言兮。疾沒世而無名。就寂寞以閑處兮。非予心之所憑。植木蘭以爲籬兮。塗申椒以爲堂。荃蕙披靡而盛茂兮。衆香郁其芬芳。優游偃息。靜以索志兮。又何必歸夫故鄉。

宣防宮賦

劉 跂

余以事抵白馬。客道漢瓠子事。感其語。故賦曰。

元封天子。旣乾封臨決河。沉璧及馬。慷慨悲歌。河塞築宣防之宮。燕其羣臣。乃稱曰。隕林竹兮。捷石菑。宣防塞兮。萬福來。顧眄意得。詔問東方大夫樂乎。湖進而跽曰。君王佩乾符。安坤靈。封岱岳。禪云亭。雷行焱馳。一蹕四海。力餘氣盈。爰覽德水。至於人靡遺智。天不愛祉。石城金墉。屹立亭峙。則又經廣輪。度棟宇。裴回領略。心解目覩。八隅九維。千門萬戶。沈嚴神麗。秦帝之府。於是植翠華。喧靈囂。觴川流。浩長歌。神哉沛君。心和患去。喜至無所復加。可謂樂矣。然臣觀之。未可謂無憂也。天子愕眙不怡。少焉顧曰。亦有說乎。朔再拜曰。主臣蓋聞大川之源。發乎崑崙之神墟。出陽紆與陵門。道積石而沉游。包渾淪與俱逝。羌聲聲其徂征。千里一曲。萬里九折。盤礴瀆滉。呼洽湧滴。蕩然長波。激爲迅湍。莽不知其幾何。遂異派而同瀾。已而略廣武。循大伾。麟沛轆洛。積爲委輸。漢沸出乎地上。悅莫際其焉如。粵若神禹。繼道作德。範圍天儀。聯絡

地脈。疏排。滂漫。鑄鑿。窄峿。平野。其。藪。人。有。安。宅。化。鱗。介。爲。冠。冕。蓋。千。有。八。百。國。臣。曾。問。遣。黎。遵。海。隅。繇。乎。成。之。徒。駭。下。東。光。之。胡。蘇。淵。然。覆。脯。脩。若。馬。頰。如。鬲。及。盤。以。簡。以。潔。太。史。分。流。參。匯。衆。折。然。後。安。翔。徐。回。脈。脈。並。醜。紆。餘。衍。漾。縣。眇。透。遲。虬。潛。蛟。伏。波。不。得。興。視。榮。光。與。休。氣。茂。玉。檢。而。金。繩。煥。乎。三。日。而。五。色。何。必。千。歲。而。一。清。若。夫。羣。雄。逐。兮。位。隔。并。山。川。圍。兮。氣。弗。宣。託。洵。湧。以。爲。貨。兮。阻。屢。巖。以。自。藩。崇。墉。連。蜺。蟲。以。相。售。兮。巨。浸。漫。漭。汨。乎。宛。延。立。遮。害。之。亭。謹。白。馬。之。津。雉。堞。瞰。其。東。區。脫。臨。其。西。又。東。北。留。其。行。又。西。北。繫。其。歸。垂。天。之。翼。橫。海。之。鱗。脛。墮。膠。葛。曾。不。得。搶。榆。枋。而。泛。蹄。涔。智。叟。勃。鬱。靡。所。容。怒。霆。擊。電。掣。歛。已。脫。兔。益。以。桃。華。之。流。駛。乎。竹。箭。之。馭。彌。滿。瀕。洞。千。里。四。顧。乃。始。伐。薪。石。程。奮。隄。汰。雞。距。之。防。橫。鏹。牙。之。木。上。下。連。環。旁。側。伏。闕。竹。落。干。輝。夾。搜。而。下。岌。乎。喘。牛。蹶。若。隄。馬。糗。糧。齊。山。徒。庸。成。林。商。羊。鼓。舞。澤。門。謳。吟。析。骸。樵。蘇。慘。於。長。平。之。禍。累。塊。珠。玉。埒。乎。水。衡。之。藏。諒。人。謀。之。或。違。將。度。數。之。適。逢。今。夫。呼。吸。潮。汐。關。竅。丘。源。洲。潭。浮。空。灘。沮。旁。穿。井。乍。甘。而。撤。舍。麥。未。槁。而。培。根。何。靈。龜。之。下。伏。寓。三。峯。乎。層。巖。表。泰。紫。之。嶮。嶢。陋。靈。光。之。歸。然。長。封。爲。扃。土。鍵。石。鑄。守。如。崑。函。葉。萬。不。拔。然。而。燕。雀。賀。而。人。吊。枝。葉。茂。而。本。撥。財。乏。力。屈。河。且。再。塞。君。王。方。且。駐。屬。車。以。流。觀。啓。離。宮。而。落。成。卻。四。載。之。乘。勞。負。薪。之。臣。舉。烽。賦。酒。飛。輪。奉。牲。戢。長。慮。於。一。笑。起。駕。望。而。憑。陵。神。閑。意。定。澹。然。無。營。語。未。旣。天。子。數。顧。尙。席。推。几。欲。興。臣。朔。逡。巡。卻。立。不。謝。而。退。其。後。館。陶。之。役。竟。如。東。方。大。夫。言。

宋文鑑卷第十

賦

南都賦

王仲專

颶風賦

蘇過

思子臺賦

蘇過

參賦

米黻

南都賦

王仲專

洛陽王仲專侍親客于宋十有餘年矣。宋南都也。山川城邑。人物風俗。禽獸草木。博觀而窮覽。粗得其凡焉。因藉華陽先生。渙上公子。爲問答以賦。詞曰。

華陽先生與渙上公子步于西山之隈。環于竹圃之左。水經曰。睢水東南流。歷于竹圃。有竹數百頃。周四十一里。曰。美哉邈乎。土地之沃。人物之夥也。公子喟然歎曰。先生睹斯而已。獨不聞往者之事歟。上自五帝。中接三代。下訖漢唐。目擊而可知。指陳而可喻。請爲先生言之。於顯樂國。在睢之陽。其地則宋。其分則房。夏豫周青。秦碭漢梁。帶以黍丘之野。包以闕伯之疆。盟豬出其右。汜水更其旁。渙穀濊雅。溇涑逐黃。八水出宋城黃。見左傳。濊見北。溇。逐。溇。見圖經。從橫馳騫。源分派張。過乎隕石之壑。徑乎龍丘之岡。行乎釣臺之渚。出乎穀城之塘。上接大河。通于銀潢。下達渦泗。匯于淮湘。瀾澹馨澗。淼淼洋洋。褻澳灑灑。瀟瀟湯湯。若乃歷華里。經洧陵。乘襄塢。陟貫

城。傍空桐而過沙。隨階鴻口而升橫亭。伊高辛之帝子。主大火而脩祀。鄙葛伯之仇餉。猗湯征之攸始。嘉徽子之啓封。卒繼承於商氏。訪桐廬之兩門。孰世遠而難紀。企蒙城之故邑。懷漆園之傲吏。登北岡而遠瞰。想橋公之德懿。銘三鼎與征鉞。曾餘光之未墜。仰子喬之颺馭。世獨尙其丘墳。臨繪水而徙倚。唯澳二水謂之述異志。誦相如之高文。闕雙廟之靈宇。欽張許之威神。忠義煥乎日月。世彌久而逾新。英風激於萬代。如想見乎其人。觀山川人物之舊。纔得其凡而略之。僕固未能詳也。若宮室苑囿之盛。池沼臺榭之廣。侈靡誇前。光輝絕後。惟梁孝王有足稱者。僕願繼其說。而先生自覽其切焉。漢有天下。至文而昌。九族敦序。帝室以光。乃命子武。俾侯于梁。惟梁大國。城四十餘。北限泰山之險。西界高陽之墟。禦備東南。則九州之奧區焉。廣衍沃壤。則天下之膏腴焉。於是舍大梁之故土。卜睢陽之新都。傍濶城而連屬。起甬道以縈紆。外廣池洫。內經郭郛。陋九筵與百堵。法上國之規模。發小鼓以始倡。下節杵而和之。流樂府而度曲。豈餘音之獨遺。於是乃作曜華之宮。擬阿房與林光。鬱正殿之嶮巖。巍然起乎中央。散彤彩而濔沔。復煒煒以煌煌。驚虬龍於金楹。乍矯首以騰驤。軒鸞翥於飛甍。欲乘風而下翔。歷太階之寶砌。駢璧瑛與玉璫。光陸離而眩目。足幾往而徜徉。旁有曲室。後連洞房。叫窳窳窳。仰不見陽。列方疏而散騎。玉女睨而悠颺。又有宴間之館。寔曰忘憂。文章灑博。卓落瑰奇者。萃乎其中。貢以文鹿白鶴。參以淥鄴細柳。間以連璋沓璧。綴以清管弱絲。東苑望園。三百餘里。駿驥鷄鶩。山鵲野雉。守狗戴勝。鳩鵲翡翠。聲音相聞。翺翔往來。萬端鱗呿。不可勝記。其木則檉松楸栴。楸梧柘檀。槐檀木欄。拼欄豫章。華楓翠槐。古檜朱楊。雲封霧鎖。臨谷被岡。其果則楂梨棗栗。素奈朱櫻。紫棗來禽。吳橘楚橙。其草則蕙若蘭茝。蕨蕪蓀龍。杜蘅薜荔。江蘼芎藭。庭蕉簞

綠塔藥翻紅。糝以忘憂。合歡之嘉植。雜以避暑。延壽之芳叢。芬芬馥馥。蒙蒙兀兀。其竹則篔簹籊籊。筍筍
筍筍。疎篔簹密篠。布壠夾池。檀欒蒼茸。婀娜陸離。露滋雪映。風靡雲披。於是乎複道連綿。亘數千步。飛閣層
樓。動以百數。望平臺與離宮。矐眇忘其何所。中有百靈。煙嵐奇秀。表以落猿之巖。環以棲龍之岫。旣盤紆
以葦鬱。亦映帶其左右。面百尺之深潭。瀨鳴玉之清溜。升望秦之峻嶺。懷故關而回首。維彼蠡臺。在城之
西。勢千仞而崛起。豈終日之可躋。攀未半而神悸。意欲下而復迷。驚斗杓之頻逼。頽霓鬣之下垂。疑眞仙
之攸館。非人寰之所棲。屹清冷之對峙。復偃蹇以穹隆。上憑危檻之崢嶸。恍忽不知其幾重。下瞰清淵之
澄澈。金碧倒影乎其中。旁接鴈池。綠爭漪漣。秋浪漲雨。春波拍天。鶴洲背其後。鳧渚面其前。棹女謳而蕩
槳。漁人集而叩舷。水禽則有鸕鶿。鴉鷁。駕鵝鷺鷥。鳧鷖。鶴子。鵠侶。鴻儔。翺翔翻翻。載沉載浮。旣淺潯而隨
波。鴈蜚鳴而驚舟。水草則有蘆葦。蘋蕒。兼葭。蒲蔣。白蘋。綠荇。芡實。蓮房。雨濯幹而增綠。風披華而吐芳。王
臨是國。綽有餘閑。思遊東苑。縱獵乎其間。於是乘雕王之輿。馴寅襲之馬。紛萬騎之徒。驚千乘之駕。服太
阿之雄劍。靡彩虹之珠旒。鳴和鑾以玲瓏。翳羽蓋以葳蕤。安國奉轡。嚴忌附輿。扈從橫出。並山之隅。左許
少右專諸。依岡爲置。因川爲漁。奮駭百獸。電激雷驅。搯雄螭。蹴豪豬。轉犀犛。犛麋。轢游鳧。躡駟驢。弓不
妄發。應聲而殊。鋌不虛擲。洞胸穿髀。山殫谷盡。子然無餘。於是梁王弭節而還。容與委蛇。徘徊往來。其樂
未衰。相與賓客。復遊於鴈鷺之池。登龍艦。飛鳳蓋。釣錦鱗。出文貝。弋白鵬。掛黃鶴。鶴鴝下。鷓鴣落。薄暮日
斜。俛仰極樂。獲獸之多。弋禽之衆。子虛之所遺。西賓之所略也。馳騁少怠。明日乃宴于平臺。召相如。延鄒
枚。綺席列。雕屏開。膾猩脣。炙豹胎。酌金漿之酌。觴縹玉之醕。吹紫鳳之簫。擊靈鼉之鼓。聆遼瀆之歌。睇巴

渝之舞。又有邯鄲曼姬。燕代麗女。輕祛靚粧。綽約媚嫵。明眸微睨。色授神予。於是衆客皆醉。頽然忘歸。浩歌起舞。獻壽考無疆之詩曰。君王淵穆德日躋。閒暇遊宴樂無涯。願千秋兮萬歲。常與日月爭光輝。先生曰。噫。公子何謂茲邪。若公子所謂重耳而輕日。榮古而陋今。膠以人物之陳迹。炫以山川之舊經。又烏觀大宋之盛乎。夫大宋之開基也。肇自商丘。大啓土宇。創洪圖而遺億代。一帝統而超邃古。萬國被德澤。四裔暢皇武。西邊巴蜀。東澹海濤。北指幽薊。南曜朱垠。天乙七十里而興王。姬周三十世而卜宅。曾何足云。至于祥符之際。累盛而重熙。增太山之高。禪梁父之基。神祇安妥。日星光輝。寶符瑞應。萃乎斯時。於是巡方寓幸。毫社動天。輅備法駕。海夷獻珍。黃雲覆野。就見百年存問。鰥寡明壹法度。赦宥天下。當是時也。翠華迴馭。龍旆載揚。迺睠茲土。如歸故鄉。觀紫氣於芒山。辨白水於南陽。洒翔鸞之神翰。揆鴻藻之天章。於是建南京。陪上國。首諸夏。作民極。對列乎浚郊。相輝乎洛宅。頌慶洞開。歸德峻峙。正殿曰歸德。殿門曰頌慶。宮官日事酌獻。特闡連駮。娑與枹指。偉宮室之光明。仰觚稜之神麗。儉不至陋。奢不逾侈。旁立原廟。三聖神御奉安。鴻慶宮。巖鼻穹崇。殿實有三。一祖二宗。顯文謨而承武烈。彌萬祀而無窮。觀其英豪之域。冠蓋相望。元勳雋老。五姓寔昌。杜正獻。趙康靖。王文忠。蔡敏。肅。張文定。高晦陽者凡五族。蹈先生之學舍。祥符中。正素戚先生始建學舍。于睢陽。爲諸郡之先祠。堂存焉。溢誦聲以洋洋。敬鄭公之碩德。仰文正之餘芳。富鄭公。范文正。俯浪宕之舊渠。汴渠。一浪宕。迴伊洛之清流。水入于汲。點寧中。引洛。醜江吳之漕粟。浮寶鷁之千舟。若乃昭仁崇禮。迴鸞祥輝。南都四門名。連闌帶闌。列隧通畿。萬商千賈。鱗集羽歸。星布織麗。山積瑰奇。來不可抑。往不可羈。南獠蠻而東濊貊。紛大貝與明璣。其軍旅則棘門細柳。連總百營。馭以曉將。厲以犀兵。時以蒐獮之際。陣以魚麗之形。扼一都之衝會。耀萬里之天聲。其原野則田疇彌望。不可

計數。浸以曜漁之源。被以沃壤之土。舉趾卽雲。荷鋤迺雨。凡離離禾麥稷黍。其亭館內之。則有流觸淥波。檜陰四合。照碧妙峯。武備道接。外之則有朝雨暮雲。暖風殘月。又有玉觴金縷。光華宴喜。嘶馬落帆。芳草柳枝之列。白流觴至柳枝十二亭名聯觀光與望雲。觀光望雲二亭名指中天之巍闕。其池沼則東西二湖。濕濕迢迢。水澄似鏡。波泛如潮。窺馴鷺於別渚。晏元獻放馴鷺於南湖作賦以紀識海鴈於舊橋。夏文莊自青社攜二鴈置湖中名其橋曰海鴈爾乃金魚分籥。玉麟剖符。命夫輔弼。耆德侍從。鴻儒鎮撫。東土保釐。此都視先王之遺民。愛風俗之安舒。乘剽繁之多裕。覺坐嘯而有餘。陟高臺而環望。悟神意之自如。臨綠水而暫止。疑放曠於江湖。若予之所舉。僅知其髣髴。十分未得其一隅。吾子徒聞孝王之遺風舊迹。不睹大宋之豐功偉烈也。徒詫梁國故墟之名。不知藝祖興王之實也。徒誇兔園之大。鴈沼之廣。不識原廟之尊。帝宮之美也。曜華故基。鞠爲茂草。孰若都城佳氣。鬱與雲翔。諸侯僭上。游宴無度。孰若天子巡守。動靜有常。珍怪之翫。奇木異卉。孰若農夫之慶。黍稷稻粱。先生之言未終。公子矍然若驚。惘然若醒。茫然若有所失者。旣而幡然改曰。鄙哉子乎。嗟予舍近而取遠。習迷而遂非。其亦久矣。先生博我以皇道。宏我以王圻。使數十年所眩曜。釋焉無疑。僕雖不敏。請終身而誦之。先生於是作歌以遺焉。其辭曰。翼翼神都。皇祖起焉。煌煌巍闕。真人巡焉。有睟其容。三殿位焉。於萬斯年。天子明焉。

颺風賦

蘇過

仲秋之夕。客有叩門指雲物而告予曰。海氣甚惡。非禳非祥。斷霓飲海而北指。赤雲夾日而南翔。此颺之漸也。子盍備之。語未卒。庭戶肅然。稿葉蔌蔌。驚鳥疾呼。怖獸辟易。忽野馬之決驟。矯退飛之六鷁。襲土囊

而暴怒。掠衆竅之叱吸。予乃入室而坐。歛衽變色。客曰。未也。此颶之先駭爾。少焉排戶破牖。殞瓦擗屋。礮擊巨石。揉拔喬木。勢翻激澗。響振坤軸。疑屏翳之赫怒。執陽侯而將戮。鼓千尺之濤瀾。襄百仞之陵谷。吞泥沙於一卷。落崩崖於再觸。列萬馬而並驚。會千車而爭逐。虎豹讙駭。鯨鯢犇蹙。類鉅鹿之戰。殷聲呼之動地。似昆陽之役。舉百萬於一覆。予亦爲之股慄毛聳。索氣側足。夜拊榻而九徙。晝命龜而三卜。蓋三日而後息也。父老來唁。酒漿羅列。勞來僮僕。懼定而說。理草木之旣偃。輯軒檻之已折。補茅茨之罅漏。塞墻垣之頽缺。已而山林寂然。海波不興。動者自止。鳴者自停。湛天宇之蒼蒼。流孤月之熒熒。忽悟且歎。莫知所營。嗚呼。小大出於相形。憂喜因於所遇。昔之飄然若爲巨耶。吹萬不同。果足怖耶。蟻之緣也。噓則墜。蚋之集也。呵則舉。夫噓呵不足以振物。而施之二蟲則甚懼。鵬水擊而三千搏扶搖。而九萬彼視吾之惴慄。亦爾汝之相莞。均大塊之噓氣。奚巨細之足辨。陋耳目之不廣。爲外物之所變。且夫萬象起滅。衆怪耀眩。求髣髴於過目。視空中之飛電。則向之所謂可懼者。實耶虛耶。惜吾知之晚也。

思子臺賦

蘇過

余先君宮師之友史君諱經臣。字彥輔。眉山人。與其弟沆子凝。皆奇士。博學能文。慕李文饒之爲人。而學其議論。彥輔舉賢良不中。弟子凝以進士得官。止著作佐郎。皆早死。且無子。有文數百篇。皆亡之。予少時常見彥輔所作思子臺賦。上援秦皇。下逮晉惠。反復哀切。有補於世。蓋記其意而亡其辭。乃命過作補亡之篇。庶幾君子。猶得見斯人胸懷髣髴也。

客有自蜀遊梁。倏關而東。覽河華之形勝。兮訪秦漢之遺宮。得歸然之頽基兮。並湖城之西墉。弔漢武之

暴怒兮。悼戾園之憫凶。聞父老之哀歎兮。猶有歸來望思之遺恫。吁大臺之讒頰兮。實咀毒而銜鋒。敗趙國於俛仰兮。又將覆劉氏之宗。問漢武之多忌兮。謂左右之皆戎。殺陽石而未厭兮。又瘞禍於宮中。狃君王之好殺兮。視人命猶昆蟲。死者幾何人兮。豈問骨肉與王公。惑狂傅之淺謀兮。不忍忿忿而殺充。上曾不鑒予之無聊兮。實有豕心。負此名而欲亡兮。天下其孰吾容。苟追死於泉鳩兮。冀稍久而自理。遭大患於倉猝兮。懷孤憤於永已。念君老而孰圖兮。嗟肉食其多鄙。獨三老與千秋兮。懷愛君之拳拳。犯雷霆之方怒兮。消積禍於一言。洗沉寃之無告兮。戮讒人其已晚。幸曾孫之無恙兮。或慰夫九原。雖築臺其何救兮。固知已矣之不諫。魂煢煢其歸來兮。蓋庶幾於復見也。昔秦之亡也。禍始於扶蘇。眇斯高之羸豕兮。視其君猶乳虎。曾續息之未定兮。乃敢探其穴而啗其雛。在晉四世。有君不惠。孽婦晨雉。彊王定制。惟愍懷之遭離兮。實追二於漢戾。顧屏后之何知兮。亦號呼於既逝。寫餘哀於江陵兮。發故臣之幽契。仍築臺以望思兮。蓋援武以自例。嗚呼噫嘻。可弔而不可哂兮。亦各言其子也。彼茂陵之雄傑兮。係九戎而鞭百蠻。笑堯禹而陋湯武兮。蓋將與黃帝俱仙。及其失道於幾微兮。狐鬼生於左臂。如嬰兒之未孩兮。易耳目而不知。甘泉咫尺而不通兮。與式乾其何異。一既上配於秦皇兮。又下比於晉惠。君子是以知狂聖之本同。而聰明之不可恃也。覽觀古初。孰哲孰愚。皆知指笑乎前人。而莫知後之視子。方漢武之盛也。肯自比於驪山之朽骨。而況於金墉之獨夫乎。自今觀之。三后一律。皆以信讒而殺子。曠姦而敗國。吾築臺以寄哀。信同名而齊實。彼昏庸者固不足告也。吾將以爲明主之龜策。自建元以來。張湯主父偃之流。與兩丞相三長史之徒。皆以無罪而夷滅。一言以就誅。曾無興哀於既往。一洗其無辜。獨於據也。悲歌慷慨。泣涕躑

蹠嗚呼哀哉。莫有以楚靈之言告者。曰人之愛其子也。亦如余乎。天道好還。以德爲符。惟孟德之驚忍兮。以嗜殺以爲娛。彼揚公之愛脩兮。豈滅吾之蒼舒。恨元化之不可作兮。然後知鼠輩之果無同。舐犢於晚歲兮。又何怨於老驪。吾將以嗜殺爲戒也。故於末而并書。

參賦

米 馘

武帝旣祠太一。受釐頌胙。意得氣泰。神怡志豫。閱符合瑞。至于嚮暮。於是升通天之臺。攬沈寥之路。覩三星聯影。曖然當戶。顧侍臣曰。是何星也。侍臣枚臯進曰。參星也。帝曰。是何主。對曰。是主民。帝曰。可聞其晦歟。臯曰。臣之淺學。俳儕優隊。捷語翮言。奉歡承話。稱道盛德。受況甚大。此大對也。臣不敢。帝曰。先生無辭。臯乃蹠而進曰。自周衰道喪。百里一王。嗜欲加僭。民財用傷。貪如碩鼠。墮號鷓梁。匪鳶匪鮪。或潛或翔。至于暴秦。襲冕而狼。趙郊坑肉。魏野封瘡。粵嶺山斷。遼海城長。驪丘虛地。阿房繡牆。則是星也。晦晦而無光。帝曰。亦嘗有明乎。曰。有古有治。君曰堯與禹。敬時命官。以民爲主。民之樂生。鼓腹歌舞。次逮成湯。視民如傷。一夫不獲。如己納隍。周之文武。汔于成康。道德化洽。禮義興行。刑措不用。至于百齡。則是星也。亦常燁燁而晶熒。帝曰。宜乎自此不復有光矣。曰。有昔秦籙不究。上天悔亡。乃命高祖。匹夫奮張。一洗世亂。惠綏四方。化其姦宄。約以三章。及我文景。恭儉惇朴。隱恤賑周。德澤甚渥。太倉積紅腐之粟。司農朽不較之索。則是星亦嘗燁燁而灼灼。今陛下承累聖之休光。翕五福於仰戴。坐明堂神明之會。據建章珍陸之海。臣萬國朝四裔。名王系於祈連。宛馬來於天外。致赤鴈駮廡之異物。獲寶鼎芝房之珍恠。名在百王之上游。德並五帝之左界。而乃曖曖而無光。臣臯所以堙鬱而未快。逡巡而不對也。古訓有言曰。民猶水也。可以

載舟可以覆舟。言未及休命。蓋陳鈞寢不得寐。三起問籌。翌旦坐明光殿。封富民侯。

宋文鑑卷第十一

律賦

有物混成賦

王曾

金在鎔賦

范仲淹

德車結旌賦

宋庠

應天以實不以文賦

歐陽修

王畿千里賦

宋祁

長嘯卻胡騎賦

范鎮

首善自京師賦

王安石

歷者天地之大紀賦

蘇頌

圓丘象天賦

鄭獬

濁醪有妙理賦

蘇軾

三階平則風雨時賦

孔文仲

四海以職來祭賦

孔武仲

舜琴歌南風賦

舒亶

公生明賦

許安世

智若禹之行水賦

孔平仲

周以宗彊賦

沈初

佚道使民賦

林希

王道正則百川理賦

江衍

郭子儀單騎見虜賦

秦觀

有物混成賦

虛象生在地之始

王曾

妙物難模。先天有諸。著自無名之始。生乎立極之初。不縮不盈。賦象寧窮於廣狹。匪雕匪斲。流形罔滯於盈虛。原夫未辨兩儀。中含四象。雖欲兆於形質。曾莫知夫影響。問洪纖而莫得。自契胚渾。考上下以都忘。孰分天壤。及夫大樸將散。三光欲萌。清濁待茲。而一判昏明。由是以相生。然後品彙咸觀。用作有形之始。淳和外發。或知至道之精。是何小不隱於纖介。大不充於寰海。配一氣以冥運。亘終古而斯在。縱陰陽之推盪。我質難移。任變化之紛紜。斯形不改。豈不以有者真有之。筌物者生物之先。冥搜而兆朕。斯顯寂聽而音容莫傳。得我之小者散。而爲草木。得我之大者聚。而爲山川。視焉且無。訝深蟠於厚地。搏之不得。疑上極於高天。本自疆名。誠難取類。其始也既出無而入有。其終也亦規天而矩地。既不可指掌而窺。又不

可因人而致。明君體之而成化。則所謂無爲而爲。君子執之而立身。亦同乎不器之器。無反無側。神之聽之。諒潛形於恍惚。實委化於希夷。傾毀何由。固秉持之在我。剛柔有體。將用捨以隨時。今我后掌握道樞。

恢張天紀。將窮理以盡性。思反古而復始。巍巍乎執大象而撫域中。達妙有之深旨。

金在鎔賦金在良冶求鑄成器

范仲淹

天生至寶。時貴良金。在鎔之姿。可觀從革之用。將臨熠耀騰精。乍躍洪鑪之內。縱橫成器。當隨哲匠之心。觀其大冶。既陳滿籥。斯在俄融。融而委質。忽擘擘而揚彩。英華既發。雙南之價彌高。鼓鑄未停。百鍊之功可待。況乎六府會昌。我稟其剛。九牧納貢。我稱其良。因烈火而變化。遂懿範而圓方。如令區別。妍媸願爲軒鑑。儻使削平禍亂。請就干將國之寶也。有如此者。欲致用於君子。故假手於良冶。時將禁害。夏王之鼎可成。君或好賢。越相之容必寫。是知金非工而弗用。工非金而曷求。觀此鎔金之義。得乎爲政之謀。君諭治焉。自得化人之旨。民爲金也。克明從上之由。彼以披沙見尋。藏山是務。一則求之而未顯。一則棄之而弗顧。曷若動而愈出。既踊躍而來伸。用之則行。必周流而可鑄。美夫五行之粹。三品之英。昔麗水而隱晦。今躍冶而光亨。流形而不縮。不盈出乎其類。尙象而無小。無大動則有成。士有鍛鍊誠明。範圍仁義。俟明君之大用。感良金而自試。居聖人天地之鑪。亦庶幾於國器。

德車結旌賦車結旌者昭德之美

宋 庠

君有至德。時乘大車。當偃革以無外。乃結旌而有初。奉駕陳儀。采物雖資於備設。鳴鸞示禮。旂旒匪俟於垂舒。順考前經。鋪聞往說。謂戎事以旣息。貴君車之有結。雍容撫軾。蓋藏飾以尙純。肅穆展鈴。詎垂旆而就列。蓋由抑乃盛飾。昭夫令名。雖冠品於輿服。蔑揚威於旆旌。肅軫無譁。方斂藏於旂厲。馳輪有度。靡赫奕於綵纓。且夫禮有質文。器隨用捨。車號乎德。則崇化於邦本。旌結其表。則示人於天下。意自象見。名非

人假君軒弭節。執訝乎卷而懷之。國乘制容。益顯乎素爲貴者。是知車之用兮。充德以成大。旌之飾兮。輔威而孔昭。旣武怒之不作。信軍容而外銷。組轡啓行。陋邦旄之子子。錯衡遵路。殊風旆之搖搖。若然則動有彝儀。文無異色。雖嚴駕以備物。終去華而表德。故使禮典攸重。民瞻不忒。皇皇整御。始中括於采章。輶輻肅容。豈外揚於藻飾。用能上載明德。旁昭緝儀。自駕言而戾止。殊幅裂以藏之。升降惟寅。僅比非心之屋。章明盡屏。寧同止獵之綏。大矣哉。邦禮是崇。帝儀資始。實務德以垂教。必收旌而昭理。宜乎國容備而兵器銷。率由茲而盡矣。

應天以實不以文賦

天應誠德
豈尙文爲

歐陽修

天災之示人也。若響應聲。君心之奉天也。惟德與誠。固當務實以推本。不假浮文而治情。彼雖不言。謏見以時而下告。吾其脩德。禍患可銷於未萌。臣聞天所助兮。惟善則降祥。德苟至兮。雖妖而不勝。皆由人事之告召。然後天心之上應。若國家有闕失之政。則當類見於衆災。欲人主知戒懼之心。所以保安於萬乘。臣請述當今之所爲。引近事而爲證。至如陽能和陰。則雨降。若歲大旱。則陽不和陰。而可推。去年陰不侵陽。則地靜。若地頻動。則陰干於陽。而可知。去年河東。又如黑者陰之色。晦者陰之時。或暴風慘黑。而大至。白晝晦冥。而四垂。康定元年三月。黑風起。白日晦。日食正旦。雨冰木枝。今年春。如此之類。皆陰之爲。蓋陰爲小人與婦女。又爲大兵與蠻夷。若四方之爲患。則羣陰之失宜。故天象以此告吾君。不謂不至。陛下所宜奉天戒。不可不思。是謂應以實者。臣敢列而言之。若夫慎擇左右。而察小人。則視聽之不惑。肅清宮闈。而滅冗列。則恭儉而成式。況乎遠佞人者。孔宣父之明訓。放宮女者。唐太宗之盛德。又若西師久不利。宜究兵弊。而改作。叛

羌久未服。宜講廟謀之失得。在陛下之至聖。行此事而不忒。庶天意之可回。雖有災而自息。方今民疲賦斂之苦。又植饑荒之年。貨財盡於私室。苗稼盡於農田。劫掠居人。盜賊並起。流離道路。老幼相連。陛下視民如子。覆民如天。在於仁聖。非不矜憐。故德音除刻削之令。赦書行賑濟之權。然而詔令雖嚴。州縣之吏多慢。人死相半。朝廷之惠未宜。天至高遠也。惟可動以精誠。民之休戚也。皆繫君之好尚。惟善政之能惠。則休符之並貺。富有四海之大。獨制萬民之上。一言之出。誰敢不從。百事責實。自然無曠。發號施令。在聖意之必行。變災爲祥。則太平之可望。今漢史有五行之志。尙書有洪範之文。願詔侍臣之講說。許陳古事於聽聞。可以見自召妖災。雖由於時政。能招福應。亦自於明君。故禾偃於風。表周王之覺悟。雉鳴于鼎。成商帝之功勳。蓋恐懼脩省者實也。在乎不倦。祈禳消伏者文也。皆不足云。臣生逢納諫之聖明。不聞直言之狂斐。惟冀愚忠之可採。苟避誅夷而則豈。蓋賦者古人規諫之文。臣故敢上干於旒辰。

王畿千里賦

魏制千里
尊大王國

宋 祁

王有一統。人無異歸。中四方而正位。畫千里以爲畿。摠大衆之奠居。式昭民極。據方來而處要。昌重皇威。二代而還。維周有制。肇庶績以圖大。廓多方而爲衛。作我上國。垂諸永世。以謂地非中夏。無以示天子之常尊。土不一圻。無以待諸侯之入計。爾乃測圭於地。考極于天。風雨之所交者。道里之必均焉。郊野錯而回合。鄉遂亘而蟬聯。溝封斯萬。疆場且千。差籍九畿。定夫家於都鄙。出車萬乘。括賦入於原田。是謂辨方。且非期修廓焉。天府之國。巍乎王者之里。爵祿命賜之供億。朝覲會同之底止。不偏陋以取侮。不夸矜而役美。侔江海之重潤。乃據上游。法日月之徑圍。用張天紀。且其蠻夷面內。玉帛駿奔。內則百官承式。外則

四國于蕃化之遠者禮益廣歸之衆者務愈繁必在制廣輪於有截示極摯於羣元倍十子男大有由而御小任包旬稍卑不得以侔尊亦由天之高肅物而無外地之厚廣生而咸賴使高而可度則寥廓何仰厚而易知則沉潛有害是用控天下以威義極宸居而稱大詩美四方之是則理乃同歸史稱後世之無加事誠胥會美夫周原膺膺禹畫芒芒或處瘠爲教或建瓴是防然皆按成事於神甸跡前謀於令王所以漢相論都首識金城之廣召公相宅前知墨食之祥洪惟我朝奄有方國託宏基於天地亘長藩於道德所以申畫邦畿是用守之無極

長嘯卻胡騎賦

清嘯聞外胡騎潛去

范鎮

制動者以靜善勝者不爭伊劉氏之長嘯卻胡人之亂兵初歷歷以傳聞合圍風靡遂稍稍而引退一境塵清當其分晉室之憂勤守并門之衝要邊寇衆至虜戰數挑勝不可以近決敵不可以前料凌雲拔幟誰爲趙壁之謀訴月登樓獨引蘇門之嘯出自予口期於衆聞徵角更變宮商互分儼神意以不動服戎心而若醞終夜長吟故異鷄鳴之客遠人咸聽遂收烏合之羣是知安可破危利能圖害攻而至吾不爲之戚服而去吾不爲之泰亦猶雅歌之樂坐鎮軍中不假射聲之威橫行塞外豈不以嘯本予發抑揚而自娛騎雖爾衆顧視而如無旣傾聽以知漢乃散逃而入胡若楚軍夜遁之時聞歌於四面殊漢將道窮之日振臂而一呼宜夫深謀者爲衆歸尙力者必自匱此以安而得僥彼以彊而失利因惟口之出好去滿目之異類遂使本朝雙闕時有內面之人廣莫一隅不逢南牧之騎大哉人籟斯發邊兵遂潛蓋得先聲之術曾無黷武之嫌談笑而卻秦軍理宜共底偃息而藩魏室功亦難兼是何據一郡之尊憑百姓之

助勢至小也。以德而大。嘯甚微也。因誠以著。使被髮之醜類。咸審音而遠去。夫如是。則有天下之君。曷爲西北之慮。

首善自京師賦崇勸儒學
爲天下始

王安石

王化下究。人文內崇。繫京師首善之教。自太學親民之功。闡承師論道之基。先繇穀下。廣成俗化民之誼。甫暨寰中。古之聖人。君有天下。治遠於近。制衆以寡。不用文何以修飾政教。非設校何以崇明儒雅。迺建左學。率先諸夏。在郊立制。繫一人之本焉。養士興仁。形四方之風也。本仁祖義。取材歛賢。講制量于中土。鬯聲明於普天。始于邦家。用廣師儒之衆。行乎鄉黨。斯爲庠序之先。是何拳拳諸生。亶亶先覺。所傳者道德仁義。所隸者詩書禮樂。以言乎功。則萬世用乂。以言乎化。則八紘匪邈。其流及於三代。率以明倫。此理達於諸侯。誰其廢學。故曰校官者。庶俗之原本。京邑者羣方之表儀。養源於上。則庶俗流被。設表於內。則羣方景隨。惟時於變。繫上之爲。三王四代。惟其師使人知化。兆姓黎民。輯於下。自我興基。向若俗敗隄防。朝隲統紀。教化之宮。衰落禮義之官。廢弛鄉風者。無以勸於善。隸業者。不能官其始。則撫封之主。毀鄉校者。有之。承學之民。在城闕者多矣。必也。啓胄子之祕宇。據神邦之奧區。憲先生而講道。風下國以恢儒。邑翼翼以宅中。契商人之詠。士彬彬而蒙化。參漢室之謨。噫。孝武逸王也。而有興置之謀。公孫具臣也。而有將明之論。矧睿明之主。紹起俊乂之僚。並建宜乎隆儒館。以視方來。使元元之敦勸。

歷者天地之大紀賦聖人以通
天地之數

蘇頌

昔聖王建官司地。因象知天。推曆用明於大紀。考星咸自於初躔。合三體以爲元。成書最密。舉二篇之定。

策備數無愆。古有善談。載於前志。因太初創曆之首。遠往聖知時之義。莫不究極象數。精窮天地。有時以記夫啓閉。有日以紀乎分至。躡離弦望也。於此而爲正。晦朔昏明也。於此而攸示。下可辨乎斗建。上靡差於辰次。惟君審璣衡之運。所以緒正於元功。使民知寒暑之來。然後順修於時利。況夫歷爲一歲之本。紀明太極之基。惟精禋之至妙。豈深思之與知。必也。迎辰以策。定晷于儀。帝舜則義和而分命。顓頊則重黎而是司。皆所以準厥二氣。乘於四時。聖有作也。人皆度之。制自清臺。得舉正履端之要。職由太史。盡觀文察理之宜。若乃辰集于房。月窮于紀。孟陬既協於月建。攝提亦隨乎杓指。國將班正朔以爲令。王乃觀情性而順理。章部元之書。兮著於彼。子丑寅之正。兮見於此。可以察發斂於未然。定舒慘之所以。推而生律。子陽午陰而互分。治以明時。春作秋成而是擬。且夫天之運也。日與星而代逢。地之道也。柔以剛而莫窮。非乃聖無以探其蹟。非立法無以舉其中。我乃錯綜氣候。稽參變通。起建星而運算。故積歲以成功。考連珠合璧之辰。得名尤邃。應大呂黃鍾之統。立道斯同。用能鈞校舊儀。審觀新度。成敗因之。而遂紀氣節於焉。而可步。于以極陰陽之大端。于以備六五之中數。亦何異魯經比事。舉二中以歲成。義易窮神。合五位而象布。後王以是知曆象不可不審。經紀不可不循。或立元而謹其始。或節事而授於民。馮相則致乎日月。保章則志夫星辰。以定五十五數。以通三百六旬。所謂見道而知治。何患以天而占人。彼爲刻漏以考中星。但紀曉昏之度。處璇璣而觀大運。蓋明氣候之因。猶未若測運動於二儀。齊往來於七政。建乃星紀。先夫算命。吾皇所以監古曆之尤疏。頒新書而考正。天人之際。因以明焉。乃知夫作者謂聖。

圓丘象天賦

圓丘就陽上憲天體

鄭獬

禮大必簡。丘圓自然。蓋推尊於上帝。遂擬象於高天。必在國南。蟠宏基之高厚。用符陽體。取大運之周旋。王者揆禮之文。爲民之唱。修明大禘。導迎景貺。有祭焉。格神于下。有祀焉。享帝于上。謂丘也。其形特異。我所以貴其自成。蓋天也。其體亦圓。他所以法之相尙。爾乃旋仲冬之序。迎至日之長。掃以除地。升而詔王。是必肇靈壤。以高峙。模圓清而上。當擇吉土之成基。乃定其位。做高穹之大體。以就乎陽。由是懽然神意交。穆然天貺授。徧羣靈以從之。祀嚴太祖以爲之侑。煥爾盛容。配乎大就。成非人力。聳寶勢以下蟠。仰合乾儀。環太虛而高覆。然則禮有物也。其制可象。天無形也。其端可求。故我相法於厚地。取類於重丘。崇崇其高。隱若積土之固。浩浩其大。渾如洪覆之周。是故有藁秸以籍誠。有陶匏以薦禮。大裘焉。以彰其質。蒼璧焉。以象其體。固異周朝授政。築層級之三成。漢祀命郊。兆重階之八陛。是則事至神者。物無以稱其德。接至高者。丘所以表其虔。與地居上。如天轉圓。對方澤之成形。乃殊其象。規大儀之冥運。自貴其全。聖人所以明禮。大原建邦。茂憲兆其成迹。符於至健。夫然因天事天。得先民之至論。

濁醪有妙理賦

神聖功用
無捷於酒

蘇軾

酒勿嫌濁。人當取醇。失憂心於昨夢。信妙理之凝神。渾盎盎以無聲。始從味入。杳冥冥其似道。徑得天真。伊人之生。以酒爲命。常因旣醉之適。方識此心之正。稻米無知。豈解窮理。麴蘖有毒。安能發性。乃知神物之自然。蓋與天工而相並。得時行道。我則師齊相之飲醇。遠害全身。我則學徐公之中聖。湛若秋露。穆如春風。疑宿雲之解駁。漏朝日之噉紅。初體粟之失去。旋眼花之掃空。酷愛孟生。知其中之有趣。猶嫌白老。不頌德而言功。兀爾坐忘。浩然天縱。如如不動。而體無礙。了了常知。而心不用。坐中客滿。惟憂百榼之空。

身後名輕。但覺一盃之重。今夫明月之珠。不可以襦。夜光之璧。不可以飾。芻豢飽我而不我覺。布帛煖我而不我娛。惟此君獨游萬物之表。蓋天下不可一日而無。在醉常醒。孰是狂人之藥。得意忘味。始知至道之腴。又何必一石亦醉。罔閒州閭。五斗解醒。不問妻妾。結褻廷中。觀廷尉之度量。脫鞞殿上。夸謫仙之敏捷。陽醉過地。常陋王式之褊。鳴歌仰天。每譏楊惲之狹。我欲眠而君且去。有客何嫌。人皆勸而我不聞。其誰敢接。殊不知人之齊聖。匪昏之如古者。晤語必旅之於獨醒者。汨羅之道也。屢舞者高陽之徒歟。惡蔣濟而射木人。又何狷淺。殺王敦而取金印。亦自狂疎。故我內全其天。外寓於酒。濁者以飲。吾僕清者以酌。吾友吾方耕於澆莽之野。而汲於清冷之淵。以釀此醪。然後舉窪樽而屬予口。

三階平則風雨時賦

泰階既平
風雨時若

孔文仲

圓極之運。泰階以平。表聖神之德盛。致風雨之時行。位正六符。炳光芒於常次。氣流四序。普散潤於羣生。大儀之遠兮。其體高明。列宿之繁兮。其文交錯。君道修於下。則瑞爲之證。人事失於此。則變從而作。偉一德之溫恭。感三階之炳燦。騰精于上。燭太微紫微之居。垂象於人。應時雨時風之若。燁燁華藻。蒼蒼昊穹。常輝乎太一之座。密次乎文昌之宮。則必天地協應。陰陽大同。沐之以膏雨。撓之以祥風。上燦高躔。旣色齊而光大。俯呈休驗。俾根著之滋豐。靈臺齊政兮。知精禋之祥。太史占天兮。測宿離之會。上焉兩雨之悉正。下焉元元之永賴。盛澤鼓舞。洪恩霽霈。觀文察變。仰魁斗之均明。薄山流淵。蘇物情而交泰。豈不以天至邈也。其監無私。星至遠也。其應不欺。惟上階之成象。合元后之題期。或當乎卿大夫之列。或主乎士庶人之卑。率皆騰耀而有爛。守常而莫移。致此協氣。播于大時。薰兮解慍之美。沛若如膏之滋。順軌而居。展

開德宣符之效。以節而至。無鳴條破塊之爲。斯蓋位焉不易。其尊卑行焉不差。其經緯使清微之令。均被乎率土。霽霖之澤。昭蘇乎品彙。化養無外。涵濡罔既。相比而列。連炳煥於七星。仰觀其符。知協調於六氣。誠由至仁之化也。四表光被。太平之治也。兆民允懷。藹休功於萬宇。兆祥應於三階。載於傳則微淒苦之戾。出於記則無焱暴之乖。驗斗覆而歲穰。求端則正。占畢明而夷貢。取類其皆。班固志之也。曉然示人。方朔陳之也。勤於致主。修皇德以上。動煥台光而可觀。符作肅作聖之事。鮮極備極無之苦。又何必饗帝于郊。始能節乎風雨。

四海以職來祭賦

天下之職能助王祭

孔武仲

上聖孝至。諸侯職揚。當一人之奉祭。罄四海以來。王肅爾駿奔。各述修方之舊。翼如顯相。用嚴肆祀之常。夫惟承祖宗積累之休。處廉陸崇高之勢。尊其親也。既重假廟。大其禮也。又當配帝。化首正。寧教流當世。本至誠之恭愛。可以感人。極四海之欣歡。入而助祭。時也。六服面內。五侯至前。同姓異姓。各奉玉帛。大賓大客。兮迭承豆籩。並來享以悅懌。咸侍祠而吉蠲。造此闕庭。鎗八鸞於外屏。盛其饌貢。洽百禮於中天。擇於大射。則賓自得賢。誓以常刑。則臣無廢職。辨其吉禮之掌。同厥驩心之得。儼若將事。欣然獻力。分行遞見。居多振鷺之容。承命勤修。皆有和羹之德。誠以報本反始者。神聖之美教。尊祖嚴父者。朝家之上儀。在盛王之顯若。格縣宇以承之。故爾各備上服。並承約軼。所以周廟陳常。美羣公之肅肅。湯孫致饗。詠列辟之祁祁。衆莫衆於侯方。尊執尊於君者。大邦小國。兮至自畿外。美味和氣。兮實於堂下。共承上化。參德遜於前書。各盡臣恭。協禋將於大雅。夫盡九州之力。致五福之膺。殊免爵於西漢。異責茅於召陵。以極精

禮之意。用全孝饗之能。薦牡惟時。推至誠而茂對。執膳有序。贊大事以靈承。噫。德教所加。惠心益著。外易俗於蠻貊。下感心於黎庶。矧乎茅土分寵。親賢同慮。幸丁萃亨之時。孰不驩虞而來助。

舜琴歌南風賦

帝舜作琴以歌南風

舒 賈

帝意雖遠。琴音可通。欲登揚於孝道。遂歌詠於南風。寓意五絃。寫生成之至德。託言萬物。荷長養之元功。粵其耕稼陶漁。至爲君聰明睿智積諸己。日深致孝之念。躬盡事親之理。以謂鞠養之德。欲言之不足。生育之愛。欲報之何以。緣情指物。孰形孝子之思。流詠在琴。具載南風之旨。時其比屋熙父。巖廊靚深。包我萬慮。寫于一琴。協天地以同趣。按絲桐而播音。作以敘情。適在無爲之日。薰兮入奏。永言至孝之心。蓋曰風之於物也。有化養之恩。覃親之於己也。有劬勞之德。博眷物理之明甚。假琴聲而遠託。一彈而歡意具。寫再鼓而羣心咸若。按絃而奏。聲參韶樂之淳。寓象而言。義並凱風之作。議夫琴求以意。而不求乎形器。帝樂在孝。而非樂於絃歌。感民之義。豈並於北里。思親之志。固深於蓼莪。藏韻於心。非止解一時之愠。寄聲於政。又將陶萬國之和。自是正音暢而化洽幽遐。協氣流而時消涼。閨門聽之。則翕爾和順。朝廷聞之。則歡然感厲。風被乃俗。功歸于帝。又得夔工之奏。同樂於民。不煩鄒律之吹。阜財於世。茲蓋淵默玩意。優游而南歌。孝風之遠暨。託琴理以中含。惜乎道與世汨。樂非德參。操變而亡。徒起後人之嘆。音調而理。空聞前史之談。夫豈知昔者導樂理之淳淳。達孝思之進進。內將報德之罔極。外以格民之大順。然則歌琴之意。至矣哉。莫如虞舜。

公生明賦

公不偏黨明則生矣

許安世

事欲無蔽。心宜盡公。既守正以宅志。遂生明而在躬。祛一意之黨偏。不私乎物。照百爲之情僞。罔汨於中。若夫外交事變之繁。中固心誠之守。以謂虛己鑒物。則枉直昭晰。挾情適事。則是非紛糾。欲庶理之皆辨。捨至公而則不中。立不倚。始持正於羣倫。旁燭無疆。遂致明於萬有。無陂無側。不阿不偏。非妄惡也。惡其衆之所棄。非作好也。好其衆之所賢。蓋依違牽制者。固已去矣。則明白洞達者。乃其自然。百志惟寧。居絕傾邪之漸。五基不亂。遂觀昭曠之先。蓋夫智因窒而後昏。性以私而有黨。愛憎既絕。則真僞必審。取捨既平。則善惡不爽。抱純正以中執。涵機靈而內養。所以主心善治。湯無蔽塞之憂。直道欽承。文有照臨之廣。豈不以澆靜者人之性。偏闇者性之情。知靜爲本。故虛之則定。知闇爲害。故去之則明。正厥心官。始閑邪而制物。發爲智燭。終迪哲以通誠。大抵處有累之地者。莫不徇私。對無窮之變者。鮮能不惑。凡適理以非眩。由秉心之自克。得不保守天質。蹈行聖則。周而不比。無一曲之蔽情。靜之徐清。有三知之入德。因知心乃物之鑒。公爲職之衡。係吝既屏。純明自生。以之察己。則事至不惑。推而成務。則物來敢名。是故君子養源。于以致忠邪之判。大人正己。豈徒無譖愬之行。嗟夫。有爲者易失其本心。無憚者或迷於至理。故伾文黨與以醜正。恭顯庸回而嫉士。智尙昧於自保。識敢期於遠視。惟夫以公正爲心。明則生矣。

智者禹之行水賦

明智之大如禹行水

孔平仲

古有大智中潛至明。何行水以爲喻。蓋存心之自誠。淵然翹物之謀。敏而外發。沛若決川之勢。順以東傾。夫惟靈萬類而生。毓五常之粹。不滯於物。其端曰智。然順其故。則不致於交譎。悖其本。則浸成於大僞。居惟適正。委美質之自然。舉若下鴻。措安流於無事。審利圖害。籌安計危。蘊千慮以無惑。包萬殊而不遺。每

優游而處此。不汨亂以行之。內畜清明。陶天真而去詐。遠侔疏鑿。適地勢以流卑。湛然恬養於中。廓然識周於外。不滌源而滌性之垢。不治水而治情之害。較迹無間。成功亦大。可通塞壅。順意表以彌綸。如決懷裏貫地中而滂沛。大抵多計者流於機巧。好辨者溺於空虛。其弊明甚。惟人戒歟。故我抱靈鑒以無隱。導沉幾而自如。心常惡其鑿也。勢若排而注諸舜。以是而察邇言。聰明並決。堯因之而急先務。障蔽皆除。夫運至計以利仁。紹徽謀於平土。德一也。何獨議乎智。人一也。何獨尊乎禹。蓋智之於物兮。必順適其理。而禹之於水兮。亦疏導其苦。苟能此道。宜効臯陶之謨。一失其原。或謂白圭之愈。後世蘇張之辯勝。莊老之道鳴。其耀才者。或籠愚而不正。其矯枉者。又絕聖以無營。皆與性以相戾。譬濬川而逆行。亦猶戕柳以爲之捲。並非其質。揠苗而助之長。反害其生。噫。喻玉瑩者。楚有屈平。侔著龜者。秦聞樽里。或以易變而貽誚。或以不知而爲恥。皆莫若順其性以行焉。所謂智者樂水。

周以宗彊賦

周以同姓
彊周王室

沈初

古之建國。制莫如周。盛宗枝而作庇。強王室以承休。治尙以文。重恩親於同姓。世緜其祚。大形勢於諸侯。自昔后稷開基。公劉經始。盛德物被。豐功世美。文武大其業。成康繼其軌。爰永永以能然。蓋親親而得以任先宗子。協圖夾輔之勳。本固王家。益植太平之趾。天邑中奠。侯封外崇。大邦小邦兮。我所錫壤。伯父叔父兮。汝其懋功。鞏國勢於寢盛。粹民風於大同。膺木德以當天。王圖以永法。轄星而建屏。邦本其隆。有袞服以華其躬。有金路之優其命。寶玉分賜。脈脈均慶。所以等異諸臣。恩先庶姓。史稱乃德。盛陳過曆之期。詩大其功。茂著維城之詠。豈無異姓。與之翊昌。豈無列辟。與之贊襄。推本而治。尙親則強。故蒼籙之興起。

始諸姬而阜康。忠厚一時。重本枝而相輔。儀刑百世。壯基緒於重光。至如魯衛之所分。刑茅之所附。衆列邦壤。一寧國祚。巋然盤石之安。屹然寶鼎之措。無煩兵革。坐收禦侮之功。不假山河。自得爲藩之固。譬夫木之殖。枝茂者幹必大。水之委源深者流必長。繫爾列辟。輔予一王。秦室寢微。蓋削五侯之壤。漢邦未善。徒恢七國之疆。盛哉。本本之扶持。承承之操術。國五十兮。比如犬牙之制。年七百兮。縣如瓜瓞之實。方今宗也盛而國也強。跨基圖於周室。

佚道使民賦

民得終佚
勞罔無怨

林希

古者善政陶乎庶民。上安行於佚道。下無憚於勞身。教思有原。得樂趨於農役。人知足養。胥仰戴於君仁。始也。井天下之田。比民居之域。乃闢疆里。乃營稼穡。寒則思爲之衣。飢則願爲之食。法旣歸厚。利茲各得。蓋上執其道。務優佚。以便民。衆樂其生。率歡娛而竭力。春使之作。熙然悅從。冬使之息。慶其有終。趨時也。如鳥獸之至。收成也。如寇盜之空。利而不庸。自足王民之用。厚而無困。本資帝力之功。蠢惟有生。不能自恤。役之所以奉其己。利之然後知其佚。仰有以供其祭祀。俯足以寧其家室。穀播其始。化同豳俗之深。壤擊而歌。野有堯民之質。俾爾晝出于塾。俾爾宵索其絢。無力役以奪其節。無賦斂以爲之搔。曾動作之敢息。由醇醲之所陶。驅於足用之原。安而服業。圖厥終身之養。樂以忘勞。大抵強民者難使從。利衆者久益慕。及充其口腹之欲。由竭其手足之故。汝業旣畢。汝居旣固。爲之一日之蜡。怠心已忘。優爾三時之農。收功有素。然則于于其處。皞皞其趨。俾常產之各得。顧閑民之舉。無治貴優游。農者願耕耘於野。俗相廉遜。老而不負戴於塗。噫。藏其用者其政神。厚其本者其民愿。化而不示其迹。勞而不知其困。斯道也。養生送

死無憾焉。何有於怨。

王道正則百川理賦王道公正而百川理

江衍

物格大順。化由至公。本一道以持正。致百川而會通。庶政修明。端若承天之意。衆流協應。沛然行地之中。嘗聞宰物之工。提平在聖。大而覆載者。旣輔相以德。廣而融結者。皆管攝以政。故彼災祥。繫乎邪正。惟王有歸往之義。蓋在爲公。而水存平準之稱。遂皆得性。何則。明審刑罰。持循紀綱。竄聰明而作后。一好惡以遵王。執此之政。兮。堅若金石。行此之令。兮。信如陰陽。有猷有爲。屏邪心於黨附。或源或委。暢柔德於靈長。由是溫洛效珍。滎河薦祉。若江漢焉。莫不歸其潤。若畎澮焉。莫不循其理。民自絕於昏墊。物大蒙於豐美。坦周人之砥道。率履大中。協夏后之神功。救寧降水。豈非德之隆者。高深遠近。而必及道之公者。徧覆包含。而不偏博。旣通於化育。幽遂達於淵泉。上廣堯仁。有旣陂之九澤。下殊幽暴。無皆震之三川。況夫中和發於聖誠。精禋交於神造。萬物之類。尙率育而摠摠。五行之本。宜分流而浩浩。平康在治。茲咸敍於彝倫。脈絡交通。遂安行於故道。向若所持。悖繆。所向阿私。或盛外家之寵。或簡宗廟之儀。害旣作矣。時將殆而白馬沉。而福益遠。金堤塞。而民已疲。是以雅什貽譏。蓋念沸騰之失。漢臣建白。重興涌溢之悲。殊不知水之爲功。物資其澤。以之浸潤也。其功倍。以之灌溉也。其利百。然而疏導則莫勝其勞。壅塞則悉罹其厄。惟王道公正。而不頗。自然順適。

郭子儀單騎見虜賦汾陽征虜以至誠

秦觀

回紇入寇。汾陽出征。何單騎以見虜。蓋臨戎而示情。匹馬雄趨。方傳呼而免胄。諸羌駭闕。俄下拜以投兵。

方其唐祚中微。胡塵內侮。承范陽猖獗之亂。值永泰因循之主。金縢不足。以塞其貪嗜。鎧仗不足以止其攘取。雲屯三輔。但分諸將之兵。烏合萬羣。難破重圍之虜。子儀乃外弛嚴備。中輸至誠。氣干霄而直上。身按轡以徐行。於是露刃者膽喪。控弦者骨驚。謂令公尙臨於金革。想可汗未厭於寢瀛。頓釋前憾。來尋舊盟。彼何人斯。忽去幢幡之盛。果吾父也。敢論戈甲之精。豈非事方急。則宜有異謀。軍旣孤。則難拘常法。遭彼虜之悍勁。屬我師之困乏。校之力。則理必敗露。示以誠。則意當親狎。所以徹衛四環。去兵兩夾。雖鋒無鏃。邪之銳。而勢有太山之壓。據鞍以出。若乘擒虎之驄。失仗而驚。如棄華元之甲。金石至堅也。以誠可動。天地至大也。以誠可聞。矧爾熊羆之屬。困乎蛇豕之羣。於是時也。將乘驕而必敗。兵不戢則將焚。惟有明信。乃成茂勳。吐蕃由是而引歸。師殲靈夏。僕固於焉而暴卒。禍息并汾。非不知猛虎無助也。受侮於狐狸。神龍失水也。見侵於螻蟻。曷爲鋒鏑之交。下遽遺紀綱。而不以蓋念。至威無恃於張皇。大智不資於談詭。遠同光武。輕行銅馬之營。近類曹成。獨造國良之壘。向若怨結不解。禍連未央。養威嚴於將軍之幕。角技巧於勇士之場。攻且攻兮。天變色。戰復戰兮。星動芒。如此則雖驍雄而必弊。顧創病以何長。苻秦夸南伐之師。坐投淝水。新室恃北來之衆。立潰昆陽。固知精擊刺者。非爲將之良。敢殺伐者。非用兵之至。況德善之身積。宜福祥之天畀。故中書二十四考焉。由此而致。

